

یادگار تائب

مناقب و مرثی اہل بیت علیہم السلام

تائب تبریزی

یادگار تائب



۵۷۲۲۵۲۵

### ولادت حضرت رسول اکرم (ص)

حبيب خالق يکتا محمد (ص)

اديب و فاضل و دانا محمد (ص)

طبيب جمله مرضي محمد (ص)

هامي عالميره مولا محمد (ص)

محمد (ص) يا محمد يا محمد محمد يا محمد يا محمد

دوتوب دهري تجلاي محمد (ص)

دل شوریده شيداي محمد (ص)

باشمدا واردی سودای محمد (ص)

منم مست تولای محمد (ص)

محمد (ص) يا محمد يا محمد محمد يا محمد يا محمد

جهان اولموشدی دنيای بطالت

هامي اوهامي دوتوموشدی جهالت

قدم کونه قویوب روح عدالت

بو دنيا اولدی دنيای محمد (ص)

محمد (ص) يا محمد يا محمد محمد يا محمد يا محمد

یارا تمیشدی جنایت قوم جانی  
یوخیدی عدلدن نام و نشانی  
بوگون نور عدالتله جهانی

مُزین ایلدی پای محمد(ص)  
محمد(ص) یا محمد یا محمد محمد یا محمد یا محمد

یوزون کوردی چمنلرده گل آچدی  
سَر مویین گوروب باش سنبل آچدی  
ترانه باشلیوب بلبل دل آچدی  
سالوبلار شور و غوغای محمد(ص)

محمد(ص) یا محمد یا محمد محمد یا محمد یا محمد

سالوب تا کایناته چشم بینا  
یخلدی سرنگون بُتلر سرا پا  
شکست اولدی او دم ایوان کسری  
فدای چشم بینای محمد(ص)

محمد(ص) یا محمد یا محمد محمد یا محمد یا محمد

اولوندی اهل سحرین سحری پامال  
سلاطین تختی وارون اولدی فی الحال  
دوشوبدور نطقدن شهله اولوب لال  
جهانی دوتدی آوای محمد(ص)

محمد(ص) یا محمد یا محمد محمد یا محمد یا محمد

اولوب دریای ساوه خشک یکجا  
ستایش ایلین لر اولدی رسوا  
سماوه دشتی دوندی اولدی دریا  
وراندا موج دریای محمد(ص)  
خبر ویرای صبا اهل وفایه  
جهانه ابر رحمت سالدی سایه  
جهانی دوندروب باغ صفایه  
جمال جنت آرای محمد(ص)

محمد(ص) یا محمد یا محمد محمد یا محمد یا محمد

خدادن ایسته تائب مغز پرکار  
ویرر پُر کار مغزون قلب بیدار  
یاشار آفاقده بیدار و هشیار  
اولان سرمست مینای محمد(ص)

### ماه مجلس

اشعاری اشاره به شخصیت

حضرت رسول اکرم صلی الله علیه و آله  
سالدی ایشیق بیر اولدوز تک ماه مجلس اولدی  
آلدی رمیده گوگلی مألوف و مونس اولدی

یاریم نه خطّ یازدی نه گوردی درس مکتب  
غمزه یله اوسنتاد یوزلر مدرّس اولدی

ایمدی اولار محبت عشرت سراسی آباد  
چون یار او ساختمانه گلدی مهندس اولدی

بیمار قلب عشاق عطریں آلوب صباتک  
قربان حسن نسریں آهوی نرگس اولدی

یاریم یو خاری یرده گلدی منی اوتوردا  
سیر ایت گدای شهره بیر میر مجلس اولدی

اللّه دان اتری ای دل پاک ایت دلون دوداقون  
کیم خاطریم هزاران جُرمه مَوسوس اولدی

ویردی سنون کِرشمن عشاقه بیر شرابی  
هم علم دوشدی بی خود هم عقل بی حس اولدی

آب حیاتی جام کیخسروی اونوتدی  
هر جرعه نوش سلطان فخرالفوارس اولدی

زر تک عزیز جان دور اشعار نغزیم آری  
مقبول اهل دولت اکسیر - بو - مس اولدی

اول دیدیم قوشولما اهل خطایه تائب  
هر کس گیدوب اویولدان آخر ده مفلس اولدی



### ولادت حضرت رسول اکرم (ص)

ویردی باش شمس آسمان هدا  
 تیره دنیایه سالدی نور و ضیا  
 نوری اولده خلقت اول  
 مصدر هستی هامی دنیا  
 اعظم نیرات هر اشراق  
 پخش ایدن عرش و فرشه نور خدا  
 روح ارواح و عقل کل عقول  
 نوزی اصل اصول ایچون معنا  
 وصفینه شعر ده نه گنجایش  
 زورقه یرلشر نجه دریا  
 هامی واله معارفیندن اونون  
 ماعرفنایه دور او نغمه سرا  
 عقل اقدم - وجودی اصل قدیم  
 حادث با قدیم اولان پیدا  
 رتبه ده بیر حجاب اقرب ازی  
 آب و گیلده اولان نبی هدا

کف دستینده ملکیله ملکوت  
 خاتم الانبیاء رسول خدا  
 باغ فردوس شمّه لطفیندن  
 قهری بیر شعله جهنمزا  
 شرح وصفینده عاجز و ابکم  
 خرد و فهم و منطق گویا  
 عالم وحی دن اولان آگاه  
 لی مع اللّٰه مقامینه دارا  
 محرم ببارگاه لاهوتی  
 جبروته شهشه والا  
 متحیر جلال و شأنیندن  
 سربرسر اهل عالم بالا  
 غیب مکنون ظهور حُسنینده  
 لیل ظلمتده حسنی بدر دُجا  
 چمن ملک استقامتده  
 قامتی رشگ قامت طوبا

لیل اسراده ایلین معراج  
 هم ایدن سیر خَطّ او آدنا  
 یاریله بیرجه پرده فاصله ده  
 صحبتّه دل آچان رسول خدا  
 ردّ ایدوبدور علی سسیله جواب  
 خالق صوت عالی اعلا  
 قویولان چیگنینه یدالله الی  
 قاب قوسینده لَیْلَةُ الْأَسْرَا  
 مصطفىا مصطفىا سریرینده  
 مجتبا بَرگزیده یکتا  
 آدی یسرده محمد محمود  
 گویده احمددی شهرتی طاها

تائباً بسدی ایله قطع کلام  
 مصطفائی ایدوبدی مدح خدا

خرگهی فوق مَسَقْفِ مرفوع  
 درگهی رشگ جنت الماوا  
 صبحدن شامه تک بو عالمده  
 آلا راوندان تمام خلق جلا  
 محفل خاصی - محفل قدسی  
 رحمتی کلّ ماسوایه کفا  
 ماه رخسار نازیننی اولان  
 نور بخش تمام ارض و سما  
 پاک آئینی - بیر چراغ منیر  
 دینی بیر طلعت جهان آرا  
 حلقه بَندگان کویینده  
 عقلدور بیر کمین غلام بلا  
 ریزه خواری جناب میکائیل  
 خوان احسانی دهر سرتاپا  
 طفلدور مکتبینه روح الامین  
 آدمه اولموش عَلم الاسما

مَنْ عَرَفَ نَفْسَهُ فَقَدْ عَرَفَ رَبَّهُ  
اوکس که دائم ایدر ادّعی انسانی  
گرکدی اولمیه اوندا هوای حیوانی

دیوبدی حضرت مولی الموحّدین علی (ع)  
موحّدینه گوزل طرزیه بو عنوانی  
خدای عزّوجلّ ایله مرده رحمت ایده  
بوله که قدری ندور بی غرور نفسانی  
حدود دن او اگر چخسا تیز اولار رسوا  
قالار فقط اونا عالمده خانه ویرانی  
عزیزیم آز حسد ایله دولاشما اوزگه لره  
حسد گناهه چکر ضایع ایلر انسانی  
عدالتیه دانش گورنقدر علمون وار  
بوش ادّعا سنه ویرمز مقام بالانی  
اویان بویاندا چالشما یخانماسان بُوله نی  
ولی بولن بولوری سنده واردی نادانی

### خودت را بشناس ضایع مکن

دانش او بولدوقوون قدری سالما گوزدن اُزون  
نه علمیه ایدوسن ادّعی عرفانی  
سنون واروندی گوزل طبیعه گوزل قلمون  
گل استفاده یتور خلقه گزمه پنهانی  
ازون ادیب سوزون زینت کتاب ادب  
ندن حضور یوه مانعدی نفس شیطانی  
تکبر ایلمه گیت اهل شعر مجلسینه  
او لعل لبلرون آچ ایله گوهر افشانی  
سوزون سوز اولسا اگر اوردا مشتری چو خودور  
آلالا قیامت بالایه یاخشی کالانی  
هاموتانور سنی مجلسده اشعر الشّعرا  
سنه ویرلله اویبرده مقام والانی  
طلا عیارینی زرگر بولر نه آهنگر  
تانور سوز اهلی سوزی اهل شعر انشانی  
گلنموسن گر اُزون تائباً او انجمنه  
او بزمه گتماقا منع اینمه بیر مسلمانی

### در ذکر ولادت حضرت علی (ع) در بیت الحرام

بیت حقه گلوب عالمه مرتضا  
کعبه نی دولدوروب نور وجه خدا  
مرحبا مرحبا مرحبا مرحبا

تا قدم کعبه قویدی شاه نجف  
دندی بیت خدا اولدی بیت الشرف  
سربسر عالمی دوتدی شور و شعف  
بزم شادی قوروب یکسر اهل سما  
مرحبا مرحبا مرحبا مرحبا

کنز پنهانیدی گوکه بیت الحرام  
آلدی بو گوهری تاپدی عالی مقام  
اولدی آدی علم دهرده مُستدام  
فاطمه چون صدف گوهری مرتضا  
مرحبا مرحبا مرحبا مرحبا

ملک لاهوت ده بیر ایشیق آفتاب  
ملک ناسوتده مُشتهر بو تراب  
تک سلونی دین ازی امّ الکتاب  
مکه بو فخریله اولدی امّ القری  
مرحبا مرحبا مرحبا مرحبا

رشگ طوبا اولان سرو سا قامتی  
فوق اعلا اولان قدریله قیمتی  
چولقیان عالمی عزت و شوکتی  
روح صدق و صفا جان مهر و وفا  
مرحبا مرحبا مرحبا مرحبا

قویدی بیته قدم روح بیت الحرام  
چوخ بیوک ارتقا تاپدی رکن و مقام  
هم صفا مرویه آرتروب احترام  
آرزویه یتوب مشعر یله منا  
مرحبا مرحبا مرحبا مرحبا



تالی مصطفا نفس طاها علی  
 بعد احمد اولان خلقه مولا علی  
 هم مقامی اولان فوق و اعلا علی  
 خسرو لافتنی معنی هل آتی  
 مرحبا مرحبا مرحبا مرحبا

عالم عقده عقله میزان اولان  
 عالم عدله عدله برهان اولان  
 ظالمه خصم اولان عدله قربان اولان  
 ایله بیر عادلہ جملہ جان لارفدا  
 مرحبا مرحبا مرحبا مرحبا

گلدی پیغمبره یاور بی نظیر  
 هم علمدار دین هم رسوله وزیر  
 هم رسوله وزیر هم مُشار و مُشیر  
 بیله بیر یاوره مرحبا مرحبا  
 مرحبا مرحبا مرحبا مرحبا

### ولادت حضرت علی (ع)

عالمی دولدوروب شور بی ریب وشک  
 غرق شادی اولوب عرش وفرش وفلک  
 عرش وفرش وفلک جنّ و حور و ملک  
 شاد اهل زمین خرّم اهل سما  
 مرحبا مرحبا مرحبا مرحبا

پخش اولوب نکهت سرور مؤمنین  
 عطر مولائیلہ دولدی روی زمین  
 پیروزین ایلدی رشک خلد برین  
 ایله دنیا یوزی تاپدی ذوق و صفا  
 مرحبا مرحبا مرحبا مرحبا

هرکس آلدی اله اُپدی گل تک یوزین  
 بیر تماشائیلہ محو قلیدی اُزین  
 آچمادی باخماقا لیک او مولا گوزین  
 هاشمی لردوشوب حیرته بر ملا  
 مرحبا مرحبا مرحبا مرحبا

### خطبه‌هایی از نهج البلاغه

بویوردی مردم دنیا به حیدر کرّار  
جهان فانیه پابند اولمبون زنه‌ار

فنا جهان دی بیر کاروانسرا بشره  
و لیک مردم ایچون آخرتدی دار قرار  
أزوزه بیله گذر گهدن اخذ توشه ایدون  
همیشه لیق ایویزه گوندرون أروز زنه‌ار  
گرک أروز ایده سوز آخرت تدارکینی  
دالوزجا گوندرن اولماز داخی ألوذبوش اولار  
عبادت ایلون الله بننده خدمت  
جزاده کام روا ایلسون سیزی دادار  
بولر خدا هامو اسرار وزی - حضورینده  
قروب او پرده نی - عصیاندا ایتمیون اصرار  
اماندی قلبوزی ایلون کنار دنیادن  
سیزون وجودوزی تا اوتدان ایلسونله کنار  
جهاندا تولاماسا گر سیزی سرای فریب  
ألوم اولار سیزه آسان نه سخت نه دشوار

جهان یارانمیشا بیر دار آزمایشدور  
قاباقدا واردی سؤال و جواب یوم شمار  
بیری اگر آله دنیاپرست خلق دیر  
که ثروتیندن اونون باقی اولدی نه مقدار  
دیر ملک‌لر او نه گوندروب قاباقجا اوزی  
دلیل اولا که اودور عبد قادر قهار  
خدا رضا سینه مالوزدان ایلون انفاق  
سیزه جزاده اونون بیر آغیر منافی وار  
تمام ثروتوزی قویمیون قالا باقی  
که سیزلری اوایدر چوخ بیوک زیانه دچار  
یامان دیه‌دیه اموالوزی بُلر وراث  
أروز قالارسیز الی بوش یوزوز قرالمیش خوار  
خدایه قرض ویرآل اون برابری اوندان  
بو عرضیمه او کتاب مبین آیه‌سی وار  
بیریسی گر ویره الله قرض ای تائب  
ویرر عوضده اونا - اون برابری دادار

تا ابوطالبه یتدی بیله خبر  
 بیله بیر عالمی ایتدی مدّ نظر  
 گوردی آچمور گوزین اولدی خونین جگر  
 بولدی بو عالمی گلدی شمس الضحی  
 مرحبا مرحبا مرحبا مرحبا

آلدی آغوشینه باغ عشقین گلین  
 دارادی مهریله تل به تل سُنبلین  
 بیرده ویردی اونون کامینه از دلین  
 گوردی مولا گلور نکهت آشنا  
 مرحبا مرحبا مرحبا مرحبا

دوست عطرین آلوب آچدی شهلا گوزین  
 آشناسین گوروب محوقیلدی اُزین  
 مصطفا مهریله اُپدی مولا یوزین  
 قووشوب مهرومه حشر اولوب گوئیا  
 مرحبا مرحبا مرحبا مرحبا

بالانی ردّ ایدوب آنیه مصطفا  
 مرتضائی باسوب فاطمه باغرینا  
 بیله بیر صحنه دن یاد اولور کربلا  
 واریدی اور داییر سود امر بیر آنا  
 مرحبا مرحبا مرحبا مرحبا

گل آلاربُلبللی نچه بوداقینه  
 آناسی اصغرین آلدی قوجاقینه  
 اُپدی دوداقینی قویدی دوداقینه  
 توکدی گوز یاشینی سویلدی جان بالا  
 مرحبا مرحبا مرحبا مرحبا

یعقوب نوحه خوان ایستدی بوسوزی  
 یازدی تائب سوزی اولدی سوزلرگوزی  
 دعوت ایت یا علی نوحه خوانی اُزی  
 سنه جمعیله بیر وقفه زوّار اولا  
 مرحبا مرحبا مرحبا مرحبا

قدر هر کس عیار همّتیدور  
 صدقی اندازه مروّتیدور  
 یاخشی لبق رمزدور شجاعتدن  
 حفظ عفت نشان غیرتیدور

پرهیزایله حمله مرد کریمدن  
 بیر وقت کیم نیازلر ایلر اونی کمین  
 بی اعتنا بناخانددا دگر قلبینه یارا  
 رفع شکست ایچون اولار البتته شرمگین

پرهیز ایله حمله مرد کیمدن  
 بیرگونده کیم غنی اولا اول سرد نابکار  
 طغیان ایدر کیم تاپانددا توانگری  
 اوز زیر دستینه ایدر آزار بی شمار

### در مناقب حضرت علی (ع)

هامی قیددن حق ذوالمنن قوتاروب مَجْرَد ایدوب منی  
 طیران روح وجوددن آپاروب پلا حد ایدوب منی  
 دوداقمدا نغمه معنوی نفس مَجْدِد ایدوب منی  
 دم روح قدس بو نطقده بو قدر مؤید ایدوب منی  
 که بیان منقبت علی بو بیانیه ایلوم ادا

نه علی سماده دیوبدیلر ملکوت عرش علا علی  
 نه علی محمد مصطفی بویوروب بذکر ثنا علی  
 نه علی که ذاتی گلوب اونون چو صفات ذات خدا علی  
 نه علی که خالق ذوالمنن ایلوب خطاب که یا علی  
 سنی ایستین لره بی سخن ویزرم جزاده گوزل جزا

بیله قَد راست یتورمیوب گل و سروسن کیمی باغ دل  
 که خیال سروقدون ایدوب او قَد صنوبری مُعتدل  
 نه طبع بلبلیم اولماسون آدیوی دیما قیله مُشغَل  
 که خیال قدویله چمن یارادار طبیعت آب و گل  
 یوزون اشتیاقینه گل گولر گل آچار شکوفه دیر بلا

ویره گر طیب دوا یقین اودوا دلیل شفا اولار  
ایده گر حبیب جفا یقین اوایدن جفاده وفا اولار  
نه وفاسی واردی او عاشقین که او شکوه گوی جفا اولار  
که سلوک اهل صفا اولان بوجهاندا روح صفا اولار  
که وجود صحت و سقم اولار اولارین یاندا یقین سوا

سن اوسان حبیبی نی لم یزل او گوزل سسونله خطاب ایدوب  
سن اوسان که عالم حشرده سنی سر دبیر حساب ایدوب  
سن اوسان محبتوی سنون هامویه حساب ثواب ایدوب  
کیمون اولسا دلده عداوتون اونی حق اهل عذاب ایدوب  
هر ایکی جهاندا سعید اولار بیری گرسنی بوله مقتدا

سن اوشان صاحبی سن سنون اوخونوبدی شأنوه هل اتی  
من اسیر عشق و محبتون سن امیر کشور لافتا  
بوقاپوزدا تائب سائل من لطفیله صله قیل عطا  
بالام ایله سخت مریضدور که امیدی یوخدی تاپا شفا  
او یدالله اللریله بودم ویر ازون جوان بالاما شفا

سن اوسان که مهریوزون سالوب هامی عالمه جلوات حق  
هم اولوب لسانویله عیان خفی و جلی کلمات حق  
بوریبوب وجودیوی سربسر سنون ای حمیده صفات حق  
سنه عین ذات دیمم ولی بجلال وعزت ذات حق  
سنه یوخ مثل بو صفاتیله حق بی مثل کیمی مطلقا

نه مقام صاحبی دور مگر ملکوت عرصه دنیوی  
او جهان که سن کیمی بیر ملک یارادا سُرادی خسروی  
او ورای صورت دهر سن ملک ممالک معنوی  
گله لی بو عالمه قدرت + ازلیله قامت محتوی  
گتورن وفا و صفائیله ایلیوبسن عالمی با صفا

جمرات آتش عشقیله سالالی بو قلبه شراره سن  
یانورام بو خرمن عمریمه گنه ناروورما دوباره سن  
منی سالموسان بیله درده باخ ازون ایله دردیمه چاره سن  
نولی چشم مرحمتیله بیر ایده سن بو زاره نظاره سن  
که بو قید عالم عجبندن ایده سن جهاندا منی رها

### عشق ورزی به حضرت علی (ع)

یا علی ادرکنی  
ای امام راسیتنیم قبله اهل یقینیم  
دلده مهرون رکن دینیم یا امیرالمؤمنینیم  
یا امیرالمؤمنینیم

چرخ دینین مه لقاسی هر آییق دلده ولاسی  
مهری هر دردین دواسی دلده ای مهر آفرینیم  
یر یوزونده آسماندا تحت وفوق کهکشاندا  
هم نهاندا هم عیاندا وار تولاوه یقینیم  
ای اولان برحق مولا ای اولان هر نفسه اولا  
مهری ناپیدا و پیدا دین ده رکن رکینیم  
خط مشیون شاهراهم یوخ سوزومده اشتباهیم  
رمز لطفون عزوجاهیم یعنی سنسن آن واینیم

الده وار صهبای عشقون مست ایدوب سودای عشقون  
دل اولوب ماوای عشقون ای منیم عشق آفرینیم  
سن یگانه رهبریم سن تاجداریم سروریم سن  
دائماً زیب بریم سن مهرون اولموش هم نشینیم  
واردی دامانوندا چنگیم یوزده یوخدور گرد ننگیم  
تایمیوب تغیر رنگیم لگه آماز آستینیم  
گلدی مهرون گلشنیمده عطری وارجان وتنیمده  
عشقون اولموش گردنیمده رشته حبل المتینیم  
قبله میزدور زادگاهون دلگشادور بارگاهون  
لطف ایدوب بو عزّ و جاهون ذات ربّ العالمینیم  
ایتدی خاقانی تقاضا نظم اولونسون مدح مولا  
یازدی تائب اولدی گویا یا امیرالمؤمنینیم  
چوخ دوشوب تائب فشاره بیرنظر ایتنن نظاره  
ایلسن بو درده چاره بو سوزه واردور یقینیم

### استغاثه از حضرت علی (ع)

یا علی المرتضا علیک السلام ادرکنی  
 ای شه ملک ولایت یا علی  
 فدیة راه عدالت یا علی  
 یا علیّ یا علیّ یا علیّ یا علی  
 ارج قویدون پایه ایمانوه  
 هر بلادین اوسته آلدون جانوه  
 سجده گاهوندا بویاندون قانوه  
 تاپدی جان جان عبادت یا علی  
 ای تمام مبتلایه باش چکن  
 هر غریب و بینوایه باش چکن  
 هر مریض بی دوایه باش چکن  
 ایلین هر دم عیادت یا علی  
 وارمنیم چوخ مشکلیم آسان ایله  
 آچ یّد احسانوی احسان ایله  
 بیر مریضیم وار اونا درمان ایله  
 واردی چوخ دردینده شدّت یا علی

دوشمو شوخ غربت ولایت ده غریب  
 ناخوشوم الدن آلوب صبر و شکیب  
 قالمو شوخ بیز بی دوا و بی طیب  
 ایلین یوخدور طبابت یا علی  
 ای یدالله ای اوزی مشکل گشا  
 قالموشوخ مشکله نومید از رجا  
 قویما مُشکلده بیزی غربت آرا  
 قیل یامان گونده حمایت یا علی  
 اولما راضی اوزگیه بنده اولاخ  
 مسلموخ کفره پناهنده اولاخ  
 پیش وجدانلاردا شرمنده اولاخ  
 بیزده واردور روح غیرت یا علی  
 ای یوزی آیینه مهر و وفا  
 ای صفاسی اهل دنیایه صفا  
 بو مریضه هم دوا ویر هم شفا  
 باخماقون ایلر کفایت یا علی



ای تمام مشکله آدی کلید  
 قویما مشکله بیزی قیل بازدید  
 ناامیدوخ ناامیدوخ ناامید  
 ویر بیزه امید رحمت یا علی

قویما بی کس کیمسه لر بی یار اولا  
 غرق دریای غم بسیار اولا  
 بو ولایت غریب و خوار اولا  
 بو ایکی اهل ولایت یا علی

سن شه دنیا و دین من بیر گدا  
 من قاپون ورام گله سندن صدا  
 دست خالی ایتمه ای کان سخا  
 سائله ایله اعانت یا علی

آند ویرم روح طاها جانینه  
 عصمت کبرای یکتا جانینه  
 همسرون مظلومه زهرا جانینه  
 قیل بیزه ایمای رأفت یا علی

گر بیزه قائلدی چوخلار امتیاز  
 هامودان چوخ دور اولا سندن بیر آز  
 اوغلومی آلام کناره سرفراز  
 ایلرم ایرانه عودت یا علی

قیل نظر بو ناخوش درد آورده  
 قیل تصدق شاهزاده اکبره  
 حلقی اوخلی شیرخواره اصغره  
 حق منه ویرسون سلامت یا علی

تائبم هفتاد ساله نوکرم  
 دین یولوندا عمریمی صرف ایلرم  
 ای کریم النفس ازون ایله کرم  
 قالماسون قلبیمده حسرت یا علی

### حضرت علی (ع) در محراب خون

ضربت خوردن حضرت مولیٰ الکونین  
علی علیه السلام در محراب عبادت

بولمورم سجده ده یتن یاره  
نجه یاره یدی ای خدای قدیر

سالدی شاه ولاتی طاقت دن  
ضعف ایدوب زحمت جراحندن  
اوزگه بیر حاله سالدی مولانی  
سسلب ایدوب طاقت و توانانی  
حضرت مصطفیٰ گوزوندن ایراق  
قان دوتوب چشم مست شهلانی  
اولمادی طاقتی ایاقه دورا  
قان آپاردی امام والانی  
گوتدی اصحاب با وفا ایوبینه  
یتورویلر یارالی مولانی  
ایوه وارد اولاندا زینبینه  
گوستروب شور حشر کبرانی

گوردی زینب ایله یوزی سارالوب  
ویروب الدن اورنگ حمرانی  
او قزل گُل اولوب ساری لاله  
آپاروب رونق گلستانی

عرض قیلدی قزون سنه قربان  
بونه عالمدی ای جهان جانی

سن هارا بیله حال ضعف هارا  
کشور اقتدار سلطانی  
سنه بو ظلمی کیم گوروبدی روا  
کیم وروب زخم تاب فرسانی  
دیمیوب زینبون قالار آغلار  
یارادار گوزده اشگ طوفانی  
یاراسین باغلادی خانم زینب  
یوز گوزوندن یووب آخان قانی  
بوردا اورگشدی یاره باغلاماقی  
ساخلادی یاددا اول وفا کانی

## حضرت زینب (س) در قتلگاه کربلا

باغلادی کربلاده چوخ یارالار  
گوردی چوخ پاره پاره اعضانی  
تاپدی قارداش جنازه سین گوردی  
بورویوب عطری قانلو میدانسی  
دیددی دور عطریوه باجون قربان  
آلورام سنندن عطر زهرانی  
یوخسا زهرا آنام گلوب بو چوله  
که دوتوب عطری بو بیابانی  
آز گلون تاپماقا بو گلشنده  
دولانوب مشگخیز صحرانی  
او گلوب زینبینه سس ویرسون  
آنالار چوخ سُور صبایانی  
بیر عنایت آدینلی نوحه سرا  
تائبه یازدیروب بو عنوانسی  
ای خدا قسمت ایت زیارت ایداخ  
جمعیهله قبر شاه عطشانی

## حضرت علی (ع) در شب بیستم رمضان

بستروندن باش گوتور خلقه مولا یا علی  
آج لارا الدهه آپار نان و خرما یا علی  
یا علی یا علی یا علی یا علی  
ایمدی آجلیق چوخلاری تاب و طاقتدن سالوب  
هر آنانین بیر نچه آج بالادورین آلوب  
سویلوری امیدیمیز بو گجه هاردا قالبوب  
نالہ ایلور هم آنا هم یتاما یا علی  
سن پتردون هر گجه بینوالر دادینه  
بی نوالر دادینه بی رجالر دادینه  
بی کس و درمانده لر بی دوالر دادینه  
قالدیلار درمانده لر بی مداوا یا علی  
سن گیدوب باشسیزلارا باش چکردون هر گجه  
چوخ آدامسیز انسانی یاد ایدردون هر گجه  
چوخ مریضین دیدینه سن گیدردون هر گجه  
بو گیجه یول گوزلوری زشت و زیبا یا علی

فکر ایدوللر اونلاری سن گوزوندن آتمیسان  
یا گوگل آلماق لارین خواب نازه ساتمیسان  
لیک بیلمزلر دوشوب سن یارالی یاتمیسان  
سنده وار زخم سر تاب فرسا یا علی  
سن یگانه رهبر عالم اسلامیدون  
چاره بیچارگان هر بلایه رامیدون  
هم آرامل مَلجائی هم اَبوالایتامیدون  
کیم اولاره باش چکر ایمدی مولا یا علی  
اوز آناسین هر یتیم ایلوری ایمدی ندا  
مشکله دوشدوق قالبوب هاردا بس مشگل گشا  
چوخ یوباندی گلمدی وار باشندانه بلا  
بیر باشندای اولان مین بلایا یا علی  
ای یارالی یاتمدور همّت ایتماق وقتیدور  
وقت احسانون گچور ایمدی گتماق وقتیدور  
سفره احسانیه داده یتماق وقتیدور  
هر گِجَن تک بو گجه قیل تَقلاً یا علی

زاغه لرده بو گجه وار آسفلی مَنظَره  
هم دگوب زاغه نشین آج یاتان لار بیر بیره  
بانگ واغوثا گیدر یردن عرش داوره  
ای گل آدی زینت عرش اعلا یا علی  
ای آلان دل لر غمین غم توکن غمخانه ده  
ای صفاسی یرسالان هر دل ویرانه ده  
ای عیادت ایلین ناخوشی ویرانه ده  
گوزلوری ایمدی یولون پیر اعما یا علی  
گتمیوسن دیدینه ناگران دور ناگران  
یوخ عیادت ایلین باغریقاندور باغریقان  
ضعف حالیه دوشوب ناتواندور ناتوان  
گیت باشی اوسته دوا ایله اعطا یا علی  
رسم عالمدور اولان غملی غمخوار آختارار  
اهل دل بیر درد آلان یار دلدار آختارار  
ایمدی بی کسلر سنی دیده خونبار آختارار  
لیک بیلمزلر که وار نه قضایا یا علی

ای مروتّ ثبت اولان بامروتّ آدیوه  
 دشمنون ده حالینی سن سالاردون یادیوه  
 سن اوسان رحم ایلدون قان توکن جلا دیوه  
 قاتله ویردون نشان خوش مدارا یا علی

سن دیدون بو رحم دل خوش سیاقیمدور منیم  
 هم مروتّ دلده کی اشتیاقیمدور منیم  
 هر نه اولسا قاتلیم اوز قوناقیمدور منیم  
 خصمی دوتدون محترم رحمه دریا یا علی

من نه یول سیرایتمیشم دوز مسیروزدور سیزون  
 قاتله رحم ایلجون چون اسیروزدور سیزون  
 انجیدوب قورخوتمیون دستگیروزدور سیزون  
 بسدی رحم قلبوه بیر بوایما یا علی

سن اوقانلو قاتله رحم قیلدون بر ملا  
 قورخودوب انجتماعین بیلمدون هرگز روا  
 بس دگلدی زینبون دستگر اشقیا  
 ووردیلار انجیتدیلر قوم اعدا یا علی

داد اودمدن زینبین مقتله دوشدی یولی  
 قارداشیم ایوای دیدی گزّدی صاقیله صولی  
 گوردی قارداش پیکرین زخم کینیله دولی  
 آغلادی زهرا کیمی دخت زهرا یا علی

روح آزاد آغلادی ظلم استبدادیلله  
 باسدی نعشین باغرینا خاطر ناشادیلله  
 صیحه چکدی اوخشادی ناله و فریادیلله  
 زینبه ویردی صدا کوه و صحرا یا علی

تائبم مولا ره حقه نخجیر اولموشام  
 آستائوزدا قویوب عمریمی پیر اولموشام  
 اوز وفاتوندور ولی بیر زمین گیر اولموشام  
 آل شفا ویر مدحوی ایلوم انشا یا علی

## زبان حال حضرت امام حسن (ع) خطاب به خواهر در عزای پدر

گل باجی زینب الدن شاه حجاز گندی  
اولدی نمازه قربان رکن نماز گندی  
گل داده زینب آغلا شوريله سینه داغلا

گندی بابام بو کوفه ذوق و صفا سیز اولدی  
بیمار لر دواسیز قالدی دواسیز اولدی  
مضطّر لر قالب آج نان و غذا سیز اولدی  
بیر باب یأس ایتدی ایتمه باز گندی  
راز و نیاز ایدنده راز و نیاز عاشق  
سوز و گداز تابدی سوز و گدازه عاشق  
باش سجده ده یخلدی دوشدی نمازه عاشق  
محرابه یازدی قانی حکم نماز گندی

افسوس گندی قبره درمانده لر پناهی  
توپراق لار آتدا یاتدی اسلام پادشاهی  
مسجد ده حیف قالدی خالی نماز گاهی  
قویدی او سجده گهده قان جانماز گندی

سر خیل اهل عرفان مجروح سر یخیلدی  
أز فرقینه قویوب بیر تاج ظفر یخیلدی  
شرّ بشر الیله کیف بشر یخیلدی  
تاج شرف باشندا چوخ سر فراز گندی

ایتمیشدی یار دعوت مهمان باشندا یاره  
مشتاقیدی یتشسون بزم لقای یاره  
فرقینده یاره سالدی یول مجلس نگاره  
باش یاره سیله آلدی بیر امتیاز گندی

اولدی خلاص ازی بیز غرق ملال قالدوخ  
پر گاریمیز پوزولدی پژمرده حال قالدوخ  
بیر پر شکسته قوش تک بی پروبال قالدوخ  
اوج علایه آچدی پر شاهباز گندی

دفن ایتدوق اول عزیز یی دردیمن اولدی  
أز فاطمه آنام تک تدفینی گزلین اولدی  
هم دفنی گزلین اولدی هم قبری ایتگین اولدی  
دلرده قویدی اولدی سوز و گداز گندی

افسوس آتام دلیندن نطق و بیان کسیلدی  
 گلدسته‌دن صدای جان جهان کسیلدی  
 رکن هُدا پوزولدی صوت اذان کسیلدی  
 محرابدن صفای راز و نیاز گتدی

پرورده ایلمیشدی دلدۀ بو اشتیاقی  
 باغ جنان دا اولسون پیغمبرین قوناقی  
 ترک ایتدی بو جهان فانینی وجه باقی  
 محمود دینه مهمان مجروح ایاز گتدی

از بسکه مین غمیله قلب ملولی دولدی  
 دین دردی دلدۀ آتدی رنگ شریفی سولدی  
 آخرده حقّه قربان مظلوم اوّل اولدی  
 اولدی قتیل تیغ دست مَجاز گتدی

دوشدی نجه خسوفه سن ماهدن سئوال ایت  
 قلبینده کی نوای گه گاهدن سئوال ایت  
 در دین دیردی چاهه گیت چاهدن سئوال ایت  
 نه دردیله دیسون تا یاره فراز گتدی

چوخلار تیکوب یولا گوز وارزیر لَبَدَه سوزلر  
 چوخلار یولون گوز تَلَر یولدا قالوبدی گوزلر  
 یولدا گوزی قالان لار مظلوم امامی گوزلر  
 بیلمز یارالی الدن شاه حجاز گتدی

آج لاردان ایمدی آج لیق تاب و توان آلوبدی  
 گوزدن دیولله نولموش مولا بیزی سالوبدی  
 بیله یوباندی هاردا امیدیمیز قالوبدی  
 گلمزندن دگیشدی طرز و طراز گتدی

گتدی ابوالیتامی ایتام اولوب آتاسیز  
 قالدی نه چوخ آدامسیز بیمارلر دوداسیز  
 نه چوخ آرامل اولدی امید سیز رجاسیز  
 احبابی قوبدی آغلار شاه حجاز گتدی

گزلین گیدوب ایدردی بیماردن عیادت  
 گزلین ایدردی بی نان مضطرلره کفالت  
 دوشدی بابام ایاقدان معناسی تاپدی صورت  
 بیلدی هامی علیدور کشف اولدی راز گتدی

سندہ بتولِ ثانی وار فاطمہ صفاسی  
سنسن آنام بتولین آئینه و نماسی  
سنسن ایوین صفاسی سنسن بو ایو آناسی  
قویدی سنی یرینده بیر دنواز گتدی

اولدون عزالی زینب گل شوره سینه داغلا  
شوریلہ سینه داغلا اشگین عذارہ باغلا  
سن اوخشا آغلیوم من من آغلیوم سن آغلا  
قویدی بابام ودیعه سوز و گداز گیتدی

تائب ولا واروندور آمادہ بلا اول  
قرآن تلاوت ایله قرآنہ آشنا اول  
دین اوسته باش و جانندان گچ دینوه فدا اول  
مولا اولوب فدای دین و نماز گتدی



### در جلالت حضرت زهرا و علی علیهما السلام

قالی پنهان ده بعضی گهر افشا اولماز  
بعضی آدلار تاپولار اوندا مسما اولماز

اولی گنجینه ده چوخ دُر گرانمایه ولی  
ارزش آرزده دردانه بطحا اولماز  
ماه و خورشید جهان تاب سالار عالمهنور  
لیک تابشده اولار زهره زهرا اولماز  
بدو خلقتده اولوب خلق بتولین نوری  
یعنی بو نورسبز عالمده تجلا اولماز  
چوخلی ایو لرده خانم لار آدی زهرادیولر  
آدی زهرا اولی اما اوزی زهرا اولماز  
چوخ پیمبرگلوب آفاقه ازی با عظمت  
هیچ بیر لیکن شئونانده طاها اولماز

بیله بیر شانیله زهرایه فداها بویوروب  
امر اللهدی کتمان او فداها اولماز

### احسان نمودن علی (ع) محصولات فدک را

چو خلی قزلار اولی اونلان آتاسی فخرایر  
 لیک زهرا تک اولان امّ ابیها اولماز  
 اون بیر عیسی آناسی مریم کبری لقبی  
 ویرمسه دم حَسَنینی دم عیسی اولماز  
 ماه گردون حیا گوهر عفت صدفی  
 عصمت و عفته بيله دولی دریا اولماز  
 ایتمین شوهرینه ذره جه تکلیف گران  
 بيله بیر همسر دلدار و دل آرا اولماز  
 مرتضا بیرگون ایدوب جمع فدک محصولین  
 ایتدی قسمت فقرايه بيله مولا اولماز  
 هاموسین ایلدی تقسیم الی بوش قالدی اوزی  
 الی بوش سویلوب ایوه گتاقیم اول اولماز  
 شرم - ایوه گتاقا مولانی سالوب تأخیره  
 نیلسون گلمور اوزیندن گیده پویا اولماز  
 فاطمه واقفیدی کیم نیه مولا یوبانوب  
 روحی مولائيله باهمدی مجزا اولماز

### مکالمه حضرت علی (ع) و حضرت زهرا در خانه

هامودان چوخ تانیوردی خانمیم مولانی  
 هم یقینیدی یوبانماقلیقی بی جا اولماز  
 الی بوش گلدی علی لیک دولی قلبيله  
 گوردی مولا اورگین آلماسا زهرا اولماز  
 پیشواز ایلدی لبخنديله مولانی خانم  
 اورگین آلدی بيله شیوه شیوا اولماز  
 مرتضا فاطمیه باخدی خانم مولایه  
 اولدولار محو تماشا بيله سودا اولماز  
 متنها شرميله مولا بویوروب یا زهرا  
 وار غذا ایوده و یا اینکه مهیا اولماز  
 دیدی زهرا سنيله ایلموشوخ صرف غذا  
 او زماندان دی غذا میز بیزیم اصلا اولماز  
 منده آج سنده عم اوغلی ایکمیز هم رنگوخ  
 یاردن یار بهر حال مجزا اولماز  
 دیدی مولا دیمیوبسن نیه بو سرّی منه  
 درده گلدیم نیه دردون منه افشا اولماز

دیدى مرضیه پیمبر بویوروب یا زهرا  
 که اوتاندرماق عموم اوغلونى باجا اولماز  
 فاطمه گوزله اوتاندرما ولیّ اللّهی  
 او خجل اولسا رضا خالق یکتا اولماز  
 اودی کیم منده سنون تک سوزومی گزندیم  
 الی بوش مَرَدَدَن اِغراق تمنا اولماز  
 قیما دیم بیردم اوتاندرماقا بو ایوده سنی  
 سنسا قلبون منه بو حال گوارا اولماز  
 دیدی زهرا سنی چوخ گورمه سین الله منه  
 سندن اوزگه بو علی حالینی جویا اولماز  
 داد او دمَدَن که دیدی فاطمه من گتمیم  
 دیدی مولا بو غمه سینهدده یارا اولماز  
 آیریلقدان دیمه یا فاطمه هجران دردی  
 چوخ یامان درد اولی بو درده مداوا اولماز  
 تائباً سال دَرِ مولایه اُزون سائل تک  
 الی بوش چون که گدای در مولا اولماز

### در شأن حضرت زهرا (س)

چرخ ادبده زهره زهرادی فاطمه  
 بحر شرفده گوهر یکتادی فاطمه

باشدان ایاقه مهر و وفا صدقدور صفا  
 مجموعی قطره اولسالادریادی فاطمه  
 مهر و وفا کتاینی ایتسن مطالعه  
 ایله قبول ازله کی انشادی فاطمه  
 ذاتینده نوردور ازی ماهیتینده نور  
 یعنی که نوره منشاء و مجلادی فاطمه  
 دنیا قالاردی ظلمت اگر سالمیدی نور  
 نور ازلدی روح تجلادی فاطمه  
 اولده خلق اولوب بونا خاطر تمام خلق  
 خلق عالمینده طلعت زیبادی فاطمه  
 مبهوت ایدن شئون و جلالنده مریمی  
 امام عزیز یازده عیسادی فاطمه  
 اون بیر امام آناسیدی پاکیزه سیری قیل  
 هم پاکدل بتول هم عذرادی فاطمه

عَفْتَدَه بـی بـدیلدی عصمتده بی نظیر  
 مهد عفاف و عصمت کبرادی فاطمه  
 زهرا آدیله توبهٔ آدم قبول اولوب  
 باب نجات آدم و حوادی فاطمه  
 دنیایه گلمیوب بو جلالنده بیر خانم  
 شأنینده تک جلالده تنهادی فاطمه  
 دنیا خانم لاری خانمی آدلانوب - ولی  
 بانوی اعظم ایکی دنیادی فاطمه  
 دنیاده نامیدلره مایه امید  
 هم اُمته شفیعۀ عقبادی فاطمه  
 باشندان آیاقه وقر و کمالات قدسدور  
 وقر و کماله صورت و معنادی فاطمه  
 زهرا آدیله انجمن اهل کسا قوروب  
 بو انجمن ده انجمن آرادنی فاطمه  
 هر چند قبری ایتگین اولوب قدری تک ولی  
 ایتگین اولان مزاریله پیدادی فاطمه

آخر وصیتیه آدین زنده ساخلیوب  
 هر سوز دیوب بولوب ندی دانادی فاطمه  
 ایتدی وصیت ایتگین ایده قبرینی علی  
 علّت اودور که شهرهٔ دنیادی فاطمه  
 بیله وصیتیه دم واپسین ده  
 بیلدیردی پشتوانهٔ مولادی فاطمه  
 از همسر عزیزین اثبات حقیقه  
 کسمیش نهان مزاریله مرصادی فاطمه  
 یورقون یاتوبدی ظاهر صورتده باطناً  
 اثبات حقهٔ بادیه پیمادی فاطمه  
 شأنینده بسدی کیم حسنینین آناسیدور  
 بو امتیاز عالیه دارادی فاطمه  
 ویرمیش حسین تشنه لبه شیر انقلاب  
 ایلوبدی انقلابی او آزادی فاطمه  
 دانشسرای سینه ده پرورده ایلیوب  
 زینب کیمی ادیبه بیر اُستادی فاطمه

خُلق عظیم صاحبی نین نور دیده سی  
 اخلاقده تمام سجایادی فاطمه  
 اُمّ الأئمّه دورشرف انبیاء قزی  
 روح روان سرور بطحادی فاطمه  
 از بسکه چوخ سُوردی بتولی رسولدن  
 مَشموله خطاب فداهادی فاطمه  
 سویلردی بو محبتیم اللّٰهین امریدور  
 بی شک محبت ایتماقا اولادی فاطمه  
 جان تک باساردی باغرینا زهرانی مصطفا  
 اعلام ایدردی اُمّ ابیهادی فاطمه  
 دائم باباسی فاطمه بضعتی دیوب  
 یعنی که پاره تن طاهادی فاطمه  
 که سینه سین اُپردی دیردی نبی حق  
 روح بهشت و جنت ماوادی فاطمه  
 عطر جنان مشامیمه بو سینه دن گلور  
 انسیّه آدلی دور اوزی حورادی فاطمه

### مصائب حضرت زهرا (س)

افسوس بو جلالت و بو احترامیله  
 گوردی جفای فرقه بیدادی فاطمه  
 اوچ گون گچوب وفات رسول گرامدن  
 سانموبلا اشقیا که مُعزّادی فاطمه  
 غوغا سالوب توکولدیله دربار رحمته  
 باخموبلا صاحب در والادی فاطمه  
 سانموبلا کیم او بیتده وار اهل بیت دین  
 بو اهل بیت ایچینده هویدادی فاطمه  
 غوغا گرانه دوگدیله دربار رحمتی  
 ایوده ایشتدی بو اوجالان دادی فاطمه  
 گلدی قاپی دالندا دایاندی وقاریله  
 گوردی که باب بیتده غوغادی فاطمه  
 ایتدی ندا سوزوز نه دی گلدی بیله جواب  
 امر خلیفه لازم الاجرادی فاطمه  
 یایبعت ایلیه علی یاکیم قاپون یانا  
 بو حکم رأی مجلس شورادی فاطمه

اوت و رُوخ ایوده ایوده اولانلاردا اودلانار  
 ییز باخماروق علیدی بو زهرادی فاطمه  
 تهدیدیله دانشدیلا سندیرمادی اُزین  
 ایتدی مُجاب توده بیدادی فاطمه  
 اصرار ایتدیلر قاپونی آچمادی خانم  
 درک ایتدیلر که روح تقلادی فاطمه  
 اسباب آتش الده دوتوب ایتدیلر هجوم  
 گوردی هجوم فرقه شیادی فاطمه  
 اودوردیلار یانوب ملک اذن ایستین قاپی  
 یاندی قاپی دیمه که مجزادی فاطمه  
 نمرود ناری نور خلیلینی چولقادی  
 دورینده گوردی اودیاردان بادی فاطمه  
 ضربتله وردیلار آچیلوبدور یانان قاپی  
 سانموبلا پشت درده کی حورادی فاطمه  
 صدمه گوروب قولی همی سندی قایرقاسی  
 عرشه اوجاتدی ناله و فریادی فاطمه

مسمار دَرَباسی اُپن سینهدن اُیوب  
 قانداغ گوروب دولی دل ناشادی فاطمه  
 شاخ گل بهشتدن آیریلدی غنچهسی  
 گل غنچه سیدی محسن اوگل آدی فاطمه  
 واضح دینرم دیوگن کارد صحبتین  
 وار ایمدی ده دچار او ایذادی فاطمه  
 وار چوخلی سوز یانان قاپیدا استناد اولوب  
 ساخلوب قیامتته همین آسنادی فاطمه  
 قاتل لریندن اُوردا آلاز انتقامینی  
 اللّٰه قوراندا محکمه دادی فاطمه  
 فرمایش ایتدی فضّه خَبَرویر عم اوغلوما  
 بولسون نجه دچار بلایادی فاطمه  
 دلده ولیّ حقّ آدی دلدن دوشوب قالوب  
 ضعف عالمینده عاطفه بنیادی فاطمه  
 مولا گلوب نه حاليله گوردی دینرم  
 ذکر ایتمه سم رضا اولاباجادی فاطمه

چون ایسته مژدی گورسون علی نی شکسته حال  
 فعلیله از مرامینه گویادی فاطمه  
 حاله گلنده گوردی که یو خودور عم او غلوسی  
 ایتدی ندا فدائی مولادی فاطمه  
 آلدی خبر که نولدی عم او غلوم گلوب جواب  
 مولا اسیر فرقه اعدادی فاطمه  
 باشی آچوخ آپاردیلا مولانی مسجده  
 گوردی وظیفیه دم ایفادی فاطمه  
 قاچدی دالنجا ایتدی علی دامنین دوتوب  
 گویا ایدوب مبارزه ایجادی فاطمه  
 هرگز دیردی بوشلا مارام من بودامنی  
 یارب نقدر اهل تولادی فاطمه  
 یوزال چکردی بیعتنه الله ولی سینی  
 ساخلاردی تک او مَفخر اوتادی فاطمه  
 زهرا گوروبله دامن مولانی بوشلامیر  
 مانع اولا او امره مهیادی فاطمه

اولدی اشاره قنقد بی رحمه ناگهان  
 مَشمول هر اذیت و ایزادی فاطمه  
 قنقد آلاندا بیر یاری یانمیش اودون اله  
 ضعف ایلدی دلینده علی آدی فاطمه  
 دوشدی یول اوسته قالدی علینی آپاردیلار  
 الدن ویروب او مرشد ارشادی فاطمه  
 بیر بوردا قنقد آچدی یول اوستونده ظلم الین  
 گوردی که روبروی تَعَدّادی فاطمه  
 بیرده قباله اله یول اوستونده توش اولوب  
 گوردی جفای قاتل بیدادی فاطمه  
 گلدن لطیف اوزه اوتوروب زاغ پنجه سی  
 اول ضَرَبْتِیْلَه آبله سیمادی فاطمه  
 تائب بالان مریضدی یالوار شفاسین آل  
 زهرا الیله شافی مرضادی فاطمه

### عیادت از حضرت زهرا (س)

دُوزدی صبر ایتدی تاپوب انس غم و محنتیله  
بستره دوشدی مریض اولدی خانم شدّ تله

عزم ایدوبلر ایکی جبار ستمکار دنی  
گلدیلر دیده عیادت ایده لر فاطمه نی  
اولمادی فاطمه راضی اولارین گورسون اوزون  
دیددی مولا اولان ای روح رسول مدنی  
گلمیشم سندن اجازه آلام ای مرضیه  
ویرمیشم قول عیادت ایده لر ایوده سنی  
قایمیز باب کرم دور دیه هر کس آچاروخ  
نامید ایل مروخ اوز قایمیزدان گلنی  
عرض ایدوب فاطمه بو ایو متعلقدی سنه  
تابعم من سنه ای جود و کرم انجمنی  
سن رضا اولسان عم اوغلی اولی راضی زهرا  
ویر اجازه گلر بو ایکی پیمان شکنی

اذن زهرائیله گلدی ایکی جانی باهم  
آچدیلار زهره زهرائیله باب سخنی  
دیدیلر گلدوخ ایداخ اخذ رضایت سندن  
اوزی مرضیه پیمبر گل باغ و چمنی  
گر خلاف ایلیمیش اولساقدا گچن گون لرده  
دوت بوگون لطفیله نادیده بیله واقعه نی  
ایتدی فرمایش او مظلومه که ای ظالم لر  
ایشیدوبسوز بو یوراردی او رسول مدنی  
حانی جانیم قانی قانیمدی قزیم فاطمه نین  
پاره تندی منه بو بالامین گل بدنی  
قزیمی انجیده هر کیمسه منی انجیدوری  
منی گر انجیده ناراضی ایدر ذوالمننی  
دیدیلر بوسوزی کرات دیوب پیغمبر (ص)  
بیز دانا بولمروخ البتّه پیمبردیه نی  
الترین درگه جانانه دوتوب عرض ایلدی  
انجیدوب بو ایکی ظالم من محنت زده نی



گچمَرَم بار خدایا بو ایکی جانیدن  
 سنده عفو ایتمه ایکی جانی دور زَمَنی  
 سس چکوب آغلادی بوسوزده او بی شرم وحیا  
 دوغمییدی دیدی اوّلده آنام کاش منی  
 چوخ عتایيله دُنوب ایلدی همراهی خطاب  
 چوخ بیوک دوتما بو اندازه ده نفرین زنی  
 فاطمه اولسادا ناراضی ایتیرمه ازیوی  
 ساخلا اگوننده خلافتدن اولان پیرهنی  
 او جفا گُستری تحریک ایلدی بو سوزیله  
 ایتدیلمر ترک او ایکی جانی او بیت الحزنی  
 تائباً شرم و حیا سیز اله سالسا فرصت  
 ایلمز شرم و حیا ایملر الیندن گلهنی  
 یوخوموش شرم و حیا بو ایکی نادان ده کیم  
 ایتدیلمر خانه نشین شیر خدا تک بولهنی

### خطاب حضرت علی (ع) به حضرت زهرا (س)

ای لفظ عَفَّتْ معناسی زهرا  
 وی شرم و عصمت سیماسی زهرا  
 قلبیم صفاسی دردیم دواسی  
 ای وَرِدِ رَأْفَتِ لَالَه جَنَّتْ  
 باغریقان اولما گل کیمی سولما

گل کیمی سولسان باغریقان اولسان  
 تیز سولار گل لر قان اولار دللر

ثانی مریم هر لحظه هر دم  
 ایستتمه اَوم ایستتمه اَوم

تیز دویمه جانه سن تک جوانه  
 اَلماق یاراشماز سولماق یاراشماز



سالسان هر ساعت ألودن صحبت  
زینیم سولار رنگی سارالار

زینب سولاندا درده دولاندا  
حسینیم آغلار سینه سین داغلار

هامی گوز داشار یرگوی آغلاشار  
حسین آغلاسا سینه داغلاسا

نازلی زینب باخور گوزدن اشگی آخور  
دادوشیونی آغلادور منی

تائبین دردی وار یوزده غم گردی وار  
ایستر شفاسین درده دواسین



### خطاب حضرت زهرا به حضرت زینب (س)

گل ای حیالی زینب باشی بلالی زینب  
همدردو همدم اول منه واردیمه لی سوزوم سنه  
یوزون قویوب دیواره سزیداما همواره  
گوزون دولاندرما بیله زهرانی یاندرما بیله  
گوزوم ضیاسی سنسن دلیم صفاسی سنسن  
سن آغلاسان من آغلارام بوداغلو قلبی داغلارام  
گوزلریوی دولدورما گل یوزیوی سولدورما  
قوجاقلاما غم دیزیوی بیله ایتیر مه ازیوی  
من سیز ادب سیماسی اول بو ایوبین زهراسی  
زهرة زهرا بالاسی اول آنا سیزلار آناسی  
قویما حسینیم آغلاسون مجتبا سینه داغلاسون  
دل دی شیرین دللریمه اول آنا زینب ایویمه  
وار آه سرد تائب چوخ چوخدی درد تائب  
دردینه قیل دوا ازون اوغلونا ویرر شفا ازون

### زبان حال حضرت زهرا (س)

فاطمه‌ام بلالیم عم اوغلی  
 بلالیم عزالیم عم اوغلی  
 قاپیم یانوب گیدوب بالام الیمن  
 قولوم سنوب یارالیم عم اوغلی

غم لر دوتوب شادلیقلار آتدی منی  
 شادلار جرگه سیندن چخاتدی منی  
 قوجا دنیا ایله یوزین چویردی  
 جوان لیقدا یوروب قوجاتدی منی

مریضه زهرانی گلدون گورماقا  
 بیر دردیم وار اوتانورام دیماقا  
 گرک سنون ایاقوا دورایدیم  
 گذشت ایله دورانمورام ایاقا

نه ظلم اولدی قاپیم یانان زمانی  
 واردور هله وجودیمده نشانی  
 اللهدان ایسته ایتمه سون مسلط  
 هیچ یرده با حیا به بی حیاتی

فریاد و داد بی حیا الیندن  
 ای داد دشمن خدا الیندن  
 اولسیدی خصم بی حیا حیاسی  
 چخمازدی بیله بیر خطا الیندن

دوتسون گوروم اشراری حق بلاسی  
 یانمیش قلبیمه ووردی دل یاراسی  
 جان یولداشیمدی حشره تک بو یاره  
 بیتمز یارا اورکده دل یاراسی

یانندی نجه قاپیم بولن اولمادی  
 من یخلدیم نجه گورن اولمادی  
 هرایلادیم جانی منی الدورور  
 منیم هرایمیه گلن اولمادی

دلیلی وارنه شاد اولام نه گوللم  
بیر درده دوشموشم یقیناً اللّم  
آستانادا بالام شهید اولاندا  
نه لر اولدی الله بولر من بیللم

بو اولدی آهیمی گور سینه داغلا  
ایوی خلوت ایله قاپونی باغلا  
سن ددلی من ددلی عم اوغلی اگلش  
بیر ددله شاق من آغلیوم سن آغلا

گوزیاشی حلقه وردی گوز ایویمده  
سسلر او جالدی اولدی سوز ایویمده  
بی رحم لر تو کولدی لر ایویمه  
آل آچدی لر دو گولدم اوز ایویمده

جان ویرماق آجیدور چو خدور زحمتی  
منه گلور شیرین وار حلاوتی  
جان اوسته گورسم بهشتی جمالون  
بیله جان ویرماقین وار چوخ لذتی

نسکل لرون بو قلییمی داغلا دی  
قانیاش توکوب بو گوزلریم آغلا دی  
باغلانسون قابوسی اوکیم ظلمیه  
هم ایوی هم دلیوی باغلا دی

واردور غمیم او قدری گلمز سانا  
غمیله وار سازشیم یانا یانا  
هامی دردیم هامی غصم بیر یانا  
عم اوغلی جان سنون دردون بیر یانا

چوخ گل سولار سن تک سولان تاپیلما  
چوخ گوز دولار سن تک دولان تاپیلما  
چوخ لار مظلوم اولوب گیدوب دنیا دن  
سنون کیمی مظلوم اولان تاپیلما

تائب بویورموش اوزی خیر الانام  
یول علی یولیدور علیدور امام  
دنیا اهلی هامی آیری یول دوتسا  
سن دوت علی نین یولونی و السلام

### زبان حال حضرت زهرا (س) در حال وصیت

بالینیمه گل خسته و بیمارم عم اوغلی  
قاندور اورگیم دیده‌سی خونبارم عم اوغلی  
دوقووز ایل عم اوغلی سنیله اُلفتیم اولدی  
هر آندا سنون حضرتوه خدمتیم اولدی  
گوردوم کمکون یوخدی سنه نصرتیم اولدی  
گوردون که نَجَه یار و مددکارم عم اوغلی

واقفس اُزون فاطمیم خیر نسایم  
صدیقّه اولان آینه صدق و صفایم  
باشدن ایاقا عاطفه‌ام مهرو وفایم  
حقوقده سنون خاصّه وفا دارم عم اوغلی

جوهردی منه مهرو وفا بودل وجاندا  
اُز قانیمیلّه واردی همیشه جریاندا  
گر عاطفه بیر دایره فرض اولسا جهاندا  
بو دایره ده نقطه پَرگارم عم اوغلی

زهرا یتورن مهر و وفاده یالان اولماز  
سیرینده ره صدق و صفادن قالان اولماز  
دردون منه دی دردییوی من تک آلان اولماز  
منده اورگی دردیلله سرشارم عم اوغلی

گیدیم اوز آتامدان صورا قاره محنیله  
رنگ غمه باتدیم خُم محنتده سنیله  
باخ گوز یاشما همنفس اول سنده منیله  
بیر آغلاشاق آخر من عزا دارم عم اوغلی

سندیردی عدو گوهر دینی خُرَف اوسته  
یاندیم یارالاندیم هدف اوسته شرف اوسته  
سن خانه نشین اولدون ایوینده هدف اوسته  
من قلبی سنیق گوهر شهوارم غم اوغلی

ای چهره دین یوسف بازار عدالت  
بیلمزله سنون قیمتوی اهل ضلالت  
من جان جهانین قزی ویرم سنه قیمت  
نقدینه جانیه خریدارم عم اوغلی

سن تک اولاً مظلوم و دلا فگار تاپیلماز  
 اغیار آلوب اطرافوی بیر یار تاپیلماز  
 بیرخانه نشین سن سنه غمخوار تاپیلماز  
 آلام من اُزوم دردیوی دلدارم عم اوغلی  
 باطل دولانان لار سنون آمازلا سلامون  
 سن حَقْسَن اللّٰه دی قرآندی مرامون  
 فخرایت بونا کیم زینت تاریخ دی نامون  
 منده بو مباحاته سزاوارم غم اوغلی  
 ظالم تُردوب جامعده گول یین لر  
 پامال ایلوب حقی سنه زور دین لر  
 قرآنی دانوب عترته توهین ایلین لر  
 بوقومدن اللّٰه بولی بیزارم عم اوغلی  
 گر چه قاپوی باغلا دی بو فرقه اعدا  
 گل گیت کسیلوب قالدون ایوینده بیله تنها  
 امّا گنه مولاسن اُزون هامودان اولاً  
 بو معرفته صاحب اقرارم عم اوغلی

خوار ایستر عزیزانی گوروم خوار اولاً دنیا  
 ایتدی گونوی قاره گوروم تار اولاً دنیا  
 دل دردون آلاماز سنه غمخوار اولاً دنیا  
 من هامودان آر توخ سنه غمخوارم عم اوغلی  
 یاریله اولار رمز وفا یار آراسندا  
 بلبل سالی گل صحبتی گفتار آراسندا  
 افسوس که سن گل قالوسان خار آراسندا  
 بونسکلوه دلدن اسفبارم عم اوغلی  
 وصلت قوتولورناوک هجرانه نشانم  
 دورت نازلی بالامدان ال اُزن اشگ فشانم  
 خاصّه بو حسین و حسنینم نگرانم  
 بو حسرت جانسوزه گرفتارم عم اوغلی  
 من سیز حَسَنینین گوزی بیلمم دولاجاقدی  
 هم قلب لری - لاله کیمی قان اولاجاقدی  
 گل تک سارالوب نازلی حسنینم سولاجاقدی  
 شاخمدی اولار من گل بی خارم عم اوغلی

بیر درد - دور أَلماق که اونون یو خدی علاجی  
 بو زینب و کلثومه فراقیم گَلر آجی  
 چوخ خردادیلار چوخ یانا جاق بو ایکی باجی  
 یانام اولارین حالینه دلزارم عم اوغلی

ملکین آنویدور داخی الدهه قالانون یوخ  
 دنیادن آلون بوش اودی یاده سالانون یوخ  
 دردون نه دی غُصْن نه دی دلدن آلانون یوخ  
 دردون منه (د) محرم اسرارم غم اوغلی

قاندور اورگون کشف اولی گزلین سوزویله  
 درد دلیوه دل آچوسان از اُزویله  
 خالی ایدوسن قلبوی آغلار گوزویله  
 غُصْن دولوری قلبیمه خونبارم عم اوغلی

سن قلبی سنقسان اورگون غمله یارادی  
 زهراده سنان قلبیله رنجور جفادی  
 مظلوم اولانین اشگی سنق قلبه صفادی  
 گوز یاشوی چک سینه مه بیمارم عم اوغلی

بو لطف صفابخش شفابخش اولی منده  
 دوت گوز یاشمی چک اورگون باشینه سنده  
 قلبون آچیللا بلکه صفا آرترا سنده  
 عفو ایله اگر صاحب اصرارم عم اوغلی

ای کاش که آفاقده چوخ فرصت ایدیدیم  
 دنیا بویی کسب شرف و عزّت ایدیدیم  
 چوخ فرصت اولیدی سنه چوخ خدمت ایدیدیم  
 اثبات ایلیدیم نه فداکارم عم اوغلی

افسوس که یوخ الدهه داخی فرصت زهرا  
 ناقص قالوری خدمتوه خدمت زهرا  
 عمری یتشور باشه گلور رحلت زهرا  
 بو باره ده من زار و دلا فگارم عم اوغلی

شایان گورورم ایمدی گنه همتیم اولسون  
 دوشسمده ایقادان گنه ده نصرتیم اولسون  
 بیر خرده وصیتله بیوک خدمتیم اولسون  
 بولسونله سنه یار و مددکارم عم اوغلی

تاگوزلریمی باغلار اجل ای شرف‌الدین  
ویر غسلیمی گزلین گجه دفن ایت منی گزلین  
هم دفن ایله گزلین هم ایله قبریمی ایتگین  
گزلین او مزاریله پدیدارم عم اوغلی

علت سوروشار قبریمی ایتگین ایشیدن لر  
بی پرده ایدر بولمینه شرح بیلن لر  
رسوا اولونار غصب خلافت ایلین لر  
عالم بولی مظلومه دلزارم عم اوغلی

افکار ازی بو باره‌ده ایله قضاوت  
کیم اهل جنایت ایلوبلر نه جنایت  
یا امت قرآنه اولوبدور نه خیانت  
مدفون نهان کاشف اسرارم عم اوغلی

بیر گون که نقاب اوزدن آتار شاهد مقصود  
غایب بالامی ظاهر ایدر حضرت معبود  
کشف ایلر اوزی گلسه بالام مهدی موعود  
دلده اونا سرسلسله گفتارم عم اوغلی

ظلامی یخار دولدورار عدلیله جهانی  
محسن بالامین یرده او قویماز قالا قانی  
قاتل تانیدار خلقه فلانیله فلانی  
دنیا بولی من کشته اشرارم عم اوغلی

تائب که اونون وار قلمینده جریانی  
دوز یولدا گیدر دوست دوتار آل عبانی  
خادمی بیزه حشرده وار خط امانی  
من موقف محشرده اونا یارم عم اوغلی

بیز قویما روخ البته اولا تائبیمیز خوار  
خاصه ایله تائب که وار اوندا دل بیدار  
نظم ایلر او قرآن دین الله سون اشعار  
من طالب انگیزه‌لی اشعارم عم اوغلی





### وفات حضرت زهرا (س)

گردون اجل زهره زهرانی آپاردی  
باغ نبویدن گل طاهانی آپاردی

زهرا دیمه بیر کوکبه شمس هدایت  
زهرا دیمه انگیزه الطاف و عنایت  
زهرا دیمه گلباز گلستان ولایت  
گلباز گیدوب ذوق گلستانی آپاردی

دعوت یتشوب فاطمیه دار بقادن  
گیتدی اوزی قورتولدی غم دار فنادن  
گیتدی ایوی اما خانمین دوشدی صفادن  
آرام و قرار دل مولانی آپاردی

مولایه گوزل یاور و یارائیدی زهرا  
نطقینده اولان منطق گویائیدی زهرا  
قلبینده کی تسکین و تسلائییدی زهرا  
مولادن اولان صبر و تسلانی آپاردی

گلچینه گلی درماقی منظور نظردی  
بورسمدی گلشنده درلر گل وردی  
گلچین اجلده گل پیغمبری دردی  
سولدوردی او زیبا گل طاهانی آپاردی

افسوس جهانندان اوخانملار گوزی گتدی  
گتدی اوزی قالدی بالالاردا گوزی گتدی  
گزلین غمی تک دلدله قالب چوخ سوزی گتدی  
قبره اورگینده غم پنهانی آپاردی

زهرائیدی آرام دل و جانی علی نین  
زهرائیدی غم یولداشی جانانی علی نین  
زهرائیدی ایوده سروسامانی علی نین  
گتدی ازی ایودن سروسامانی آپاردی

چرخ ادبه زهره زهرائیدی زهرا  
بحر شرفه گوهر یکتائیدی زهرا  
هم حیدره دنیا همی عقبائیدی زهرا  
مولا نظریندن هامی دنیانی آپاردی

گل صاحبی گندی پوزولوب فاطمه باغی  
داغ اوسته علی آلدی یانان قلبینه داغی  
مظلوم علی نین ایونین سوندی چراغی  
سوندوردی اجل شمع فروزانی آپاردی

افسوس علی نین او بهین یاوری گندی  
هم مسلکی هم مذهبی همسنگری گندی  
کشتی امیدینده اولان لنگری گندی  
طوفان بلا وقرده دریانی آپاردی

بیر قاره بولود منزل زهرایه چوکولدی  
باران بلایا سر مولایه توکولدی  
بار غمیله قامت رعناسی بوکولدی  
بالمژه علیدن قد بالانی آپاردی

سویلردی که امیّد دلیم سندی الهی  
سنگ غمیله شیشه دلیم سندی الهی  
الدن کمکیم گندی بلیم سندی الهی  
دست اجل اول قامت رعنانی آپاردی

یاندی اورگیم محنت سوزانین الینده  
دویدوم جانا بو اامت قرآنین الینده  
قالدی اَتگیم زینب نالانین الینده  
دل طاقتمی ناله و افغانی آپاردی

کلثوم قوجاقلار منی دلدّه محن آغلار  
ایستر آناسین مندن او شیرین سخن آغلار  
دلدّه آناوای گاه حسین و حسن آغلار  
بو صحنه دلیمدن داخی یارانن آپاردی

تائب اگر ایستورسن اولا مشکلین آسان  
قرآنیله الفت ایله هر قدر اولا امکان  
قرآن اوخی قرآن اوخی قرآن اوخی قرآن  
هر کس که دوتوب دامن قرآنی آپاردی



### دفن حضرت زهرا (س)

علی مزاره قویاندا بتول عذرانی  
دولوب بولود کیمی توکدی یوزه جگر قانی

دل آچدی درد دله ختم انبیائیه  
مخاطب ایلدی گوزیاشلی شاه بطحانی  
سلام اولا سنه مندن بلالی زهرادن  
که غصّه یوردی ایدوب غم له ترک دنیانی  
قزون بتولدی گلدی جوار رحمتوه  
تیز اولدی گلماقی وصلیه آتدی هجرانی  
خلاص اولوب ازی اما علینی تک قویدی  
فراق غصّه سی یالقیزلادی بو تنهائی  
یتوب حضوریه یورقون یارالی قلبی سنتی  
فراقی ایلدی بی صبر بو شکیبانی  
منیم بتول بو دنیاده پشتوانه میدی  
او گتماقیله شکست ایلدی بو نالانی

بتول بیر یانا دنیا گوزومده بیر یانه  
اوگندی سالدی گوزومدن داخی بودنیانی  
دیردیم از ازیمه گرگیدوب رسول خدا  
ولی یرینده قویوبدور وفالی زهرانی  
اولان زمان ده دیداریوه سنون مشتاق  
گیدوب زیارت ایدردیم اوستر کبرانی  
دولاندا داغلی اورک درد وغمله مالا مال  
منیم دلیمدن آلاردی غم فراوانی  
دیردی صبرایله مظلوم عم اوغلی صبرایله  
بولود کیمی دوتولوب توکمه اشگ بارانی  
نقدر وار نفسیم دردیوه شریک اولام  
(د) دردیوی منه خانه نشین زندانی  
مریض حالیدی لبخندیله باخاردی منه  
آلاردی گوگلیمی لب خند لعل خندان  
همان بتول که سرمایه سروریمیدی  
ایدردی زایل اورکدن ملال پنهانی

ایلمله دفن ایلدیم من سنون جوارینده  
 الی یارالی بو پهلو شکسته بیر جانی  
 او گوهری که امانت قویوب ازون گتدون  
 ازیوه رد ایدورم ای نبی سبحانی  
 گذشت ایله بو گوهر اگر شکست اولسا  
 که سن ازون بولوسن بیربه بیر قضایانی  
 گوز اوسته ساخلا میشام من بودرّی حفظینده  
 قصور ایتمه میشم ذره جه علی جانی  
 دیر ازی سنه بیربیر باشی بلالی قزون  
 که امتون بیزه گوستردیلر نه طغیانی  
 توکولدیله نجه بلوا یاراتدیله قاپیدا  
 بهود و گبرده سالموبدیله او بلوانی  
 بیراوز که سوزده دیدی هضمها عبارتتی وار  
 کتابت ایتماقا شرم ایلورم او عنوانی  
 قاپیمدا اولدی نه لر من چخاتمارام یاددان  
 او یادیله توکرم اشگ چشم گریانی  
 ایلمله دفن ایلدیم من سنون جوارونده  
 الی یارالی بو پهلو شکسته بیر جانی

شیرین یوخی گلّه هیهات بیرده گوزلریمه  
 ایدنده یاد او گونی ایله تلخ دورانی  
 قرارسیز یاشارام گوندوزی گجه بیدار  
 غمیم همیشه لیق اولدی اَلونجه هرآنی  
 اجل بو حاليله تا اینکه درک ایده منی ده  
 گلوب تاپام سیز اولان یرده جای سُکنانی  
 ایله صبور و توانائیدی قزون زهرا  
 که گز لدردی اومندنده زخم اعدانی  
 نه ویردی سینّه یاراسین نشان اَلونجه منه  
 نه گوستروب قارالان چشم مست شهلانی  
 بیلک لری ورم ایتمیشدی سوز سالوب دیدمی  
 مباد صبریم اولادرد و غصّه تالانی  
 یوزینده سیلی یرین نه منه نشان ویردی  
 نه گوسترویدی دوگولموش کبود اعضانی  
 نه گوسترویدی منه تازیانه یرلرینی  
 ایدوب نه شکوه ووروب نه گلایه اعلانی  
 شیرین یوخی گلّه هیهات بیرده گوزلریمه  
 ایدنده یاد او گونی ایله تلخ دورانی

دله گتوردی نه بیر سوز شکسته پهلودن  
 خمیده گر چه گوزردیم او قد بالانی  
 ویرنده غسلینی یاندی یاخیلدی بو اورگیم  
 گورن زماندا همان نیلفام اعضانی  
 حکایت ایتدی منه تازیانه لر یاراسی  
 اوناقدر ایدوب ظلم دشمن جانی  
 وجودین ایله آریتمیشدی بوته محنت  
 اوشاق وجودینه اوخشاری جسم بی جانی  
 اوشاق جنازه سی تک گتدیم اللرم اوسته  
 ودیعه وی سنه ردّ ایلیم همین آنی  
 محبتیله قزوندان آزون خبر آلسان  
 دیر اوزی سنه اوز چکدیقی بلایانی  
 بالا گوزلدی که اوز دردینی آتایه دیه  
 آتا محبتی دور جمله درد درمانی

قوتار بو مطلبی تائب یتشمز اتمامه  
 قیامته کیمی یازسان بو شرح عنوانی

### زبان حال حضرت علی (ع)

ای خدا دلده اولان تاب و توانیم گیدوب الدن  
 دویموشام جانہ داخی روح روانیم گیدوب الدن  
 دائماً گوهر شہوار توکن لعل لبیندن  
 بحر عفت صدف پاک دهانیم گیدوب الدن  
 منه بیر دولت امنییدی صحبت زهرا  
 یوخ امانیم داخی هر امن و امانیم گیدوب الدن  
 منی یالقیزلیوب اشرار غریبیم و طنبیمده  
 یاوریم یوخدی قوی یاور اولانیم گیدوب الدن  
 منه هم غم گونی یولداش همی قارداشیدی زهرا  
 همدمیم یوخدی قوای دل و جانیم گیدوب الدن  
 منه همسنگر و همدردیدی هم همدم و همسر  
 تک قویوب درد آرایبله همگانیم گیدوب الدن  
 داغلی سینمده چاتوب باش باشداغلا بویی دردیم  
 درد آلان محرم اسرار نهانیم گیدوب الدن

او منیم حالیمه آغلاردی اونون نسکلینه من  
 منی آغلار قوبوب اول اشگ فشانیم گیدوب الدن  
 فاطمیدی دل و جانیم همی شمشیر بیانیم  
 همی روحیم همی شمشیر بیانیم گیدوب الدن  
 فاطمیدی بو جهاندا هامی دنیاسی علی نین  
 گندی زهرائیله بیر جمله جهانیم گیدوب الدن  
 کمرب سندی داخی بوقوجا دنیاده قوجالام  
 عالم پیرده زهرای جوانیم گیدوب الدن  
 او بهشتی گلی مجروح ایلیوب زاغ و زَغَنَلَر  
 سینه ده یاره گل باغ جنانیم گیدوب الدن  
 خسته غم ازی پهلوسی شکسته یوزی نیلی  
 منی خم قامت ایدن قدی کمانیم گیدوب الدن  
 نارنمروده دوشن صبر ایلین نور خلیلی  
 یارالی آتش ظلمیله یانانیم گیدوب الدن

آرزومی بو گوزومده قویان آغلار گوزومیله  
 گل آدی دائم اولان ورد زبانیم گیدوب الدن  
 دفنی گزین دل شبده هم اولان مدفنی ایتگین  
 او گران قدروبها گنج گرانیم گیدوب الدن  
 یوخ داخی فاطمه سیز منزلیمین ذوق و صفاسی  
 او صفا بخش وفادار روانیم گیدوب الدن  
 نجه من آغلامیوم سینه ده دنیا جه غمیم وار  
 یوخ داخی درد آلانیم دردستانیم گیدوب الدن  
 تائباحق دیسن اول خانه نشین اولماقا حاضر  
 اولما دلگیر دیمه عزت و شانیم گیدوب الدن  
 مرتضی ده دیدی حق خانه نشین ایتدیله ناحق  
 اولدی مظلوم دیدی حق عیانیم گیدوب الدن

### زبان حال حضرت علی (ع) بعد از وفات حضرت زهرا (س)

بلالی فاطمه گندی شرار محنته یاندم

یارالی فاطمه گندی ازوم یاندم یارالاندم

غریب من غریب من غریب من غریب من

همایم شہسپریم سندی او دورلانه نشین اولدوم

قایم باغلاندی ظلمیلہ ازوم خانہ نشین اولدوم

غریب من غریب من غریب من غریب من

ازولدی بو الیم الدن بیلہ قالدم الیم باغلی

دلیم آتدا سوزوم قالدی الیم باغلی دلیم باغلی

غریب من غریب من غریب من غریب من

من اولدوم بی سروسامان وفالی همسریم گندی

منی یالقیزلادی دشمن الیمدن لشکریم گندی

غریب من غریب من غریب من غریب من

قریلدی غنچه سی شاخ مروّتن گلیم سندی

الیمدن فاطمه گندی ازوم سندیم بلیم سندی

غریب من غریب من غریب من غریب من

ویرنده غسل زهرا یه بدن نیلی ازوم گوردوم

جمالینده واریدی نقشه سیلی ازوم گوردوم

غریب من غریب من غریب من غریب من

خزان اولدی بهارینده گلیم منده خزان اولدوم

داموب قان باغریما لاله کیمی من باغریقان اولدوم

غریب من غریب من غریب من غریب من

گلستانیم گلیم سولدی عزالی عندلیب اولدوم

منه غربت وطن اولدی غریب اولدوم غریب اولدوم

غریب من غریب من غریب من غریب من

فراق فاطمه آتش یارالی سینه مه سالدی

دلیمده فاطمه آدی اورکده اللریم قالدی

غریب من غریب من غریب من غریب من

آریمیش قلبیمی گورسه گلر درده آریر داغلار  
 آخان گوز یاشیمه باخسا زمان آغلار زمین آغلار  
 غریب من غریب من غریب من غریب من

جهاندا کیم حقوقیندن اولوبدور من کیمی محروم  
 هانی من تک اولان محروم هانی من تک اولان مظلوم  
 غریب من غریب من غریب من غریب من

هزار افسوس اجل گلدی الیمدن آلدی زهرامی  
 منیم دنیامیدی زهرا آپاردی قبره دنیامی  
 غریب من غریب من غریب من غریب من

پریشان روزگاریم وار پریشان اولمیوم نیلوم  
 مصیبت آغلادور من دیده گریان اولمیوم نیلوم  
 غریب من غریب من غریب من غریب من

پریشانم پریشانم نه حالیم واریلن یوخدور  
 همیشه دیده گریانم گوزوم یاشین سیلن یوخدور  
 غریب من غریب من غریب من غریب من

بهاری نیلورم بیرده گلستانیم خزان اولدی  
 منیم بوقان اولان گوگلوم بسان غنچه قان اولدی  
 غریب من غریب من غریب من غریب من

ایدر بیداد یالقیزلیق بویالقیزلیق منی سیخدی  
 یخار مردی آدامسیزلیق آدامسیزلیق منی یخدی  
 غریب من غریب من غریب من غریب من

غم غربت سخوب تائب گتوردی خاطر و ن درده  
 وطن یادیله مولانین دلینجه ذکر ایله بیرده  
 غریب من غریب من غریب من غریب من





تأسف در جدائی از مادر  
و یادی از دوران زندگی مادر  
بانگ محنت زمانه دن گلوری  
نکبت یأس خانه دن گلوری

گنه آواسی مهربان آنامین  
ضبط اولوب قلب خانه دن گلوری  
طفل قلبیمله بیله اویناماقا  
هوس کودکانه دن گلوری  
نوش جانہ صدای لالاسی  
یاخشی راق هر ترانه دن گلوری  
گنده عطر زلف مشگینی  
اوقالان کهنه شانہ دن گلوری  
آنامین جانمازینون عطری  
گنه محراب خانه دن گلوری

جانمازی اونون نشانه سیدور  
 نکهتی اول نشانه دن گلوری  
 هم صدای دعاسی یرده قالان  
 سَبْحَهُ دانه دانه دن گلوری  
 باشدا چادر شبی نماز اوسته  
 سسی محراب خانه دن گلوری  
 یادیمه صحبتی گوزل آنامین  
 گجه لر هر کرانه دن گلوری  
 گنده عطر و بوی پُخت و پیزی  
 ایوده بزم شبانه دن گلوری  
 طایر روح بخش ایدوب پرواز  
 نغمه سی آشیانه دن گلوری  
 دمبدم داغلی قلبیمه حسرت  
 یاد یاریگانه دن گلوری  
 یاد عشقی آنالارین تائب  
 نفس عاشقانه دن گلوری

### زبان حال حضرت علی (ع) در سر مزار حضرت زهرا (ع)

قبر دَن دور نورعین مصطفایا فاطمه  
 گور نجه آغلار علی المرتضی یا فاطمه  
 یاوری الدن گیدن بی یار آغلار آغلاماز  
 فرقت دلدارده دلدار آغلار آغلاماز  
 غم شریکی گتسه بی غمخوار آغلار آغلاماز  
 آغلار البته یانار صبح و مسایا فاطمه آغلاماز  
 من او دور رخت وفانی قامتیمدن سویمارام  
 سیر تکمیل وفاده ذره نقصان قویمارام  
 آغلارام یاد غمونله آغلاماقدان دویمارام  
 دلشکسته نی کیمی قیلام نوا یا فاطمه  
 ای منه سرمایه فتح و امید و اشتیاق  
 اشتیاقیم سنله گتدی گلدی تاپدی اختناق  
 گوردولر یوخ داد خواهیم تاپدی ال اهل نفاق  
 حقیمی پامال قیلدی اشقی یا فاطمه اهل نفاق

حالیمه چو خلار یاناردی سن اولاردان باشیدون  
غم گونونده هم منه بیر با وفا یولداشیدون  
هم وفالی یولداشیم هم مهربان قارداشیدون  
سن دگردون بلکه مینلر قارداشا یفاطمه

سن منیله هم مرام و همدل و هم خوئیدون  
هم منه حصن حصین هم قوت بازوئیدون  
هم منه دشمن قبایلنده بیوک نیروئیدون  
مرتضی سنسبز قالوبدور بی قوا یا فاطمه

ای محبت مُصَحَفینده سوره مهر و وفا  
ای صداقت سوره سینده آیه صدق و صفا  
ای تمام مشکلاتیمده اولان مشکل گشا  
گورنه دوشموش مشکله مشکل گشا یا فاطمه

سن اگر محزون گیدوبسن من سنون محزونوام  
چوخ منیم بوینومدا حقون وار سنون مدیونوام  
خدمتوندن بی نهایت راضیم ممنونوام  
راضیم سندن اولا الله رضا یا فاطمه

گزلدردیم دردیمیله دلده آه سردیمی  
عاطفن یوزدن سیلردی درد و حسرت گردیمی  
من کیمه اظهار ایدوم سند نصورا اوز دردیمی  
وار کیمیم دل دردیمه ایتسون دوا یا فاطمه

باغریقان اولماقدا لاله شهره دوران اولوب  
صحبت لاله عیان هر سوز باشی عنوان اولوب  
هانسی لاله من کیمی عالمده باغریقان اولوب  
باغیریمی گورسه ایدر لاله حیا یا فاطمه

صبر ایدوب که همد اولام دلده سوز آهیله  
درد دل قیلام گهی ظلمات شبده ماهیله  
دردیمی قویام آرایه چولده گاهی چاهیله  
محرمیم یوخ دردیمی دلدن آلا یا فاطمه

سن که گتدون ای محبت روحی دلدار نجیب  
یأسیم آرتدی هر محبتدن من اولدوم بی نصیب  
دردیمی دلدن آلا تیم اولمادی قالدیم غریب  
ای منه هم خویش و ئیل هم اقربا یا فاطمه

ای وفالی پشتوانم ای اولان ارخام ئلیم  
 ای اولان آرام جانیم ای سُویدای دلیم  
 یوخ ملامت گر دیسم سنسیز منیم سندی بلیم  
 بارغمدن قامتیم اولدی دوتا یا فاطمه

سن که گتدون گوز ایویمدن باخدی آردونجا گوزوم  
 بیر خدا بولدی نه حاله قالدیم اوندا بیر اُزوم  
 قالدی گزین غم لریم تک دلدہ چوخ گزین سوزوم  
 سندی شمشیر بیانیم بر ملا یا فاطمه

گتدون امیدیم بهاری گلستانیمدن منیم  
 سایه وی چون سروگوتدون بوستانمندن منیم  
 باغ آمالیم سراغ آلدی خزانیمدن منیم  
 خوشنوا بلبل لر اولدی بینوا یا فاطمه

سن تراب تیره آتدا قبرون اوسته بوتراب  
 گوزده گوزیاشی ایدر گوزیاشلی یا زهرا خطاب  
 بس ندن بو باغریقانه ویرموسن آیا جواب  
 بولموسن قلبی سنقدور مرتضا یا فاطمه

هم منیم دنیا میدون هم قلبیمه یارا منیم  
 حیف اولا گتدون گوزومدن عصمت کبرا منیم  
 گوزیاشیم تک بو گوزومدن دوشدی بو دنیا منیم  
 واردی بو دنیا ده سنسیز نه بها یا فاطمه

سن که گتدون شام تاره گوندوزوم دوندی منیم  
 روزگاریم روزگار حسرتہ چوندی منیم  
 ایو صفادن دوشدی شمع محفلیم سوندی منیم  
 آگنینه پروانه لر گیدی قرا یا فاطمه

درد و غمدن قور تولوب عین مراره چاتموسان  
 تاپموسان پیغمبری دنیانی گوزدن آتموسان  
 باش قویوب تو پُراق لارا سینه یارالی یاتموسان  
 آغلارام منده سنه دلدہ یارا یا فاطمه

ای جهان معرفتده صاحب هر امتیاز  
 وی مریضه جانی مثل شمع پُر سوز و گداز  
 ای نوای دلنشینی هر مریضه چاره ساز  
 بو مریض عشقوه دور ویر شفا یا فاطمه

دویمارام بو مدفنوندن غمگساریم بوردادی  
گل کیمی سولموش خزان دیده بهاریم بوردادی  
راحت جان روحدن آرتیق نگاریم بوردادی  
بو صفالی قبردن آلام صفا یا فاطمه

ای بهار با صفادن نکهتی برتر منه  
من باخوم بیرده نجه سنسیز بهاری گلشنه  
نوبهاروندا خزانون یتدی آل تاپدی سنه  
گلشنون اولدی سنون دارالعزا یا فاطمه

سن که گتدون برهم اولدی رونق پرگاریمیز  
سن که سولدون سولدی یکسر گلشن و گلزاریمیز  
قالدی روز محشره سننن بیزیم دیداریمیز  
ای امید موقف اهل جزا یا فاطمه

سن که گتدون منزلیم اولدی منیم بیت الحزن  
جمع قیلام باشیمه باشسیز قالان اطفالی من  
زینب اوخشار شوريله آغلار حسینیه حسن  
آغلاشالار منده اولام همصدا یا فاطمه

سن گزن بیرده نجه بیرده دولانسون قزلارون  
بوش گوروب ایوده یرون دوزسون دایانسون قزلارون  
هانسی سایه سایه سینده دالدالانسون قزلارون  
سایه سیز قالدی نچه اُخت واخا یا فاطمه

دولدورار دورت نوردیدم چشم گوهر پاشینی  
جانمازون گاه آچار زینب توکر گوز پاشینی  
آغلادار حالی حسینیه حسن قارداشینی  
دل یانارسس سیز سز یلدار مجتبا یا فاطمه

فرقته دوزماق چتیندور سانما آسان سانمیشام  
کیم بولر نه چکمیشم دلدن نجه اودلا نمیشام  
اولموشام پروانه دورت شمه صدا سیز یانمیشام  
بیر مئم مین درد و غم سند نصورا یا فاطمه

بیر یانا هر درد و غم کلثوم دردی بیر یانا  
چوخ شیرین دلدور سالور شیرین دلی آتش جانا  
بوینی چیگنینه گوزی یاشلی دینده وای آنا  
منزلمیده ایلوری محشر بپا یا فاطمه

چوخ او شیرین دل قزون اوز دلرباسین ایستوری  
چون شکسته قلبدور قلبه صفاسین ایستوری  
هی قوجاقلور بوینومی مندن آناسین ایستوری  
وارنه چاره نیلسون بو مبتلا یا فاطمه

گورسه مادر سایه سینده خرده قزایلور خرام  
آهی آه اوستن چکر سویلر گر اولسیدی آنام  
سایه سینده گز دیروب قویمازدی حسرتده قالام  
کیم ییرونده وار اونا سایه سالایا فاطمه

دورت عزیز جانوی بیر دم گوزومدن آتمارام  
اونلارین دیندیرماقین مین خواب نازه ساتمارام  
آغلیوب یورقون یاتالار صبحه تک من یاتمارام  
دلده زهرا صبح قیلام هر مسایا فاطمه

چوخ شکسته حاليله ای دلشکسته گلیمیشم  
ای جفالر خسته سی دورمنده خسته گلیمیشم  
درد دل ایتماقلیقا من قبرون اوسته گلیمیشم  
یار دل دردین دیسه خوشدور یارا یا فاطمه

گتدون ای محبوبه محبوب رب العالمین  
قیمادیم درگیر اولایا بیر بیرلریله مسلمین  
گزلدوب شمشیری اولدوم ظاهراً عزلت گزین  
دین حقه باطناً ویردیم بقا یا فاطمه

یوخسال تاپمازدی مقهور اهل کین ایتسون منی  
تکلیوب قاتل لرون عزلت گزین ایتسون منی  
حقیمی الدن آلوب خانه نشین ایتسون منی  
دین یولوندا نفسیمی ایتدیم فدا یا فاطمه

کوچیه چخسام وراالار قلبیمه اعدا یارا  
یالقیز ایوده اگلشنده درده گلم درد آرا  
لا علاج من هارا خانه نشین اولماق هارا  
نیلیوم یوز دوندریم هاردان هارا یا فاطمه

شهر پیغمبرده بیر بی اقرباه بنزرم  
هامی بیگانه اولوب بی آشنایه بنزرم  
اولموشام لانه نشین پرسیز همایه بنزرم  
نیلسون لانه نشین پرسیز هما یا فاطمه

هر زمان قیلام یاری یانموش قاپوندان من گذر  
قتلگاه محسنون اوردا اولار مدّ نظر  
سن نه حاليله یخيلميشدون چخار یاددان مگر  
گوز قارالمیش ال یارا سینه یارا فاطمه

هانسی دلداده دوزر گورسه یخيلمیوش دلبرین  
هانسی بی کس صبر ایدر تاپسا یارالی یاورین  
هانسی صاحب تاب ایدر گورسه دیوللر همسرین  
دوزوم امّا من لمرّضات خدا یا فاطمه

صبر ایدوب دوزماق رسول اللّهدن تلقین دور  
دوزماقیم تحکیم بخش مذهب و آئیندور  
صبرقیلماق هر شدایدده صلاح دین دور  
جَوّ روز ایلوبدی بیله اقتضا یا فاطمه

بیرنفر یالقیز قالان بیر اقربا سیز نیلسون  
بیر کُمسیز فرد یار با وفا سیز نیلسون  
کثرت اعدا آرا بیر آشنا سیز نیلسون  
آشنای غم اولار بی آشنا یا فاطمه

سن سیز یلداردون یاتقلی گوز قباقیمده منیم  
غصّه قندیلی آساردون دل اطاقیمده منیم  
ایمدیده قالموش سزیلتون بو قولاقیمده منیم  
ایلوسن گویا گنه سن آه و وا یا فاطمه

غم لریم بیداد ایدر من دادرس سیز آغلارام  
محریم یوخ همدیم یوخ، همنفس سیز آغلارام  
وقریم ایجاب ایلوری گزلینجه سس سیز آغلارام  
یوخسا فریادیم دوشردی داغ داشا یا فاطمه

امت دین بس دگل جبر اختناقینده گزر  
مرتضایه کس یاخون دوشمّر اوزاقینده گزر  
بیر علاوه قانلو قاتل گوز قباقیمده گزر  
هر غمیدن چوخ بو درد غمفزا یا فاطمه

اوندا که غوغا یاراتدی فرقه بیداد گر  
بیر قابی یاندریماقا ایتدی هجوم اوچ یوزنفر  
هم قاپون یانندی هم آل آچدی سنه بیر بد سیر  
شل اولیدی کاش او بی شرم و حیا یا فاطمه

گلدیم اوندا باشون اوسته دلغمین تاپدیم سنی  
هم سنی گوردوم یارالی هم غم آور صحنه‌نی  
سَرّی واردور چکم‌دیم شمشیر عفو ایله منی  
صبره امر ایتیمیشدی ختم الانبیاء یا فاطمه

مرغ جان محبوسدور درد دل سوزانیله  
دولدی قلب داغداریم درد بی درمانیله  
کاش او مرغ جان اوچا دلدن غم پنهانیله  
درد و غم لردن علی اولسون رها یا فاطمه

بوخ حیاتین خیری یا خیرالنسا سندنصورا  
آغلارام بی جا دگل صبح و مساسند نصورا  
قورخورام عمریم جهاندا طول اولا سندنصورا  
چوخ چگم رنج و فشار و ابتلا یا فاطمه

طایر جان آشیانین ایتماقا ترک ایستم  
آرزولر نخلینی بی بار و بی برگ ایستم  
جان شیریندن دویوب وار علتی مرگ ایستم  
داد آدامسیزلیق الیندن آه و وایا فاطمه

دونمرم بو تربتوندن آنداولا آمالیمه  
عذریمی لطفاً قبول ایت قوی منی اوز حالیمه  
قیل مرخص باش چکوم باشسیز قالان اطفالیمه  
منزلیهمده وار گوروم نه ماجرا یا فاطمه

بیلم ایتموش ایمدی ترک خواب راحت زینیم  
بو دل شبده قوروب بزم مصیبت زینیم  
شوريله اوخشار ایدر بر پا قیامت زینیم  
دمبدم سسلر حسین ایوای آنا یا فاطمه

داغلانار دل لر حسین گر غم له سینه داغلاسا  
سیل دوتار دنیانی گوزیاشین عذاره باغلاسا  
یرگوی آغلارسس چکوب نازلی حسینیم آغلاسا  
یاغدیرار ابر بلا درد و بلا یا فاطمه



سن بولورسن اوغلوین نه شور شورافزاسی وار  
عاشق صادقدی عشقیله سر سوداسی وار  
عالمه غوغا سالان غوغای عاشوراسی وار  
باشلاناندا انقلاب کربلا یا فاطمه

دلشکسته تائبم درویش مولا یکدله  
قورموشام خیمه قاپوندا ایسترم سندن صله  
وار مریضیم هم مریضم جان مولا لطف ایله  
آل بیزه اللهدن قطعی شفا یا فاطمه

تائب درمانده اولموش غرق دریای گناه  
محضر حَقْدَه اولوبدور شرمسار و روسیاه  
روز محشرده آزون اول بو گنه کاره پناه  
ایسته اللهدان ایده غفران عطا یا فاطمه

### زبان حال حضرت علی (ع) به زینب کبری (ع)

بتولدن صورا شاهنشه دیار عرب  
گوروب که آغلوری دائم قزی خانم زینب

سؤال قیلدی نندن دائم آغلوسان زینب  
جواب ویردی بلالی آنام دوشور یادیم  
دیددی هلاله باخوب وای آنا خطاب ایده سن  
دیددی که قدی هلالی آنام دوشور یادیم  
دیددی همیشه قزیم مجلس عزا قوروسان  
دیددی که یاسلی عزالی آنام دوشور یادیم

دیددی گوزون یاشینی من باخاندا تیز سیلوسن  
جواب ویردی حیالی آنام دوشور یادیم

دیددی قزیم نه یارالی یانقلی اوخشورسان  
جواب ویردی یارالی آنام دوشور یادیم  
دیددی ندندی گزورسن باشی قرالی قزیم  
دیددی که باشی قرالی آنام دوشور یادیم

گورنده بیر گلی گل غنچه دن دوشوب آیری  
 او محسنوندن آرالی آنام دوشور یادیما  
 دوشور آنام یخیلان آستتیه نظیریم  
 سیزیلدین او نوالی آنام دوشور یادیما  
 گورنده هر آنا بیر خریدا قزیانجا سالوب  
 منیم ده مهر و وفالی آنام دوشور یادیما  
 نماز وقتی مصلاً سینه دوشنده گوزوم  
 نماز اوسته ثنالی آنام دوشور یادیما  
 بولود دولاندا یاغیش یا غدیراندا گلزاره  
 گل اوزده اشگ زلالی آنام دوشور یادیما  
 گورنده لاله حمرا گلین سولوب سارالوب  
 سولان او عارض آلی آنام دوشور یادیما

اوشاق لیقیندا آناسندان ال ازوب تائب  
 یاناردیر که وفالی آنام دوشور یادیما

### حدیث کسا

سوزی شروع ایدورم نام کبریائیله  
 گوزل یازا قلمیم یاری خدائیله  
 یازوب خدا گتورم بعد مصطفا آدینی  
 دله صفا یارادام ذکر مصطفائیله  
 علی آدیله ویرم از کتایمه زینت  
 رضای حقّی یازام نام مرتضائیله  
 کسا حدیثینی تا رشته بیانه دوزم  
 بیان فاطمه خیره التّسائیله  
 بیله روایت اولوبدور جناب زهران  
 توکوبدی لعل و گهر لعل در زائیله  
 بو یوردی بیرگون آتام فوج انبیاء شرفی  
 محبت ایلدی بیر لطف منتھائیله  
 ایدوبدی رنجه قدم وارد اولدی منزلیمه  
 صفا یاراتدی ایویمده گوزل صفائیله  
 سلام ورد سلام اولدی ایتدی فرمایش  
 وجودیمی گورورم ضعف بر ملائیله

دیدیم پناه آپارام بابا من اللّٰه  
 بو حالدن بیله بیر ضعف غم فزائیله  
 بویوردی صبرایله صبریله بردبار قزیم  
 گتور وجودیمی مستور قیل کسائیله  
 گیدوب گتوردوم او ساعتده بیر عبا ایتدیم  
 بابام وجودینی مستور اول عبائیله  
 جمالینه ایلدیم فاطمی گوزیله نگاه  
 ایشیقلا نوردی درخشنده عارضی چون ماه  
 ایدردی جلوه اونوعی بابام تجلاسی  
 که محو ایدردی منی بیر نظر تماشاسی  
 او حالیددی بابام از بالام حسن گلدی  
 حسن جمال حسن خو او وجهه سیماسی  
 سلام ویردی دیدی چوخ وقاریله آناجان  
 مَشام جانه گلور جدّیم عطر زیباسی  
 دیدیم دوتوبدی ایوی آری جدّیوین عطری  
 یاتوبدی تحت کساده او دهر مولاسی

بالام حَسَن گیدوب اوز جدّینه سلام ایلدی  
 گیده او تحت کسایه اولوب تقاضاسی  
 آتام بویوردی گل ای سیّد شباب بهشت  
 بتول گلشنینون نوگل دل آراسی  
 اجازه صادر اولوب محضر پیمبردن  
 اله گلوبدی بالام مجتبا تَمَناسی  
 گیدوبدی تحت کسایه حسن جمال حسن  
 حسین گلدی باشندا بیر اوزگه سوداسی  
 دیدی آنا ایویمیز عطر جتّیله دولوب  
 بو جدّیم عطریدی من ایلورم بو احساسی  
 دیدیم که طاقت و صبریم گوزوم ضیاسی حسین  
 فروغ سینم اولان درد عشق داراسی  
 بلی یاتوبدیلا تحت کساده جدّویله  
 بالام حَسَن او ایکی مهر و حلم دریاسی  
 بالام حسین گیدوب جدّینه ویرویدی سلام  
 ویروب جواب سلامی پیمبر اسلام

اجازه ایستدی تحت کسایه گیسون حسین  
 خطاب قیلدی حسینیه او سید کونین  
 گل ای چکیده جانیم گوزل لرین گوزلی  
 صفای قلبیم اولان گوزلریمده نورالعین  
 گیدوبدی تحت کسایه بهشته زینت اولان  
 کنار جدینه روح بهشت امام حسین  
 حسین داخل تحت کسا اولوب ناگاه  
 گلوب علی ولی قهرمان بدر وحنین  
 مخاطب ایتدی او مولا حسن حسین آناسین  
 گلور مشامه جنان عطری بانوی دارین  
 بو عطر عطر پیمبردی دولدوروب بو ایوی  
 مگر گلوبدی بو مأویه سیدالثقلین  
 جواب ویردیم اونا ای شه ولایت علی  
 یاتوبلا تحت کساده بابا میله حسنین  
 آلوب کنارینه دین باغبانی گل لرینی  
 ویروب نفس نفس نور حقیله نورین

سلام عرض ایدوب اذن ایستدی پیمبردن  
 گیده او تحت کسایه او سید حرمین  
 آتام بویوردی که ای چشم مستی عین الله  
 گل ای اولان منه مُطلق مُتورالعینین  
 اولوبدی داخل تحت کساوئی خدا  
 اولوبلا جمع علی و حسن حسین طاها  
 روایت ایلوری گویا بیله خانم زهرا  
 که گوردوم اولدیلا جمع اهلبیتیه طاها  
 همین کسایه طرف شوق و ذوقیله گتدیم  
 که منده ملحق اولام اهل بیتیه باباما  
 بابام رسول خدایه سلام عرض ایلدیم  
 بویوردی رأفتیله السلام یا زهرا  
 دیدیم بابا وار اجازه سیزه اولام ملحق  
 کمال مرحمت و لطفیله بویوردی بلا  
 کناره گتمه گوزومدن قزیم کناریمه گل  
 دلیمده صبر دیزیم طاقتی گوزیمده ضیا

گل ای طلیعۀ عفت خانم لارین خانمی  
 قوای جانیم اولان پاره تنیم زهرا  
 گیدوب او تحت کساده قرار دوتدوم من  
 او پنج تنله کساتاپدی رتبه اعلا  
 محمد (ص) و علی فاطمه گل اوزلی حسن  
 حسینده سایلوب پنجمین اهل کسا  
 او بش وجودیله تحت کسا اولوب روشن  
 اولار بنو علتیله آدلانوبلا آل عبا  
 همین که انجمن ایتدی او پنج تن با هم  
 اولوندی رشگ بهشت برین اول ماوا  
 عبانین هرایکی سمتیندن افتخار رسل  
 ایکی الینی دوتوب آسمانه ایتدی دعا  
 نجه دعا اونون اجمالی شوق مشروحو  
 دعا ایدن اوزی محبوب حق دعا روحی  
 آچوبدی لعل گهر بارینی رسول الله  
 گوزینده اشگ فرح عرض قیلدی یا الله

بو اهل بیتیمی حفظ ایت ازون بلایادن  
 بولار دیلار منه دلجو بولار دیلار دلخواه  
 بولاردی زنده ایدن لر جهاندا حُرمتیمی  
 بولار ایدلله حمایت منه بلا اکراه  
 بولاره ایلسه هر کس اذیت و آزار  
 منه اذیت ایدویدور اوشوم روی سیاه  
 غمین ایدن بولاری ایلوب منی غمگین  
 بو خاطریم اولی رنجیده اول بو حاله گواه  
 اтім قانمیدی بدنده بو اهل بیت منیم  
 عزیز جاندیلا جسمیمده یا عزیز الله  
 بولار رضا اولاهر کیمسه دن رضا اولام  
 که هر طریقه ده بونلار دیلار منه همراه  
 بولاری دوست دوتان لاره دوست اولام من  
 اولاره من ایدرم دوستی گوزیله نگاه  
 بولاره دشمن اولانلاره دشمن اولام من  
 جزا گونی قورولان دمده دادگاه اله

بو چارتن دی منه اهل بیت یا ذوالمن  
 بو دورد نوریله بو گوزلریم اولور روشن  
 بودورت وجود بو عالمده جسم و جانیمدور  
 بودورت وجود منیم راحت روانیمدور  
 منه بِمَیْزَلَهٗ نَفْسُدور عم او غلوم علی  
 بتول دیزده اولان طاقت و توانیمدور  
 قرار و صبر دلیمدور بو مجتبابی صبور  
 او گل جمالی صفا بخش گلستانیمدور  
 بالام حسیندی مندن منم حسینمدن  
 یوزی طلیعهٔ عزت عزیز جانیمدور  
 بولاره لطفوی احسانوی ایله شامل  
 بولار طریقهٔ قرآندا جانفشانیمدور  
 بولاردی مردمک دیدۀ جهان بینیم  
 بودورت وجود منیم شمع دودمانیمدور  
 یتشدی جانب حقن ملک لره بوندا  
 باخون گورون نجه همدور دوستانیمدور

بولاردی نورلری نور بخش شمس و قمر  
 منیم یراوسته بولار آیت و نشانیمدور  
 فلک ملک مه و خورشید و جمله ذرات  
 گلوب ظهوره منیم قدرت نهانیمدور  
 جهانیان بولارین یمنینه اولور مَرزوق  
 او یمن لَرکه جهان ریزه خوار خوانیمدور  
 اولار هامی بولارین خاطرینه خلق اولونوب  
 بولار سرآمد هر خلقت جهانیمدور  
 بو اهل بیته طفیلی دی جمله موجودات  
 قوام و لنگر ارضیله آسمانیمدور  
 سوروشدی روح الامین بو عجب معمادی  
 بو امری صورته سال ای خدا نه معنادی  
 اولار که تحت کِساده یاتوب اولار کیم اولا  
 گلوب جواب که تحت کِساده زهرادی  
 آتاسی همسری اوغلان لاری حسین و حسن  
 اونیه اوردا - او انوار خَمسه پیدادی

اجازه آلدی خدای جلیلدن جبریل  
 گلوب گوره که یراوسته بونه تجلادی  
 یتشدی وارد اولوب دودمان زهرایه  
 گوروب که اوزگه بیر عالمی اوزگه غوغادی  
 بتول منزلین انوار خمسه چولقالیوب  
 بیر اوزگه منظره وار قابل تماشادی  
 دیدی کمال ادبله که یا رسول الله  
 ازل حضوریه عرضیم سلام یکتادی  
 ایکیمچی عرض که فرمایش ایندی ربّ جلیل  
 که ممکناتیمه غائی کلّ طاهادی  
 قسم جلالتیمه خلق اولان هامی عالم  
 بو ما خلق بو هامی کوه و پهن صحرادی  
 بویر بوگوی بو فلک شمس و ماه خلق اولونوب  
 فقط بخاطر طاها و آل طاهادی  
 اجازه ایستدی روح الامین رسول نبیل  
 مُجاز قیلدی کسا تحتینه گیده جبریل

دوباره عرض ایلدی جبرئیل پاک ضمیر  
 که ای رسول خداوند لاینام و خبیر  
 نوید اولاسیزه کیم تازه بیر پیامیم وار  
 سیز اهل بیته اولوب نازل آیه تطهیر  
 آچوب او دمده علی لعل لعلبارلرین  
 خطاب قیلدی ادبله اوشاه خبیر گیر  
 ندور بو تحت کسا سرتی یاندور منظور  
 بیان قیل منه پیغمبر بشیر و نذیر  
 ویروب جواب پیمبر که یابن عمّ علی  
 ازی ایدوبدی منی انتخاب حیّ قدیر  
 بشر نجاتینه مأمورم امر یزداندور  
 گهی نذیرم و گاهی جهانیانه بشیر  
 یراوسته شیعه لرون قورسا مجلس دینی  
 اولالا جمع او مجلسده هر صغیر و کبیر  
 سالالا اوردا حدیث کساء صحبتینی  
 فرح ایدر ایشیدن وقتده جوان اولا پیر

همان او مجلسه رحمت نزول ایدر گویدن  
 ووراللا حلقه ملکلر چو حلقه زنجیر  
 او اهل مجلسی ایلر دعا ملائک اودم  
 گچر گناه لریندن خدای عذر پذیر  
 شه ولایت او ساعتده تاپدی وجد سرور  
 توکوب سرشگ فرح باشدا بیر همایون شور  
 دیدی که بو خبریله یتویدی لطف خدا  
 که رستگار اولاجاق شیعه واردی تادنی  
 دوباره باشلادی داد سخن رسول الله  
 او لعل لبلیله توکدی لولوء لالا  
 بو یوردی آندا اولای بیر خالقه که سجدی منی  
 رسالتیم هامو آفاقه سالدی صیت وصلا  
 اورکلرین غمی زایل اولار گلر شادی  
 او مجلسی که اول صحت حدیث کسا  
 ایله صفا و فرح بخشدور حدیث کسا  
 که صحبتین ایشیدن قبلر تاپالاً صفا

او بزنده بیرسی حاجت ایسته سه بی شک  
 او خاطره ایدر الله ذوالجلال ادا  
 رسولدن صورا سوز باشلادی ولی خدا  
 نه سوز که آینه دللره یتوردی جلا  
 بو یوردی بو خبریله تمام شیعه لری  
 جهان ده ایده جاق رستگار ذات خدا  
 یتر سعادت دنیا و آخرت اولارا  
 دیوب پیمبره وحیاً خدای ارض و سما  
 همین رسول خدای اونون کنارینده  
 اولوبلا جمع او تحت کسایه آل عبا  
 یتشدی سوز بورا گندی دوباره شوره منی  
 مجسم ایتدی بو چشم دله بو منظره منی  
 همین او تحت کساده او مجمع انوار  
 گلور خیاله بو ترتیبیله دوتوبلا قرار  
 پیمبرین یاتا جبریل ایاقی آلتندا  
 ایده رسول خدایه ارادتین اظهار



صاقیندا شیر خداوند لایزال علی  
ولی حق یدالله حیدر کرّار  
صولوندا اُزقزی زهرا او جوهر عقت  
حسن حسین آناسی او عصمت دادار  
گل بهشت بالاسی حسن باشی اوسته  
حسین یاتدی گوراخ هاردا یا اولوالابصار  
حسین که جدینه دلبردی سوگلی یارب  
مگر سالارمی اونی گوزدن احمد مختار  
آلاردی سینه‌سی اوسته اُپردی ایگلردی  
آلاردی چیگنینه فخریله مَفخرِ الآخیار  
دیسیم غلط دگو گلدی محبتی جوشه  
آچوبدی قوللارینی مهریله او قطب مدار  
که یعنی چوخ سُوه سن سینم اوسته ناز ایده سن  
سرور سینم اولان خوش خرام و خوش رفتار  
بو نوع صاق صولا حسرتله باخما سینه مه گل  
حسینی سینه سینه آلدی سیّد ابرار

همین حسین که آلاردی رسول سینه سینه  
نجه روادی ساللا تویراق اوستونه اشرار  
بدن یارالی باشی یاره اللری یاره  
ستمله آت چاپالار نَعشی اوسته یاقهار  
او باش که سینه زهراده ناز ایدردی مدام  
نجه روادی که تاپسون او کولر اوسته قرار  
همین پیمبر رحمتدی سیّدالثقلین  
همین علیدی همین فاطمه همین حَسَنین  
اولوب او پنج تنه حق بو حرمتی قائل  
نَدندی حقلرینی اشقیا ایدوب زایل  
ازل پیمبره گزلین خیانت ایلدیلر  
اونور علمی خموش ایستدی توده جاهل  
رسول حَقّین اولونموب جنازه سی هله دفن  
سقیفه مجلسینی قوردی فرقه باطل  
دانوبلا آیه اَکملتای ایتدیلر شورا  
سانوبلامر الهی نی باطل و عاطل

جفا الیله علی نی ایدوبله خانه نشین  
 قالوب ایگیمی بش ایل ابوده خسرو عادل  
 گوزینده قُم بوغازیندا سوموک قالان لارتک  
 خدا بولور نجه دوزدی او سرور فاضل  
 اوگونده مزرع دینه سپیلدی تخم نفاق  
 گتوردی ملت اسلامه تفرقه حاصل  
 همین نفاق همان تفرقه اولوب باعث  
 که مسلمینه بوگون ال تاپوبدی اسرائیل  
 اوگونده امت قرآنی ایتدیلر گمراه  
 که ستر باطلیله حقه گتدیلر حایل  
 ایله یاراتدیلار دریای کفر طوفانین  
 که ایتدی دیده اسلامیاندن ساحل  
 بونار تفرقه باقیدی فتنه انگیزان  
 اگر چه باهم اولوبلار جهنمه اصل  
 و لیک ملت اسلام او آتشیله یانور  
 هانی او ال گله بو آتشی ایده زایل

گرک گلوب ایده خاموش حجت قائم  
 اونون الیله سونر بیله آتش هایل  
 گچوب وفات رسول کرامدن اوچ گون  
 توکولدولر در زهرایه مردم غافل  
 بو قصدیله ورالار اود یانا علی قاپوسی  
 همین قاپو که ادبله ملک اولوب نازل  
 دیدیله هم ایوی هم اهل بیٹی یاندیروخ  
 خلیفه نی ایدروخ از مرامینه نائل  
 او ابوده سانما دیلار مرتضی و زهرا وار  
 اولارا کوثریله هل آتی اولوب نازل  
 او بیتده اوتوران لار گل بهشتدیلر  
 او ایوده وار حسنیه حسین دریادل  
 علاوه واردی ایکی خرده نازیروور قز  
 بلالی زینب و کلثوم زار و شیرین دل  
 وریلما سیدی گراوت دودمان زهرایه  
 حسین خیامینه یاغمازدی آتش وابل

### خانه نشینی حضرت علی (ع)

وریلدی اوت ایله بیر محترم قاپویاندی  
 پیمبرین قزی هم یاندی هم یارالاندی  
 او صدمه که یتوب اول ماجراده زهرايه  
 همین او صدمه ئیله گیتدی دار عقبایه  
 بتول گیتدی علی پشتوانه سیز قالدی  
 وسیع عالمی تنگ ایتدیلر او مولایه  
 واریدی فاطمه نین جاندا تا قوری نفسی  
 بلی امیدیدی اول شهریار زیبایه  
 بتول گیتدی الیندن علی نی تک قویدی  
 ایاق گوتوردیله اول تاجدار دنیایه  
 ایرمی بش ایل او مظلوم قالدی خانه نشین  
 تحمّل ایلدی اندوه تاب فرسایه  
 بیر اهل دل تاپا بولمزدی درد دل ایتسون  
 گونوز گونه گجه لر دردینی دیدی آیه  
 گهی گونه گهی آیه گهی گیدوب چاهه  
 دیردی دردینی اشگی آخاردی سیمایه

توکردی گوز یاشی گوز یاشینی سیلن یو خودی  
 ویرن تسلّی تاپیلمازدی اول دل آرایه  
 خلافتینده منافق لر اولدی کارشکن  
 مخالفت ایلیوبلر وصّی طاهایه  
 مقام رزمده نامردلر شکست یدی  
 او مرد قتلینه نقشه قویولدی اجرایه  
 منافقین ایلدی ابن ملجمی مأمور  
 نماز اوسته تاپوب ال ولی یکتایه  
 قلجانوب باشی مسجده سجده گاهینده  
 او کس که بیت خداده گلوبدی دنیایه  
 بویوردی آند اولا اللّٰهه راحت اولدوم من  
 او ضربتیه عروج ایتدی قدس اعلايه  
 قوتاردی ثالث آل عبا ملالتینی  
 ایشیت او رابع اهل کسا مصیبتینی  
 اولوب امام حسن روبرو فشاریله  
 یتشدی عمری باشا رنج وانزجاریله

### زبان حال حضرت امام حسن (ع)

مناققین آتاسندان صورا او مظلومی  
 مواجه ایلدیلر درد بی شماریله  
 سران لشکری - دینی ساتوبلا دیناره  
 خصومت ایتدیله مظلوم شهریاریله  
 او نور پاک الهی نی قویدولار یالقیز  
 گیدوب اولوبلا هم آهنگ اهل ناریله  
 امان ایکی اوزلی الیندن امان مناققدن  
 ییر همیشه چورک نرخ روزگاریله  
 گوروب خیانت ایدوللر اکابر لشکر  
 صلاح دین اله گلمز او کارزاریله  
 شئون شیعه گیدر داخلی خیانتیله  
 تاپوب طریق حَسَن حُسن ابتکاریله  
 گوتوردی ایله قدم تا توکولمیه قان اذر  
 قبول صلح ایلوب خصم حيله کاریله  
 بو درسی جدی رسول خدادن آلمیشدی  
 او صلح مگّهده کفار نابکاریله

مناققین تاپوب ال یاراتدیلار غوغا  
 که صلح ایدوبدی حسن خصم کردگاریله  
 ایدوبدی ساده مسلمان لاری او سوز تحریک  
 امامه ایتدیله توهین بد شعاریله  
 سالاردی دوستلری صلح صحبتین آریه  
 وراردی دل یاراسی لحن زهر داریله  
 دیر دیلر که مسلمان لاری ذلیل ایلدون  
 بو ابتکاریله بو صلح ننگباریله  
 صحابه سی توکولوب ایتدی خیمه سین غارت  
 بیری عمامه سینی گوتدی افتخاریله  
 وروب یخوب بیری سجّاده سین قاپوب آپاروب  
 امام دوشدی یوزی اوسته انزجاریله  
 جفایه باخ بیری پهلو سینه وروب خنجر  
 امام چکدی نه پهلو زخم داریله  
 او اگلشردی باباسین ایدردی سبّ خطیب  
 دُزردی سرور مظلوم اصطباریله

چنین اولار که اولاً سَبَّ اوغول یانندا آتا  
 برابریدی او بیردردی صد هزاریله  
 وروب ایاقینه یاره عصائیله اَعْمَا  
 امام او توردی یره غمله آه و زاریله  
 دیدی الهی هارام وارها را گیدوم نیلوم  
 هارا گیدم بو جفاوار بو دلفگاریله  
 قیتدی یثر به اوردا اولوب غریب وطن  
 قوتاردی عمر شریفین چوخ انکسارریله  
 حسیندن چوخ اولوب تائباً حسن مظلوم  
 گیت اوز مزارینی گور چشم اشگباریله  
 قالبودی گون قاباقدنا گوزل مزاری غریب  
 مدام زایره حسرتدی انتظاریله  
 او کسَلری که حسن صلحینی سانالاً بعید  
 نه سَری وار اونی درک ایلمز له بی تردید  
 حسن او صلحیله بیر فتح کارزار ایلدی  
 سیاست اهلنی مَرهونِ ابتکار ایلدی

### گریز به عاشورای حسینی (ع)

قیام ایدردی حسین تک حسن مرامیدی  
 همین مرامینی حکمت وار استتار ایلدی  
 او صلح کرب وبلا نهضتین فراهم ایدوب  
 حسین مرامینی بو صلح پایدار ایلدی  
 او صلحیله یتشوب رشده اهل عاشورا  
 حسین نهضت اسلامی بر قرار ایلدی  
 قورولدی طَنْطَنَه رستخیز عاشورا  
 حقیقت اهلی مجازیله کارزار ایلدی  
 حسین یغوب باشایتمیش ایکی سَلْحَشوری  
 بلا چولونده اوگون محشر آشکار ایلدی  
 او آز جماعتیله کاخ آل سفیانی  
 وروب یخوب داغیدوب پوزدی تارومار ایلدی  
 حَسَن دین تک حسینی سیاستیله حسین  
 بنی امیّه نی رسوای روزگار ایلدی  
 آل اوزدی راه خداده علیّ اکبردن  
 فدای دین خداوند کردگار ایلدی

عزیز قارداشینین یادگاری قاسمی ده  
 علی اکبره همراه و همقطار ایلدی  
 دیمیشدی قاسمی سچمه علی اکبردن  
 همین او امره اطاعت او شهریار ایلدی  
 وفالی قارداشی عبّاسدن الین اوزدی  
 ازون جنازه سی اوستونده سوکوار ایلدی  
 یخلدی سروکیمی سرو قامت عبّاس  
 کنار غلغمه نی قانلو جوویار ایلدی  
 الی پلینده حسین سسلینده و عبّاس  
 اونون او حالی هامی قلبی داغدار ایلدی  
 گوروب که یوخدی قالان جان نثار اولانلاردان  
 علی اصغرینی زینت کنار ایلدی  
 گتوردی ال لری اوسته اونودا اوخلادیلار  
 او صحنه دیده تاریخی اشگبار ایلدی  
 حسین مرامینی حلق لطیف قانی ئیله  
 جهاندا زنده جاوید او شیرخوار ایلدی

بو سود امر بالانین سَهْمی چوخدی نهضتده  
 ازی صغیر ولی خدمت کبار ایلدی  
 باخوب بابا سینا لبخندیله دوشوب مدهوش  
 جهان گوزین ازونه جلب او هوشیار ایلدی  
 ایدوبدی قانیه تاریخ کربلانی گواه  
 کلام حق کیمی دارای اعتبار ایلدی  
 حسین او گللری ویردی خزان اسلامی  
 صفا گتوردی صفاخیز نوبهار ایلدی  
 حسین فدالری قانه بویاندی لاله کیمی  
 او پاک قان لار او صحرانی لاله زار ایلدی  
 او لاله زاره باخوب باغبان گلشن عشق  
 یارالی قلبینی حسرتله داغدار ایلدی  
 گوروب که یوخدی قالان بیر باشی بدنده قالور  
 باشینی باشدان ایده سعی او شهریار ایلدی  
 ویروب قلع دمینه مرتضا کیمی باشینی  
 آتا سینا تبعیت او شهسوار ایلدی

باشی یاریلدی نچه ضربتیه اول شه دین  
 باشندا یاره لری تاج افتخار ایلدی  
 باشی یارالی یخیلدی یارالی مقتلینه  
 نماز اوسته دوشوب شکر او تاجدار ایلدی  
 توکولدی قانی دوشن یرده یازدی یا محبوب  
 او ذکر دلده جانین دینینه نثار ایلدی  
 حسین پنجم اهل کسائیدی که قتیل  
 سویون یانندا سوسوز توده شرار ایلدی  
 او مقتلی که یخلمیشدی سیدالشهدا  
 او یرده تازه لُتوب تازه دن حدیث کسا  
 ستمله خامس آل عبا اولاندا قتیل  
 او جالدی نه فلکه فرشدن نوای عویل  
 دو تولدی گون قره یل اسدی قویدی بیر طوفان  
 اولوب بلا چولی صحن قیامته تبدیل  
 گلوبله عالم معناده کربلا چولونه  
 ولی حق حسن و فاطمه نبی نبیل

باخوب نه گوردیله پرپر دوشوب گل زهرا  
 آخوب یارالارینین قانی چول اولوبدی مسیل  
 حسینی آلدی آرایه او یرده آل عبا  
 دوباره اهل کسا مجلسی تاپوب تشکیل  
 قاریشسون اهل کسایه سیاق سابقیه  
 نزول ایتدی حسین وای دیه دیه جبریل  
 یغیشدی بیر یره دورهم اولدی اهل کسا  
 ویروبله سس سسه گوزیاشارین ایدوبله سیل  
 باخوب حسینی زهرا دیردی یا ابا  
 سالور عزیزبوی نه حاله گور سپاه ذلیل  
 توکنده گوزیاشی زهرا دینده وای بالا وای  
 سیلردی اشگین آتاسی جهانیا نه دلیل  
 اولوب حسینه عزادار یرده اهل کسا  
 دو تولدی گویده عزا اهل عرش ربّ جلیل  
 بو پنج تن آدی باب نجات دور تائب  
 او بش وجوده خلوصیه سال ازیوی دخیل

حسین قتلگهین گز تا پوب بو پنج تنی  
 آتک لرین دوت اولار مشکلاتوه تسهیل  
 بالان مریضدی جراح لر الینده قالوب  
 سنی ایدوب نگران چوخ بیر ایله امر مهیل  
 قسم ویر اکبر شهزاده نین جوان جانینا  
 چوخ ایستر اکبر احمد مثالی آل خلیل  
 پچاق دمیندن آلوب چوخ سلامت و سالم  
 یقین ویره لله جوان اوغلوی سنه تحویل  
 بو پنج تن آدی ویردی نجات ابوالبشره  
 همان مقام لری واردی تا پیوب تقلیل  
 شفا آلاآ سنون ده جوانوه حقدن  
 بو عمر خدمتوه لطف ایده لله اجر جزیل

حسین عزاسینی از جدی باشلیوب نائب  
 گلونجه حجّت قائم محال اولا تعطیل

### در ولادت امام حسین و قمر بنی هاشم (ع)

خبر یتشدی حضرت طاهایه  
 زهرا ایوی تا پموش عجب پیرایه  
 بیر تازه گل آچوب علی باغینده  
 یعنی حسنینون گلدی بو دنیایه  
 حسنینون تولدی مبارک مبارکدی مبارکدی مبارک

یا محمد (ص) آیدین اولسون دو عینون  
 احسان ایدوب خلاق مشرقینون  
 زهرایه بیر گل اوزلی تازه مولود  
 هامو گوزلردن گوزل حسنینون  
 حسنینون تولدی مبارک مبارکدی مبارکدی مبارک

یتدی فرح رسول بی همتایه  
 اولدی روان دودمان مولایه  
 حسنین آلدی عطرین لبخندیله  
 سلامدن صوراییدی زهرایه  
 حسنینون تولدی مبارک مبارکدی مبارکدی مبارک



حسین و زهرا یه سالوب تاگوزین  
مخاطب ایلدی رسول اوز قزین  
آلوب کناره گون سهیل اولدوزون  
سرور یله تکرار ایدوب بوسوزین  
حسینون تولدی مبارک مبارکدی مبارک

دیددی حسین حبیب لم یزلدی  
گوزل یوزی طلیعه ازلدی  
چوخ چوخ گوزل گلوب گیدوب دنیادن  
اما حسینیم هامودان گوزلدی  
حسینون تولدی مبارک مبارکدی مبارک

انگیزه مهر و وفا حسیندور  
آئینه صدق و صفا حسیندور  
حسین مندندی منم حسیندن  
آدی دوا ذکر ی شفا حسیندور  
حسینون تولدی مبارک مبارکدی مبارک

شعبان اوچونده عشق شاهی گلدی  
شاهین دالنجا سر سپاهی گلدی  
دیـماقا تهنیت امّ البـنینه  
دلده بوسوز کربلا شاهی گلدی  
عباسون تولدی مبارک مبارکدی مبارک

بونور دیده گوهـر پاشیمدی  
غم گونونده یاریمدی یولداشیمدی  
محبـتیم جوشور داشور گورنده  
قانی ایسی وفالی قارداشیمدی  
عباسون تولدی مبارک مبارکدی مبارک

آیدی علی او با صفا الیندن  
او سرو قامتی رسا الیندن  
آیوب دیدی بو آلدی کربلا ده  
دوتان غریب کربلا الیندن  
عباسون تولدی مبارک مبارکدی مبارک

### حضرت سیدالشهداء (ع) و معنویت او

بزم عشاقده پیمانہ درخشان اولدی  
 نور باده یله دل خانه درخشان اولدی  
 تا محبت آلی گل لر باشینا چکدی صبا  
 بوته گل اوینادی گلخانه درخشان اولدی  
 توکدی هر گوزیاشی کیم گریه مستانه یوزه  
 اولدی بیر گوهر یکدانه درخشان اولدی  
 دوتدی تا جام بلورینی الینده ساقی  
 گون اولوب ذره سی پیمانہ درخشان اولدی  
 یتشوب فیض صمد سندی صنم لر یکسر  
 چخدی قرآن گونی بتخانه درخشان اولدی  
 قدمین قویدی علی کتف رسول الله  
 پارلانوب مهر نبی شانه درخشان اولدی

دوره تارده - نامرد قبایلینده حسین  
 سالدی بیر طلعت مردانه درخشان اولدی

ایله بیر شمع محبتدی حسین ابن علی  
 اولدی هرکس اونا پروانه درخشان اولدی  
 نور ایمنایدی ایمانیه ایمان اوسته  
 کربلاده بویانوب قانه درخشان اولدی  
 جوهر عشقیدی عشق اوسته باتوب آقانه  
 دوندی بیر گوهر غلطانه درخشان اولدی  
 نوری یتیمیش ایکی تن یکتن او (گوندن) آلدی  
 سپیلوب صفحه میدانہ درخشان اولدی  
 تارثارالله آخوب کرب و بلا تو پراقینی  
 دوندروب لعل بدخشانه درخشان اولدی  
 گون کیمی باتدی تجلای جهان پیماسی  
 دوشدی بو عالم امکانہ درخشان اولدی

اولدی درویش در حضرت زهرا تائب  
 تاپدی آل طالع رخشانہ درخشان اولدی

### زبان حال حضرت مسلم (ره) در کوفه

کوفه شهرینده یاغور قان الله  
دیوری ملّتی قان قان الله  
الدوروللر قوناقی ئل لریندن اوزاقی

دوتمیوب گبرده بیله سیاقی  
قوغا ایودن چاغیریلیمیش قوناقی  
الدوره بیر وطنیندن اوزاقی  
ایلیه قانینه غلطان الله

منله غم من غم و دردیله و آرام  
وارغم غربتیه دلده یارام  
دوندیریم من هارا یوز واردی هارام  
قالمیشام واله و حیران الله

قوم بی دانش وبی فوز و فلاح  
بولوری قانیمی عالنده مباح  
قانیمی توکماقا آل لرده سلاح  
آختاروللار منی هریان الله

گورمیوب ایمدیه دین چشم فلک  
میزبان اوز قوناقین ترک ایده تک  
میزبان نه اولی کوفیلر تک  
نه اولار من کیمی مهمان الله

بیر باشیمدور ولی مینلر مُحَنیم  
نه ئلیم واردی نه داددیتسنیم  
یالقزام یوخ سَسیمه سس ویرنیم  
گَزَرَم شهری هراسان الله

واردی دردییم کیم ایدر درمانیمی  
قورتارار درد و بلادن جانیمی  
قانلیلار آختارور ایچسون قانیمی  
واردی چوخ قانیمه عطشان الله

غم غربت یازیلوبدور آدیما  
دوشوری یثرپ و بطحا یادیما  
ئل قبیلیم هانی گلسون دادیما  
دُونَه اُمّیده بو حرمان الله

نَقْدَر دَرْد و بَلایه دایانیم  
 قان یاغان شهری نقدری دولانیم  
 وار کیمیم سایه دالدالانیم  
 تاپوم اَمْنِیتَه امکان اللّٰه

صبریمین خرمنی برباد اولدی  
 آغلادیم دشمن دین شاد اولدی  
 آشنالر دولانوب یاد اولدی  
 بیله دور عادت دوران اللّٰه

درد آلان اولسا گِره دلدن آچار  
 سوز آلان اولسا سوز اهلی سوز آچار  
 لیک آدامسیزدان هامی خلق قاچار  
 بی کسَم حالی پریشان اللّٰه

تنگدور عالم امکان گوزیمه  
 آشنا یوخ قولاق آسون سوزیمه  
 همدمیم یوخ دانشوب اُز اُزیمه  
 گیدیرم هر یانا گریان اللّٰه

وارنه حالیم نه ئلیم وار سچسون  
 آز قالور شمع حیاتیم گچسون  
 آختارور قانیمی قاتل ایچسون  
 دادهیت خالق سبحان اللّٰه

صبروادار ایلیوب صبره منی  
 رام ایدوب هر ستم و جبره منی  
 کیم ایدوب دفن قویار قبره منی  
 کیم دوتار شام غریبان اللّٰه

گر اَلَم آغلیانیم یوخدی منیم  
 سینه سین داغلینیم یوخدی منیم  
 گوزیمی باغلیانیم یوخدی منیم  
 حسرتیله ویررم جان اللّٰه

تائبم غرقه دریای گناه  
 نامه می جرم لر ایلوبدی سیاه  
 دُوندروب درگهوه روی پناه  
 ایسترم نُسخه غفران اللّٰه

## نصایح و گریز به عشق امام حسین (ع)

سینه ده دشمنله صلح ایستن صفا پیدا اولار  
داش اوتیلله نرم اگر اولسا دوترمینا اولار

یاريله هم صحبت اولماق دولت جانبخشدور  
ای خوشا بیر عاشقه معشوقيله تنها اولار  
خودنمالیقدان گوتورال غرق بحر رحمت اول  
گر آزوندن قطره آل چکسه دونر دریا اولار  
پرتو خال نگاریم گوزلری خیره ایدر  
ذره کوی دلبریمده شمس نور افزا اولار  
جاهلانه سوز دینلردن خطا چوخ باش ویرر  
اوخ کماندان آیری قورتولسا اگر رسوا اولار  
حیرت دیدار اولان یرلرده یوخ صوت و صدا  
بولمورم آئینه ده طوطی نندن گویا اولار  
بیر یومورتا اوسته مرغ خانه مین فریاد ایدر  
ساکت و سس سیز صدف گنجینه دریا اولار

هرکسی سالسان ایاقدان گر هوای نفسیله  
طی راهوندا سنه سنگ ره صحرا اولار  
پرده ده گزلین اوتور ماق لیق سزادور عورته  
مرد گزلمز قرانلیق پرده ده پیدا اولار  
آل حسین ابن علیدن درس عشق و عاشقی  
عشق یاره کیم حسین تک عاشق شیدا اولار  
نقد جان الده گلوب بازار عشقه سویلدی  
عشق بازارینده نقد جانيله سودا اولار  
ماں و جانین عشق جانانه فدا ایتدی حسین  
نه بیله عاشق گلر دنیا به نه پیدا اولار  
قزلاریندان دویمادی آیریلدی گتدی سویلدی  
عشق اولان یرده فنا دنیا و مافیها اولار  
اولمیوب اولماز ایکی مهره مکان بیر قلبده  
بیر اورک بیر مهر ایچون بیر عشق ایچون ماوا اولار  
هم خدانی ایستوسن تائب همی خرمانی سن  
یا اولار مطلق خدا یا صحبت خرما اولار

### ورود به کربلا زبان حال امام حسین (ع)

بویردور کربلا صحراسی زینب  
بو دشتین وار بیوک غوغاسی زینب

بو صحرا وادی درد و بلادی  
بو صحرا بیر محلّ ابتلادی  
بو صحرا مدفنم دور کربلادی  
وار اوزگه عزّت عظماسی زینب

بویر دشت بلا کوی وفادی  
صفالی دللره دارالصفادی  
مریض عشق ایچون دارالشفادی  
سوزین وار صورت و معناسی زینب

بودشتین جلوّه جانانی واردی  
منایه بویرین رجحانی واردی  
سوسوز یتیمیش ایکی قربانی واردی  
که وار قربانگه زیباسی زینب

منانین هاردا وار بیله مناسی  
منانین هاردا وار بیله صفاسی  
منانین هاردا وار یتیمیش فداسی  
اولا بیله شرف داراسی زینب

وار اوزگه نشأ بو کوی وفاده  
هدفلر بیردی یتیمیش بیر فداده  
باتار قانه غلام و شاهزاده  
اساساً یوخدی استثناسی زینب

وفا شمعی اولار بوردا فروزان  
وفا پروانه سی یتیمیش ایکی جان  
اولالار بیر شرار عشقه سوزان  
بودور عشق و وفا ایماسی زینب

دوتار جَوّ فضائی ابر پیکان  
بولود تک یاغدی راقان دلدّه قان قان  
زمین کربلانی دولدورار قان  
ایدر بو دشتی قان دریاسی زینب

اوقانه غرق اولار وارسته جان لار  
 نه جان لار جوهر جان نوجوان لار  
 جوان لار نه جوان سروروان لار  
 ریاض عشق زیب آفزاسی زینب

شهیدان وفانین سرخ قانی  
 ایدر دامان دشتی ارغوانی  
 اولار بو سر زمین دین گلستانی  
 گلر عطر بهشت آساسی زینب

بو دشته گل‌میشم جان و سريله  
 گل اوزلی قاسم گل پیکریله  
 علی اکبریله اصغریله  
 یازام قاندان وفا طغراسی زینب

ویروب دل عالم قالوبلاده  
 آلوب جانه بلا لفظ بلاده  
 وفای عهد ایچون بو کربلاده  
 حسینین واردی عاشوراسی زینب

نه عاشورا بیوک غوغاسی واردی  
 نه غوغا شور نهضت زاسی واردی  
 نه نهضت اوندان دین احیاسی واردی  
 بودور عاشوریمین معناسی زینب

بوچولده اوخلانار شش ماهه اصغر  
 گل اوزلی قاسمی ایلله پرپر  
 ایچر جام شهادت اوغلوم اکبر  
 اولار مجنون غم لیلاسی زینب

سپهر هاشمی ده ماه تابان  
 ابوالفضلیم اولار جانانه قربان  
 دوشرقان دجله سینده قانه غلطان  
 یارالی قد سرو آساسی زینب

اولان پابند پیمان آلتیم  
 می وحدت ایچن باده پرستم  
 واریم دین نشه‌سی مخمور و مستم  
 قانیمدور عشقیمین صهباسی زینب

بو صحرادور حسین قانه باتان یر  
گوزوندن ماسواللهی آتان یر  
یارالی جسمیله یورقون یانان یر  
وار عشقیله سروسوداسی زینب

منه فیض شهادت وار یارالی  
سنه رنج اسارت وار بلالی  
بلایه من کیمی دوز ای وفالی  
صفا روحی وفا سیماسی زینب

بلاده سن شریک اعظیم سن  
باجیمسان هم آنام هم همدمیم سن  
من تُولسَم بوردا صاحب پرچمیم سن  
شکسته قلیمیم یاراسی زینب

آنام صبر ایلدی هر ابتلایه  
أزین ایتدی فدا دین خدایه  
آنام تک سنده صبر ایت هر بلایه  
اولان ای کربلا زهراسی زینب

فدای راه دین اولام بویرده  
قتیل اهل کین اولام بویرده  
کفنسیز من دفین اولام بویرده  
منه وار عزّت کبراسی زینب

اولار بویاتدیقیم یر خلقه منظر  
اولار سینم گلی شهزاده اصغر  
قوجاقیمده گلر هنگام محشر  
جزاده وار بیوک غوغاسی زینب

آلا اکبردن ایستر توشه قبریم  
ایاق آتدا آلار آغوشه قبریم  
شبیّه عرش اولار ششگوشه قبریم  
اولار چوخ رؤیت زیباسی زینب



ویروب جدّیم اوزی بیله بشارت  
گُللر شیعیان پاک طینت  
ایدهلر قبریمی بوردا زیارت  
اولاردی معرفت داراسی زینب

اگر چه تائباً چو خودور گناهون  
حضور حقه وار روی سیاهون  
اولالار روز محشرده پناهون  
حسین و کربلا زهراسی زینب

اولا تائب نقدری جاندا جانون  
حسینه آغلا توک اشگ روانون  
حسین امضا ایدر خطّ امانون  
گواه ایلر وفا سیماسی زینب

### احوال حضرت علی اکبر (ع) در وداع

علی ای شبه پیغمبر منیم صبر و قراریمسان  
سرور سینه حیدر سن ایستکلی نگاریمسان  
شبه روی پیغمبر علی اکبر علی اکبر

علی روح وفا سنسن شبیه مصطفاسن  
بوقلیمده صفاسنسن توانیم اختیاریمسان

گویول ملکین آلوب عشقین اورکده یر سالوب عشقین  
أزون گیتسن قالبوب عشقین منیم دل شهریاریمسان

سوزوم سن صحبتیم سنسن دیزیمده قوتیم سنسن  
اورکده طاقتیم سنسن منیم صبر و قراریمسان

عشیرم سن ثلیم سنسن سویدای دلیم سنسن  
گلستانیم گلیم سنسن منیم تازه بهاریمسان

منیم شوریده شوریمسن گوزیمده برق نوریمسن  
سروریم سن غروریم سن وجودیم اقتداریمسان

جهانیم دولتیم سنسن عزیزیم عزتیم سنسن  
جلالیم شوکتیم سنسن وقاریم افتخاریمسان

گوزل لر جمله بیر یانه گل اوزلوم سنده بیر یانه  
 منه دنیادی بیگانه فقط سن نازلی یاریمسان  
 چمنده سرو نازیمسن نهال اعتزازیمسن  
 دلیل امتیازیمسن جهاندا اعتباریمسان  
 جوان ماهروسنسن گل خوشرنگ و بوسنسن  
 دلیمده گفتگو سنسن بیان دُر نثاریمسان  
 علی دلدۀ شکیبیم سن سن ایستکلی حییبیم سن  
 حییبیم سن طییبیم سن جوان گلغداریمسان  
 بو سنیمده دُزوم سنسن گیلّم سنسن گوزوم سنسن  
 دانشسام هر سوزوم سنسن بیان شاهکاریمسان  
 گونوزلر آفتاییمسن گجمده ماهتاییمسن  
 حساییمسن کتاییمسن ادیب خوش نگاریمسان  
 منیم آشنام یادیم سنسن دوزوم سنسن دادیم سنسن  
 جهاندا هر زادیم سن خلاصه هر نه واریمسان  
 نجه سن دویماسان مندن ایله من دویمارام سندن  
 یتوب لیک امر ذوالمندن جهاده رهسپاریمسان

آنان زحمت چکوب هرگاه بیوتدی سن کیمی دلخواه  
 بوگونه فی سبیل الله وفالی جان نثاریمسان  
 علی هرگز دیمم گیتمه گیدوب مقصودیوه یتمه  
 ایاق ساخلا شتاب ایتمه جدائی اختباریمسان  
 اولوب شاه ز من راضی بابان راضیدی سن راضی  
 من اولام بی سخن راضی فدای کردگاریمسان  
 منه شایاندی ال اوزماق سنه قان دجله ده اوزماق  
 سنه الماق منه دُزماق فدای دادگاریمسان  
 قانون آخسا بو صحرایه دونه گلزار زیبایه  
 اُزوم گللم تماشایه صفای لاله زاریمسان  
 گیدورسن بزم جانانه دایان ای نازلی دردانه  
 وروم بیر زلفوه شانه که سن مهمان یاریمسان  
 گوتور تائب اله دفتر نگار ایت نوحه اکبر  
 بسوندور شبه پیغمبر دیسه نوحه نگاریمسان

زبان حال امام مظلوم بر بالین فرزندش حضرت علی اکبر (ع)

علی تقدیر بو شام اهلینون شقاوتی وار  
گلن وروب یارا سانموبلا چوخ جراحی وار

بو سروقدی ایاقدان سالان خیال ایتموب  
غریب آتا سینا بو قامتین قیامتی وار  
بهار عمر گُلمو پرپر اولموسان بیله  
نشان ویرور سنه خار جفا جسارتی وار  
دیوم بو پیکره گل - بیله پرپر اولماز گل  
ولی گلیله دولان گلشنه شباهتی وار  
بو گلشنین گُلی دور یاره سنبللی اوخلار  
گل اوسته شبنمی قاندور عجب طراوتی وار  
کتاب عشقدی جسمون ورق ورق داغلوب  
که هر ورقده صفا و وفا کتابتی وار  
گولن همیشه گُلمو - بیرده گول منیم یوزومه  
سنتق بو قلبه صفا ویر صفایه حاجتی وار

سزیلدوری یارالار تک به تک بو پیکرده  
بیان حاليله بیر بیر له یار صحبتی وار  
سزیلدوسان بوسزیلتون قراریمی آوری  
سزیلدادور منی ده قلییمه سرایتی وار  
بوسرو قدون اولوب نقش یرده صد پاره  
دوروب آتان باشون اوسته خمیده قامتی وار  
بلین بو کر آتاین رسمدور جوان اُلومی  
خصوص سن تک آدبلی بالا که شهرتی وار  
بیر آچ او نرگس مخموری باخ غریب آتاوا  
باخور یانا یانا گوزده سرشگ حسرتی وار  
علی او بیر باخیشون عمریله برابر دور  
فدا او گوزلره که مصطفا نظارتی وار  
گوزون یوماندا گوزومدن بو عالمی سالوسان  
بو عالمین داخی سنسین نه قدر و قیمتی وار  
گوزوم ایشیقی دیزیم قوتی صفای دلیم  
گیدر سنيله گوزوم نوری دل کدورتی وار

سن ال ایاق چالوسان داغلانور منیم اورگیم  
 همین او داغیله بو قلبیمون جراحی واری وار  
 بو داغ قلبده جان یولداشیمدی حشره کیمی  
 بیر ایله یاره دی نه مرهم و طبابتی وار  
 من ایمدی بولدوم اوغولسوز قالان آتانه چکر  
 یانار ئولر دیریلر دردینون صعوبتی وار  
 سرور و عشق و علاقم بو جسمده روحیم  
 سنه نقدر بولورسن آتان محبتی وار  
 گورنده روحیمی جان اوسته روحیم آیریلوری  
 باخان بو حالیمه سویلر که مرگ حالتی وار  
 نقدر اوخ وورولوبدور بو جسم شانسانه  
 علی تمامی سینین قلبیمه اصابتی وار  
 منیم بو عالمیمی درک ایدر جوانی اَلن  
 بولر غریب آتاوین نه ملال و محنتی وار  
 ایاقه دور آپاروم باغلاسون بی بون یاراوی  
 که یاره باغلاماچوخ اونون مهارتی وار

یقین گلوبدی باشون اوسته احمد محمود  
 که مَصْرَعونده رسول کرام نکهتی وار  
 پیمبر عطربنی آلام یخلدوقون یردن  
 مَشام جانین او خوش نکهتیله الفتی وار  
 کوروب سوسوزویروسن جان الینده کاسه سو  
 گلوب سنه گتوروب فکرت سقایتی وار  
 جوان اوغول گَزَه نازیله گوز قباقینده  
 آتانی محو تماشا ایدر صراحی وار  
 ایدردی محو تماشا منی گوزل یریشون  
 باخوب دیردیم الهی نه ناز قامتی وار  
 هزار حیف خطا کارلر یخوبلا سنی  
 دوشو بَسَن ایمدی ایاقدان کمال حسرتی وار  
 بو سرو قدون ایاقدان سالوبلاقان ایجره  
 اگر دوشم من ایاقدان دیمه ملامتی وار  
 سنی بو حاله سالان ظالم ایتمیوب انصاف  
 نه رَحْمَدَن خبری واردی نه مروتی وار

وروبدی قلبوه خنجر دگوب منیم دلیمه  
 قیام حشره کیمی قلبیمون جراحتی وار  
 گلردی جوشه محبت اُپم دیردیم ئوزون  
 اوغول یوزیندن آتا اُپسه آیری لذتی وار  
 حیا ایدوب اوتاناردیم دیردیم ئوز ئوزومه  
 بو امرین اوزگه مناسب زمان وفرصتی وار  
 مدام ایله مناسب زمانی گوزلردیم  
 اُپم اولعل لبوندن که چوخ حلاوتی وار  
 او حالی سالدیم اله حیف احتضاروندا  
 یوزون گوزون اُپرم کامیمون مرارتی وار  
 سوزه گلنده اولاردون دلیمده سر سختیم  
 سوزوم اولاردی بُئی مدام شهرتی وار  
 سکوت ایدنده قالاردون سوزوم کیمی دله  
 دله گلنده گوزردیم دلیمده کَرّتی وار  
 دوشردی یادیمه جدیم باخاندا گل یوزیوه  
 بو اکبریم دی دیردیم رسول رؤیتی وار

آتام علی کیمی باشدان قلعلیوبله سنی  
 آتام یاراسینا بو یاره نین شباهتی وار  
 اوغول ئوئنده آتا حال احتضاره دوشر  
 همین بو مسئله نین یوخ سوزی حقیقتی وار  
 او غول ئوئنده ویرلر آتاسینا تسکین  
 او امرین ایمدی ولی بوردا عکس صورتی وار  
 اورک یانور آخوری باشون اوسته گوزیاشیم  
 من آغلیاندا گولر دشمنیم شماتتی وار  
 نشان ویرورمنه اوغلان لارینی سعد اوغلی  
 او ظالمین نَقْدَر قلبینون قساوتی وار  
 دیمور که بال مگس دگسه گرسنار قلبیم  
 او داش اورک وروری داش نه پست فطرتی وار

ایاقه دوردوت الیمدن الیم عصاسی گیداخ  
 نه دیزده قُوّه نه قلییم توان و طاقتی وار  
 بی بون گوره آتائیله بالا گلور باهم  
 او گورماقین نگران قلبینه سکینتی وار  
 خلاص اولدون اُزون هم و غمّ دنیادن  
 آتان وحید قالور بیر جهان مصیبتی وار  
 بیزا زما<sup>ص</sup>ن صورا سنسیز دایانمارام گللم  
 منه شهادتین مژده شهادتی وار  
 بوصون نفسده دانش بیرسون ایشیدیم  
 شیرین دلیم سوزیوین آیری بیر حلاوتی وار  
 دگوبدی بیربیره مَخیمده عمّهلر آنالار  
 خصوص از آناوین خیمهده قیامتی وار  
 گراندی نائب آتایه جوان اوغول الومی  
 سنون جوانون اُلوب صبر قیلسان اجرتی وار  
 علی اکبره آغلا دوشنده یاده بالان  
 حسین عزیزیدی هر دلده ذکر و صحبتی وار

### زبان حال حضرت قمر بنی هاشم (ع) خطاب به امام مظلوم (ع)

نه عجب وقتده یتوردون اوزون منه شمس امامتیم قارداش  
 سیل گوزوم قانینی گوروم گل اوزون قالماسون گوزده حسرتیم قارداش  
 واردی بیر عمر اولموشام مشمول کرم و لطفوه عنایتوه  
 بیر غلامم ئولمده مدیونم متواضع اولان سیادتوه  
 دوشمه سیدیم ایاقدن بولوسن من گلردیم سنون زیارتوه  
 ایش بیله دوشدی دوشموشم یارالی دورماقا یوخدی قدرتیم قارداش  
 سن باشیم اوسته سن بودور جدون بیر سو جامی الینده دیده گلور،  
 وای اوغولوای دیه دیه آنامیز فاطمه قامتی خمیده گلور  
 مجتباده گلور ویره سنه سس آتامیز مرتضا علی ده گلور  
 پنج تن باشیمی اوجالدوبلار وار عجب اوج رفعتیم قارداش  
 چشم دل گوردی اوزگه منظره نی تادم آلدیم سوسوز دوداقوندان  
 باشیم اوسته گلور یارالی بابام باشیمی قوی یره قوجاقوندان  
 سرفراز ایت بو خاکسارون آتام محضرینده اُپوم ایاقوندان  
 تا گوره وار سنون یانوندا نقدر ادب اوسته رعایتیم قارداش

سن منه ویرموسن ادب در سین من ادب عالمیندن آگاهم  
 سن سپهر ادبه بیر خورشید منده نور ادب آلان ماهم  
 سنه سیر سلوک یولداشیم هر شدایدده سنله همراهم  
 سن بولورسن اوزون که واردی منیم نقدر قابلیتیم قارداش  
 دگو شایسته اهل مهر و ادب که نظردن ادب رسومین آتا  
 اوز نهادینده کی حقیقتینی دوندروب صورت مجازه قاتا  
 الی قوینوندا گوزده گوزیاشی شه ایاق اوسته سرسپاه یاتا  
 عفو قیل من دورانمورام ایاقا دورماقا یوخدی طاقیم قارداش  
 من سنون محضرونده دورماقیمی عزت بیر جهانه ساتمازدم  
 سیر ایدردیم همیشه گل یوزیوه سنی گوزدن بیر آن آتمازدم  
 ای ادب روحی بی ادب دگولم اختیاریم اولیدی یاتمازدم  
 نیلیوم چاره سیز یاتیردوبدور منی سانسیز جراحیتم قارداش  
 آتامیز مرتضا ولی خدا بویوروبدور که من یمت یرنی  
 او گورر جان ویرن زماندا منی گوررم من همان او جان ویرنی  
 گورورم چشم خونفشانیه آتامی من گورور آتامدا منی  
 دیر احسن سنی باشیم اوسته گوره شاه ولایتیم قارداش

باخوری شور عشقه منده آتام شوريله باشدا بیر همایون شور  
 گلوری جوشه مهر و عاطفه سی توکوری گل جماله اشگ سرور  
 گوروری هر بویوردوقون بیربیر جابجا ایتیمشم بدون قصور  
 که اولوبدور غریب قارداشیمما تا دم مرگ نصرتیم قارداش  
 ایتیمشم من یولوندا جانبازی بولموشم چون یولون وفا یولیدی  
 سن گیدن یولدا مرتضا یولیدی مرتضا راهی مصطفا یولیدی  
 مصطفا ره گشای رحمتدور یولودا ذات ک بریا یولیدی  
 قانیميله بو یولدا اوینا ماقیم اولدی رنگ سعادتیم قارداش  
 من کیمی زمره رعیتده کیمدی اولسون بیله سعادتمند  
 خاکسار محبت اولسون امام اونا ویرسون بیله مقام بلند  
 هاردا وار من کیمی غلام اولا عشق مولاسی گردنینه کمند  
 منی چکدی مقام بالایله او کمند ولایتیم قارداش  
 چوخ فراز و نشیب دنیانی گورموشم سیر روزگاریمده  
 تاپموشام لیک چوخ بیوک عزت صون نفس حال احتضاریمده  
 گورورم من ایکی امام دوروب گوزی یاشلو منیم کناریمده  
 مین لر ایل عمريله برابر دور بو زمانیم بو ساعتیم قارداش

گرچه آخر نفسلریمدی منیم زخمدارم شکسته حالیم وار  
 دوشموشم خسته اللریم الدن اوزولوب یوزده اشگ آلیم وار  
 ایکی دنیاده افتخار ایدرم که بو سینم دولی مدالیم وار  
 بولر اهل وفا مدال لریم اولی پاداش خدمتیم قارداش  
 شرح لفظ وفا و ایثاری یازمیشام یوزده اشگ آلیله  
 دوزموشم سینمه بو قدر مدال اوزگه بیر عشق و ایده آلیله  
 قورولان دمده شور حسر گلم اورا سینم دولی مدالیه  
 بوله لر خدمتیم قبول اولموش وار مدال لیاقتیم قارداش  
 من مه آل هاشم سن گون منده هر نور وار سندندی  
 من نیم وار نیم دیم دانیشام منده وار هر نه وار سندندی  
 خلق آرا هر نه افتخاریم وار منده کی افتخار سندندی  
 عزتونندی عزتیم قارداش دولتوندندی دولتیم قارداش  
 جان ویرنده اگرچه مُحترضه احتضارینده رنج و زحمتی وار  
 بیله جان ویرماقین منه اما زحمتی یوخدی بلکه راحتی وار  
 دیزون اوسته باشیم یوزونده گوزوم ویرورم جان کمال لذتی وار  
 شوریه وای اوغول دیر آغلار منه شاه ولایتیم قارداش

حفظ مشگ اوسته چوخ چالشدیم من اوخ یاغان حربگهده جان برکف  
 مشگیم اوخلاندی قولاریم گیتدی گوزوم اولدی خدنگ ظلمه هدف  
 هدف اوستونده پارچالاندی باشیم باشمین قانی اولدی تاج شرف  
 بیر غلام شه شریفم وار باشدا تاج شرافتیم قارداش  
 یخلاندا یره عقاب اوستن دیمورم گلدی نه بلا باشما  
 یاده دوشدی باشی یارالی آتام اوتوراندا منیم یارا باشما  
 سسلدی جان اوغول ابوالفضلیم الینی قویدی مرتضا باشما  
 زایل اولدی او ال قویولماقیله باشداکی زحم زحمتیم قارداش  
 منیم عالمده کاش مین جانیم اولای شاه عشق و جان جهان  
 مین بلالر سنون یولوندا گورم سنه مین یول اولام بلاگردان  
 یعنی مین دفعه لر ثولم دیریلیم سنه مین دفعه لر اولام قربان  
 قالا دللرده تا دم محشر منیم ایثار صحبتیم قارداش  
 آتامیز باشیم اوسته دل داغلار شوریه سینه داغلاماق یریدور  
 گوزلرین اشگیله دولان دمیدور اشگی رخساره باغلاماق یریدور  
 گل ویراخ سس سسه ایداخ ناله آغلاشاق باهم آغلاماق یریدور  
 درده دولموش بو غملو سینمده بوشالا جام محتیم قارداش



آقالیق ایلیوب آقالیقيله گوگلونی ریزه خوارویون آلدون  
 اوز و فاپرورون تاپوب قولسوز بوینونا رأفتيله قول سالدون  
 دویمادیم سندن ال اوزوب گیدورم لیک سن دشمن ایچره تک قالدون  
 قویمارام تک سنی مماتیمدن گر منیم اولسا مهلتیم قارداش  
 سن منی سر قطار عشق ایلدون دوشموشم لنگه لیک پا به گلم  
 سوسوز اطفالوه سوسوز سقا مشگینه قان دولان فُسرده دلم  
 نعشیمی خیمیه آپارما منیم دست خالی گیدنمرم خجلم  
 قزلارین من باخانمازام یوزینه حشره تک واردی خجلیتم قارداش  
 بولمور اطفال لشکر اعدا تیرباران ایدوبله صاق صولومی  
 یازماقا اوخلی مشگ تاریخین ایلیوبلر قلم ایکی قولومی  
 واقفم خیمهده قیامت وار گوزلوری تشنه قزلارون یولومی  
 باشیم اوستونده کاش بولمیهلر وار منیم نه قیامتیم قارداش  
 تائبین چوخ شکسته دور اورگی دائماً قلبینه صفا ایستر  
 واردی داغلار بویی اورک دردی دلده کی دردینه دوا ایستر  
 بیر جوان اوغلی وار مریض اونا دامنیمدن دو توب شفا ایستر  
 ایسته اللهدن شفا ویرسون اونا خلّاق عزّتیم قارداش


### زبان حال امام معصوم (ع) در بالین برادر

دورای وفالی قارداش یورقون یارالی قارداش  
 یالقیز قالب حسینون ئیلدن آرالی قارداش  
 آرخام ئلیم ابوالفضل سندی یلیم ابوالفضل  
 گلدیم آپم یوزوندن بیر سوز آلام سوزوندن  
 قارداش کمک لیق ایله تیری چکوم گوزوندن  
 اهل جفا بیلر اولموش قلم گل ال لر  
 قارداش من آغلینده طعن ایلیوب گوّلر  
 دلرده چوخدی سوزلر آغلار قالبودی گوزلر  
 سوجامی الدهه عطشان قزلار یولووی گوزلر  
 باشون کناره آلدیم قلبه شراره سالدیم  
 دورمرد با کفایت نامرد لینده قالدیم  
 جسمون سراسر اوخدی آل پیکرینده یوخدی  
 بواللرین حسینین بوینوندا حقّی چوخدی  
 ای جاندا چوخ یاراسی وارسانی یوخ یاراسی  
 تقوی گلی آچوبدور آتوندا اوخ یاراسی

بیر امتحان ویروبسن کونه تکان ویروبسن  
 بیر باخماقا فراته گوز ترجمان ویروبسن  
 اوخ یاغدی صاق صولوندان سن چخمدون یولوندان  
 بیر مشگ سویولوندا گچدون ایکی قولوندان  
 دردون منه غم اولدی صبر دلیم کم اولدی  
 دوشدون بیله ایاقدان بو قامتیم خم اولدی  
 آج بیر گوزون یارالی سویله سوزون یارالی  
 توپراق لارا بونوعی سورتمه یوزون یارالی  
 داغ آتدی بو دلیمده یاتام آدون دلیمده  
 سندن الیم اوزولدی قالدی الیم بلیمده  
 وصفون بیانه گلمر سایدیقجا سانه گلمر  
 سن تک وفالی قارداش بیر ده جهانه گلمر  
 قزلار مراره چاتماز یاددان سنی چخماتماز  
 یاندون یارالی قزلار آسوده بیر ده یاتماز  
 کامه عدو چاتالار وحشتلرین آتالار  
 راحت یاتانمین لر راحت اولوب یاتالار

دورغم له سینه داغلا اشگون عذاره باغلا  
 من اوخشیوم سن اوخشا من آغلیوم سن آغلا  
 وردیمدی قارداش ایوای وای یارو یولدش ایوای  
 وای قارداشیم دینده سسلله داغ داش ایوای

تائب بیر ایله همت  
 بیر نامه قیل کتابت  
 عباس دعوت ایتسون  
 گیت قبرین ایت زیارت



زبان حال حضرت سیدالشهداء (ع) خطاب به خواهر در شهادت طفل شش ماهه اش

|                     |                    |
|---------------------|--------------------|
| گل کناره ای آنام    | یادگاری زینیم      |
| آل الیمدن اوخلاتان  | شیر خواری زینیم    |
| ویر غریب آناسینا    | اوخلاتان بالاسینی  |
| اوخشاسین بالاسینا   | باغلا سین یاراسینی |
| گوزلور اوغلوئی رباب | ایمدی انتظار یله   |
| گوزلرین تیکوب یولا  | حال انکساریله      |
| بولمور اوخلیو بدیلر | تیر زهر دار یله    |
| اگُلشوب بوغازینا    | زخم کاری زینیم     |
| گوردی مرغ روحینین   | تنگ آشیانه سین     |
| صاق صولا دولاندیروب | چشم آهوانه سین     |
| رمزاً ایلدی بیان    | العطش ترانه سین    |
| گتدی رقتّه اونور    | اهل ناری زینیم     |

|                    |                     |
|--------------------|---------------------|
| گوردیلر من آغلادیم | باخدی اصغر آغلادی   |
| اولدی همنوا بیزه   | قوم کافر آغلادی     |
| سس سسه ویروب اودم  | هامی لشکر آغلادی    |
| چخدی دشمنین گویه   | آه و زاری زینیم     |
| حرمه ایدوب عیان    | کینه نهانینی        |
| کینیه آلوب اله     | تیر یله کمانینی     |
| ردّ ایدوب کمان دن  | تیر جانستانینی      |
| اوخلادی الیمده بو  | شیرخواری زینیم      |
| اوخ آتان قولی قوی  | اوخ سه شعبه زهر دار |
| اوخلاتان ولی سوسوز | بیر ضعیف شیرخوار    |
| اوچی سنگدل شقی     | سودامر اوشاق شکار   |
| گورمیوب جهان بیه   | بیر شکاری زینیم     |
| اوخلانوب ستاره تک  | آخدی گندی اصغریم    |
| گوزلری آخا آخا     | باخدی گندی اصغریم   |
| باخدی یاندیروب منی | یاخدی گندی اصغریم   |
| یاندیروب او حسرتی  | بو فگاری زینیم      |

چوخ فرحله اوخلانوب اُدی سودامر بالام  
لذت شهادتی بولدی سودامر بالام  
باخدی نازیله منه گولدی سودامر بالام

ایتدی عشقینی بیان احتضاری زینبیم  
بیر غریب و بی کسم یوخدی قیدیمه قالان  
بیر آدامسیزام منی یوخدی یادینه سالان  
نعش شیر خواریمی یوخدی بیر نفر آلان

گل بالامی آل آنام یادگاری زینبیم  
باخبر ایله اُزون اصغرین آناسینی  
ویر قوجاقینه اونون سودامر بالاسینی  
اوخلانان بو غازنین باغلاسون یاراسینی

اوخشاسون دویونجا بو زخمرداری زینبیم  
نوحه خوان هدایتیه یتدی حق هدایتی  
یازدیروبدی تائبه بیله بیر کتابتی  
بیر ده خوشدی ذکر ایداخ دل یاران مصیبتی  
آل الیمدن اوخلانان شیرخواری زینبیم

زبان حال حضرت سیدالشهداء (ع) خطاب به خواهر در شهادت علی اصغر (ع)

ظلمیله اوخلادیلار اصغر عطشائی باجی  
گل الیمدن آل آپار بوقوزی قربانی باجی  
بیر الیمده قوزی قربان بیر الیمده قرآن  
حقیّم اثباتینه بوچولده آپاردیم برهان  
حقیّمی قاری قرآن لار ایدوبلر کتمان

اوخلیوب اصغریمی داندیلا قرآنی باجی  
باشلادیم خطبه تانیتدیرماقا خلقه اُزومی  
قویدی آغزیمدا قوناق دعوت ایدنلر سوزومی  
بالامین قانی سپیلدی بویادی یوز گوزومی

قوش کیمی چالدی قاناد چخدی بالام جانی باجی  
سولدوروب سوز عطش گوردوله غنچه گلومی  
طاقتین الدن آلوب لال ایلیوب بلبلومی  
گنه رحم ایتمه دیلر اوخلادیلار سوگولومی  
باغریقان ایتدیله بو غمَزده نالانی باجی

حلقین اعدا هدف ناوک پیکان ایلدی  
 پربها گوهریمی قاینه غلطان ایلدی  
 بالامین قانی بیابانی گلستان ایلدی  
 گَزَرَم من گوزی یاشلو بو گلستانی باجی  
 اوخلانوب غنچه گلوم عمر بهاریم سولدی  
 گوردی آفات خزان پَریر و خندان اولدی  
 اولدی خندان ازی عطریله بو صحرا دولدی  
 عطری یکسر بوریوب دامن صحرانی باجی  
 بالامی فرقه خونخوار عجب یوخلادیلار  
 یانمیوب حالینه از کینه لرین چوخلادیلار  
 ایستدیم سو سولی پیکانی آتوب اوخلادیلار  
 ویردی سو اصغریمه حرمله پیکانی باجی  
 ویردی اوخ دایه سی پستان جفادن یونا شیر  
 شیر مست ایلوب اولوب سیر دوشوب بو بچه شیر  
 داخی بو لمز ندی مادر ندی پستان ندی شیر  
 آتدی بو چشمی خماریم او تمّانی باجی

اللریم اوسته سحر اولدوزی تک آخدی بالام  
 آخدی اولدوز کیمی حسرتله منه باخدی بالام  
 اوباخیشدا ایله یاندیردی من یاخدی بالام  
 آلدیم اولدولده من آتش سوزانی باجی  
 گلستان لاردانه بیله سارالوب غنچه سولار  
 نه بالام تک بوغازی اوخلانی نه پرپر اولار  
 نه ایچر قان نه بیله قاینه قونداقی دولار  
 سپیلر گلشنه نه عطر فشان قانی باجی  
 ماه سیمابالامون گورنه گوزل هاله سی وار  
 یوزده غنچه گلومون گورنجه قان ژاله سی وار  
 عشقیمین گلشنینون گورنه گوزل لاله سی وار  
 محو زیبالیق ایدر اهل تماشانی باجی  
 الیم اوسته بوسولان غنچه گل پیره نیم  
 گیدرم صاق صولا حیرت زده دلده محنیم  
 نه آلان گوگلومی نه وار سسیمه سس ویرنیم  
 یاد ایدن وارنه بو سرگشته و حیرانی باجی

یاره تقدیم ایلدیم بوردا گوزل گللریمی  
 تازه بیر غنچه حساب ایتدیم علی اصغریمی  
 ازی اصغر ولی آرزوشده اولان اکبریمی  
 غنچه ویردیم بزه دیم محفل جانانی باجی  
 گرمیدی بسکه بوگون عشق و وفا بازاری  
 منده بازاره آپاردیم بو در شهواری  
 قیمیتین یازدی شفاعت ازی آلدی باری  
 ساتدیم اللہیمه بو گوهر غلطانی باجی  
 بالامون قانینی تا توکدی جفا پیکانی  
 دوتدوم الده گویه آتدیم او مقدس قانی  
 اوزونه رنگ شفق آلدی فلک دامانی  
 قانی قیترمدی وار نکته پنهانی باجی  
 یره بیر قطره قیتسیدی همان قاندان اگر  
 ایلیردی یری طوفان بلا زیر و زیر  
 اوبلادن قوتولانمزدی داخی نوع بشر  
 محو ایدردی ایله طوفان هامو دنیانی باجی

بیر ده قانین بالاما زینت رخسار ایلدیم  
 تازه دن عارض گلغامینی گلنار ایلدیم  
 لایق مجلس مهمانی دلدار ایلدیم  
 گورمیوب چشم جهان بیر بیله مهمانی باجی  
 هانی یولداش دولانوب چولده تاپام یولداشیمی  
 هانی قارداش دل آچوب سسلیم از قارداشیمی  
 هانی دلدار یوزومدن سیله بوگوز یاشیمی  
 ایسلادور گوزیاشیم آخدیقجا بو دامانی باجی  
 رزمگهده ذولانوب بار مصیبت چکورم  
 آغلورام خصم گولور طعن و شماتت چکورم  
 یوخ یوزوم خیمه گلماقه خجالت چکورم  
 باخور اصغر آناسی گوزده جگر قانی باجی  
 سن کیمی کیمدی منیم قیدیمه بو چولده قالان  
 ئیلسیزیم وار نه یتن داده نه بیر یاده سالان  
 هانی سن تک اورگیم دردینی مهریله آلان  
 آل حسینوندن ازون درد فراوانی باجی  
 ای شریک غمیم ای درد و بلا مشتاقی  
 آه و نالم بوریوب گورنجه بو آفاقی

بو الیمدن یوخ آن قانه باتان قونداقی  
 بالام الده گزرم ساحت میدانی باجی  
 آناسی خیمه قباقینده دورروب آه چکر  
 گوزلوری یول گوره واردی بالاسیندان نه خیر  
 بولموری اوخلانوب اصغر بوغازی اوخلی گلر  
 بیر دلیلله اونا آندور بو قضایانی باجی  
 ویر خبر ماتمه آماده اولاهل حرم  
 جمع اولوب اوغلی اُلنلر قورالار محفل غم  
 اوخشاسون اصغر آناسیله اولاردا باهم  
 قویماسون یالقیز اوغولسوزلار او ثکلانی باجی  
 قیدینه خوشدی ربابین حرم اهلی قالالار  
 اورگی یاره لیدور مهریله مرهم سالالار  
 اوخشیوب اصغرینه غصّه لی گوگلون آلالار  
 گوگول آماقین اولار اجرت شایانی باجی  
 غصّه دن رنگی ربابین دولانوب زرد اولاجاق  
 زندگیدن داخی بالمرّه او دلسرد اولاجاق  
 بالا دردی اونا عالمده یامان درد اولاجاق  
 دردینون اولمیّه جاقدور داخی درمانی باجی

قید مظلومه ربابه قالان اولماز سن تک  
 یارالی قلبینه مرهم سالان اولماز سن تک  
 گوگلونی دردی داشاندا آن اولماز سن تک  
 ای اولان عاطفه نین صاحب بنیانی باجی  
 اصغریم معركة عشقده غوغا ایلدی  
 معنی عشقی او غوغائیله افشا ایلدی  
 کربلا دفترینی قانیله امضا ایلدی  
 قورّام اول دفتريله حشرده دیوانی باجی  
 سن وفا لفظینه هم صورت و هم معناسن  
 سربسر عاطفه رأفته اولان دریاسن  
 هم باجیمسان هم آنام نایبه زهراسن  
 آل ربابین اورگین شاد ایله زهرانی باجی  
 سنه تائب از آقان یاخشی باخوب دنیاده  
 نگران اولما گنه صاحب اولار عقباده  
 قیل تشکر یاز امامین دلیجه گل داده  
 ظلمیله اوخلا دیلار اصغر عطشانی باجی  
 گل الیمدن آل آپار بو قوزی قربانی باجی

### در خلقت بشر و حالات حضرت ابراهیم (ع)

خلق ایلوبودی عالمی خلاق لایری  
نعمت لرین ایدوبدی یارانمیشلارا عطا

چرخ فلک زمین مه و خورشید و آب و خاک  
گردشده وار تمامیسی هر صبح و هر مسا  
خلق ایتمیوبدی جتیله انسی خدا مگر  
عبد عبید حق اولالار جمله ماسوا  
از نفسوی ازل تانی صون اعترافیله  
اللّٰه معرفت یتورای مرد پارسا  
سال بَرَو بحرده او یارانمیشلارا نظر  
بیر عرش و فرشه سیرایله باخ کهکشانشان لارا  
اللّٰهوی گوزل تانی عین خضوعیله  
اول سلّم محض خالقّه بی چون و بی چرا  
اللّٰهوه کچیل بو کیچیلما قیله سنون  
شخصیتون بیور اولی حیثیتون علا

اللّٰهدهان اتری بنده لره احترام ایله  
ایستر فقیر محض اولا یا فخر اغنیا  
اللّٰه تمام بنده لرین خلق ایدوب عزیز  
یکسان گرک تمامی سینه احترام اولا  
کبر ایتمه کبریایه کیچیلمه غنی لره  
بو کبر و بو تملق اولار باشوه بلا  
پیغمبر خدا بویورویدور غنی لره  
ایتمون غناسی خاطرینه سیزسلام ادا

مَنْ سَلَّمَ عَلَيَّ الْغَنَىٰ لِأَجَلٍ  
غِنَاءِهِ فَذَهَبَ ثُلُثًا دِينِهِ

ثروتدن اتری هر کسه هر کس ویره سلام  
بیر ثلث دینینی بو سلامی ایدر فنا  
حفظ ایت همیشه عزت نفسون عزیز من  
از دینوی رذالتیله ایلمه هبا  
الّا او بیر غنی که گیدوب آختاروب تابا  
اللّٰهدهان اتور الی بوشلار الین دوتا



مرد خدا او دورتاپا قلبی سنق لاری  
 الله مکین اولان او سنق دللرین آلا  
 بیر ایله شخص خیره واجبدی احترام  
 گر حرمت ایلسن اونا الله اولار رضا  
 تشویق ایدر بو عدّهنی خیره بو احترام  
 تنبیه ایدر او عدّه بی خیری بر ملا  
 الله یاندا یوخدی غنی و فقیره فرق  
 الا که امتیاز آبارار فرقه تُقی  
 تقوی ندور بیان اولونور اختصاريله  
 ویر گوش هوش سنده دل هوشیاريله  
 تقوائيله گرکدی بشر سازگار اولا  
 فعل حرام وشبهه لیلردن کنار اولا  
 تقوادی رهنمای سعادت سعید اولار  
 تقوی یولوندا هر کس اگر رهسپار اولا  
 معناسی چوخدی جمله واحددی ظاهراً  
 چوخ طول اولار بیانيله بیر بیر شمار اولا

بهتر بودور که مطلبه چوخ طول ویرمیاخ  
 زیبا دوشر کلامده گر اختصار اولا  
 تقوی ویرر تمیز صلاحه فساددن  
 تقوی دیر که مرد گرک هوشیار اولا  
 از قدرتونجه بار گوتور سنماسین بلون  
 وای حالینه او شخص که سنگین بار اولا  
 تقوی دیرحرامه یاخین دوشمه هوش ایله  
 گر چه حرام نفعی سنه صد هزار اولا  
 ظاهرده نفع باطنی خسراندی حشرده  
 ایجاب ایدر که اود سنّه دارالقرار اولا  
 تقوی دیربشر تانیوب نفسینی ازل  
 تا معرفتله عارف کامل عیار اولا  
 الله معرفت یتوروب عبّد رق اولوب  
 قلبینده خوف ذات خداوندگار اولا  
 تقوی دیر یالان دیمه بهتانه آچما دل  
 بهتان و افترا سنه حاشا شعار اولا

بهتان و افتراگری اللّٰه بَغِشَلَه مَز  
 بهتان دیسن گرکدی یرون قعر نار اولا  
 پول اوزگه دن آلوب دیمه دشنام اوزگیه  
 ای سن کیمی موخّ دینداره عار اولا  
 تقویٰ دیر غرور نشان ویرمه‌ای غنی  
 شاید غروری اوسته او فقره دچار اولا  
 تقویٰ دیر فشاره دوشن گونده اهل دین  
 سندیرمیوب گرک اوزینی بردبار اولا  
 هرکس که قوخی قهر خدادن بوخلقدن  
 قوخماز و لو که حاکم ذوالاقتدار اولا  
 عالمده مشرکینیله ایلر مبارزه  
 قویماز که شرک ریشه سالوب پایدار اولا  
 تقویٰ یولوندا چوخلاری جانانان گچوبدیلر  
 اللّٰه سُون اولوبدیلر سانانان گچوبدیلر  
 تقویٰ ایدور حقایقی عالمده آشکار  
 تقویٰ خطادن اهل صفانی ایدر کنار

تقویٰ اولوبدی مُجری فرمان فَاسْتَقِم (۱)  
 تقوادی استقامت دیندار ایچون عیار  
 جانانان گچوب سالوبدیلر بی پرده صورته  
 معنای استقامتی مردان روزگار  
 نوح نجی نبی خدا شیخ الانبیاء  
 اُمّت الیله چکدی یوز ایل لرله انزجار  
 الدن ولیک ویرمدی اوز استقامتین  
 چکدی خداشناس لری ورطه‌دن کنار  
 باشندان گچوب باش اگمدی باخ استقامته  
 اللّٰه یولوندا حضرت یحیای جان نثار  
 بیر استقامت ذکر یایه سیر ایله  
 دُزدی بُلنّده جسم شریفین دم نوشار  
 موسایه باخ او کثرت فرعونیانیه  
 یالقیز جانیه ایلدی پیکار و کارزار  
 باخ سر فراز حضرت عیسی ابن مریمه  
 گورپای دارده او نجه اولدی پایدار  
 ۱- فَاسْتَقِم کَمَا أَمَرْت

داره چکنمیوبله عروج ایتدی گویلره  
 عزتله اولدی چرخ چهارمده بر قرار  
 مردان حق دوست ربّ جلیل اولار  
 خُلت مقامینه یتیشر چون خلیل اولار  
 تاریخ عشق زای خلیل خدایه باخ  
 بیر سیر استقامت ایله بیر صفایه باخ  
 اولموشدی مجو عشق خداوند عاشقان  
 معشوقه بیرده عاشق صاحب وفایه باخ  
 الله آدینا گه هامی مال و منالینی  
 بذل ایلدی محبت بی منتهایه باخ  
 گاهی اوز اوغلون ایستدی قربان یار ایده  
 سیر ایت ذبیح عشقه خلیل خدایه باخ  
 بیر ایله استقامته پاداش جبرئیل  
 بیر قوچ عوض گتوردی او زیبا فدایه باخ  
 ذبح عظیم قالدی حسنیون مناسینه  
 گیت نینوا چولونده حسینی بنایه باخ

منظور فاستقمیدی بوسوزدن گما اُمرت  
 سیر ایت مطیع امره او فرمانروایه باخ  
 گاهی ایدوب مبارزه نمرودیانیله  
 نمروده باخ خلیل گورن ماجرایه باخ  
 نمرود اوخ آتدی الله اصلا اوتانمادی  
 سیر هوای نفس ایله شرم و حیایه باخ  
 آری هواپرست اولان الله اوخ آتار  
 هر گون خدایه اوخ آتانی گور رمایه باخ  
 بعضین دوتوب دیردی که پُتدن چکیل کنار  
 واحد خدایه سجده ایله کبریایه باخ  
 بیر بُت که سن یونوب اونی خلق ایتموسن اُزون  
 خالق نجه اولار سنه فکرایت خدایه باخ  
 خلاق کلّ خلق دی الله لاشریک  
 شرک ایتمه لاشریک اولان لایراییه باخ  
 یالقیز چخوب قباقینه مین لرله مشرکین  
 بیر اتکاله سیر ایله بیر اتکایه باخ

ایتموب اسیر نفسلره موعظه اثر  
 بیرقوم بت پرست موحددی بیر نفر  
 منفی جواب گوردی او قوم شراردن  
 مُثَبَّت قدم گوتوردی دم ابتکاردن  
 بیرگون که شهر خلوت و محض سکوتیدی  
 ایلوبدی استفاده اوگون روزگاردن  
 وارد اولوبدی بتکده ده سایدی بُتلیری  
 گوردی که بتلرین سانی گچموش شماردن  
 نه بیر نه اون نه یرمی فزوندور شماره سی  
 هر بُتده وار اثر نچه نقش و نگاردن  
 اللّهدان اتری الده تبر دلدہ یاودود  
 نیرو آلوب وجودینه پرورگاردن  
 سندیردی سالدی توپراقا یکسر صنملری  
 ذکر صمد یاراتدی بیله ابتکاردن  
 گتدی بیوک بُتین تبری سالدی بوینونا  
 گلدی کناره ایتدی تماشا کناردن

ناگه توکولدی بتکدیه بُت پرستلر  
 مبهوت اولوبلا بیر ایله انجام کاردن  
 شورا ایچون ویروبدیله تشکیل انجمن  
 گورسونله کیم صنملری سالموش وقاردن  
 رای آلدیلار که بیله جسارت ایدر ظهور  
 بی ریب و شک خلیل خداوندگاردن  
 جلب ایتدیلر خلیل خداوندی مشرکین  
 دوروبرین دوتوبلا اونون هر کناردن  
 تهدیدیه دیدی اونا مشرکین دون  
 کیم بو صنملری ایلوب بیله سرنگون  
 سویلوب اونی بیوک صنمیزدن آلون خبر  
 بولسه بولر او بیرده او بوینیوندا کی تبر  
 شاید او سندیروب یره توکموش صنملری  
 دینسه دانشسا بو جریانانی شرح ایدر  
 سویلوبله بو صنم دانشوب سوز دیمز بیزه  
 گورمز بیزی ولی اونا بیز ایلروخ نظر

یوخ بینشی گوره دلی یوخدور دانشماقا  
 نه قدرتیله بیزلری ایلر او با خبر  
 فرمایش ایلدی نه گوزل اعترافیه  
 چوخ بیر بیوک بیاندی بو بیر شرح مختصر  
 بیر بت که وار نه فهمی نه درکی نه بینشی  
 بو عجزیله نه نوع اولار خالق بشر  
 بیر خالقی که خلق یونوب هم آلا ساتار  
 بو وضعیله سزادی ستایش اونا مگر  
 بیر بت که قدرتی یوخ ازوندن دفاع ایده  
 سیزدن نه نوع درد و بلا گلسه دفع ایدر  
 یولدان گوره گوره چخوسوز کبر و جهلیله  
 بیله بوله بوله دوتوسوز سیز ره ضرر  
 هوشه گلون بوراه خرافاتی بوشلیون  
 ایتمون عزیز عمری خرافاتیله هدر  
 الله عزیز دورسیزی خلق ایلیوب عزیز  
 ذلت قبول ایلمیون ای عزیزلر

اصنامی ترک ایلوب اولون سیز صمدپرست  
 چون بی نیاز احددی خداوند دادگر  
 بازیگران عصر ویرویدور سیزه فریب  
 اهل فریب کفر سیردن ایدون حذر  
 نمرودیان که سلسله جنبان کفریدی  
 احساس ایدوبله فرقه کفاره وار خطر  
 توحیددن ایشندی او نمرود بی ادب  
 قلبینده شعله لندی اونون آتش غضب  
 فرمان ویروب که آتش سوزانی یاندیرون  
 اوتدا خلیل خالق رحمانی یاندیرون  
 چوخ چوخ گیدون اودون گتورون بت پرستلر  
 جمع ایلیون او جمع فراوانی یاندیرون  
 روشن ایدون وسیع بیابان دا ظلم اودی  
 وسعتلی آتشیله بیابانی یاندیرون  
 هنگام اتخاددی دینوز خطرده دی  
 انگیزه خطر اولان عنوانی یاندیرون

بیر بُت شکن که بُت لریزی سرنگون ایدوب  
 اوتدا آتون او بُت شکن انسانی یاندیرون  
 سیزدوشمیون یاخین اودا بیر منجیقیله  
 پرتاب ایدون او مرد توانانی یاندیرون  
 اللّهی تک بولور اوزی تکدی طریقی تک  
 بویگه تاز بنده یکتانی یاندیرون  
 واردور کیمی گلوب ویره ایمدی اونا نجات  
 حامی سی یوخدی بی کس و تنهانی یاندیرون  
 مندن هراس ایتموری واحد خدادیور  
 شرکی دانان موحد اولان جانی یاندیرون  
 اسلامیله منیم قاباقمیدا دیور خدا  
 مسلم اولان بو مرد مسلمانی یاندیرون  
 قالسا بیزیم عقیده میزی پایمال ایدر  
 بو بی تقیه اهل تقلّاتی یاندیرون  
 بیدار دل دی قالسا آییلدار جماعتی  
 بیدار ایتمه میش هامی دنیانی یاندیرون

مردم آییلسا عزّتیمیز ذلّته دُونَر  
 بیدار اولان فصیح سخرنانی یاندیرون  
 اللّه کیم دیور اونا گوردوز من آتدیم اوخ  
 سیزده بو عبد خالق سبحانی یاندیرون  
 قالسا جهاندا معرفت اللّهی نشر ایدر  
 بو ریشه حدیقه عرفانی یاندیرون  
 بو ذکر یا رحیم دیور من اولا اول  
 رحمان بولن او خالق رحمانی یاندیرون  
 جانان یولوندا ترک سر ایلوبدی جان بکف  
 بو جان نثار عاشق جانانی یاندیرون  
 اللّه که بودیور اگر اولسا ویرر نجات  
 الا بو با عقیده و ایمانی یاندیرون  
 یکسر داغیلدی چوللره کفار بد شعار  
 هر کس به قدر قدرت اودون گتدی بار بار  
 از بس اودون توکولدی چولون هر کنارینه  
 صحرا مبدّل اولدی اودون کوهسارینه

اودوردیلار او پشته هیزم لر اودلانوب  
 دؤندی وسیع دشت بیر آتش دیارینه  
 گوزایشلدیقجا آتش آتش فشانیدی  
 داغ داش یاناردی آتش جهلین شرارینه  
 نعره چکردی آتش او صحراده چوخ مُهیب  
 رخنه سالاردی سینهدده دل لر قرارینه  
 او یاندریران لار اوتدان اوزاقه قاچاردیلار  
 گلمز دیلر یاخین اوجالان اود کنارینه  
 وحشت دوشردی قلبینه هرکس باخیدی گر  
 نعره وران اوتون شَرَر شعله بارینه  
 نمرود امر ایلدی بیر منجنیقيله  
 اللّه خلیلین آتدیللا آتش حصارینه  
 دنیایه باخ که فرقه نمرودیان آتور  
 معبود پاک نورینی نمرود نارینه  
 هر دوره ده مسلط اولار اهل نوره نار  
 لعنت گله جهان دنی اعتبارینه

بیر گور او بُت پرستلرین اقتدارینی  
 بیر سیر ایله خلیل خدا روزگارینه  
 نمرود آتوب که اوتدا یانا نور کردگار  
 معبود دوتدی چکدی اونی ناردن کنار  
 هر کس بلا بلایه دیوبدور بلاسی وار  
 هر کس بلایه صبر ایده عالی جزاسی وار  
 ناره خلیلی آتدیللا بیر منجنیقيله  
 تعریف استقامت حیرت فزاسی وار  
 سست اولمادی ارادهسی سندیرمادی اُزین  
 سیرایله گور نه همت با اعتلاسی وار  
 آیریلدی منجنیقندن ایتدی هواده سیر  
 بو سیریه باشندا گورون نه هواسی وار  
 جاری اولور دلیندن اونون ذکر یا رُوف  
 نغمات یا عزیزیه دلده نواسی وار  
 ناره گیدور چوخالدیری نور یقینینی  
 هرچند ظاهرأ خطر پُر بلاسی وار

مَحُو تَجَلِيَّاتِ الهی اولوب ز بس  
 آئینه دلینده الهی جلاسی وار  
 یتدی ندای حق ملکوت اهلینه گورون  
 باشدا خلیلمین نه بیوک ماجراسی وار  
 دگدی او وقتده جبروت اهلی بیر یره  
 تا گوردیلر خلیلین ایله ابتلاسی وار  
 خیل ملائکیله نزول ایتدی جبرئیل  
 شاید خلیله نصرتینین اقتضاسی وار  
 عرض ایتدی گلمشوخ سنه بیز نصرت ایتماقا  
 گوردی بو امردن او جنابین اباسی وار  
 چشم دلی خداده ایدر ذکر دوست دوست  
 نه اوزگه نی گورور نه اونا اعتناسی وار  
 سویلوب کمک لیق آختاری بی کس خصوص کیم  
 سن تک گوره عدو ستم نارواسی وار  
 فرمایش ایتدی ناصریم الله دور منیم  
 حاشا که اوزگه دن بو وحیدالتجاسی وار

سندیر میشام صنم لری من دلده یا صمد  
 بُتَلَر ایوینده یا احد الله صداسی وار  
 گورمور مگر منی اوزی بو گیرو دارده  
 ایله بصیر کیم بیله صیت وصلاسی وار  
 نیلر دم فشارده اوزگه اعانتین  
 بیر بی کسی که راحم و رحمان خداسی وار  
 گوز تیکمیشم اونا اودا عیناً گورور منی  
 هر حالده خلیله جلیلین عطاسی وار  
 بولسه صلاح ساخلیه ساخلار منی ازی  
 دُوَالْقَوَه المتیندی محکم قواسی وار  
 ایستر بلا چکم چکریم چون خلیلیم  
 ویرم رضا او امره که الله رضاسی وار  
 گر ایستیوب یانوم یانارام یوخ منیم سوزوم  
 ایتمم گلایه همتمین اعتلاسی وار  
 بسدور بو بی کسه ازی بی کسلرین کسی  
 رحمت گوزیله باخسا منه اکتفاسی وار



عشق آتشی بیر اوت دی که آفاقی یاندورار  
 نه شک و وار بو سوزده نه چون و چراسی وار  
 عشق آتشیله سوندوری هر یاندیران اوتی  
 تأثیردن سالار ایله قدرت نماسی وار  
 حاشا که یاندیرا اونی نمرودین آتشی  
 ایله وجودی یاندیرا اوت انتفاسی وار  
 بیر عاشقی که آتش عشقه دُنب ازی  
 نمرود آتشیندن اونون نه هراسی وار  
 داغلار بویی اوتی بو خلیلی نگاهیه  
 گورم چونور گوزده بهشت انجلاسی وار  
 بیر گلستاندی توده آتش اولوبدی گل  
 باد جنان وزاندی چوخ عالی صفاسی وار  
 آتدی خلیلی آتسه نمرود بی امان  
 ایتدی خلیله آتشی مُعبود گلستان  
 گر چه خلیل گلشنینون اشتھاری وار  
 چوخلی خزان گوروبدی دیمز لر بهاری وار

### گلستان در قتلگاه امام حسین (ع)

اما بلا چولونده حسین گلستانینون  
 یوخدور خزانی بلکه، همیشه بهاری وار  
 بیر گلستاندی قانیله سیراب ایدوب حسین  
 هاردا بو آبیاریویله آبیاری وار  
 توحید لاله زاریدی وار چوخلی لاله سی  
 بیله کیمین جهاندا گوزل لاله زاری وار  
 آری او گلستان که حسین قانینی ایچوب  
 قان صاحبی گلونجه اونون نوبهاری وار  
 چوخ گل و یروبدی یارینه بیر گلستان آلوب  
 الله و یروب او گلشنی عالی عیاری وار  
 وار دور او گلشنین علی اکبر کیمی گلی  
 قاسم کیمی گل اوزلی حسن یادگاری وار  
 عباس نامدار کیمی سر و قامتی  
 یاتموش کنار نهر ده قان جویباری وار  
 نشگفته غنچه گلشن عشق حسین ده  
 بیر اصغر آدلی پرپر اولان شیرخواری وار

اصحابی ده اوباغده پرپر دوشوبدیلر  
 یتیمیش ایکی گل اوزلی گوزل جان نثاری وار  
 بیر خوش زیان رقیئه شیرین زبان کیمی  
 هم خوش ترانه شور و نوالی هزاری وار  
 امّا دگوبدی گل یوزینه زاغ پنجه سی  
 لطمه سالوب دی یر یارالی گلغذاری وار  
 نایب داریخما اهل ولانی تاپار بلا  
 هر دوره گلسه اهل ولانین فشاری وار  
 حق سوز (دی) حقّی یاز داشا باسونلا قوی سنی  
 بسونگساراولماقوین افتخاری وار

سن باخ آقان حسینّه دلینده کلام حق  
 شام جفاده واقعه سنگساری وار

### شخصیت امام حسین (ع)

در شأن و شخصیت حضرت سیدالشهداء

انگیزه اهل دین و قرآن آیات رشادت حسیندی  
 حیثیت ملت مسلمان مدیون شهادت حسیندی  
 عشق اهلینه بیر یگانه رهبر عشاق اورگین ایدن مسخر  
 علت اودی باصفا اورکلر کانون محبت حسیندی  
 الگوی شرف تمام ناسه یول سینده ویرمین هراسه  
 افکارده خلق ایدن حماسه انگیزه همت حسیندی  
 احیاگر حق دین و قرآن معبود صفات و روح ایمان  
 هم عزت و آبروی انسان آفاقده حضرت حسیندی  
 هر شهر و کنار و هر طرفده هر مجمع جمع باهدفده  
 هر محفل و مجلس شرفده گفتار شرافت حسیندی  
 ال اوزماق علی اکبریندن هم قاسم ماه پیکریندن  
 آلتی آیلیق علی اصغریندن معنای دیانت حسیندی  
 همره لری سالمین گوزیندن قاره قولی سچمین اوزیندن  
 صوندم تاپوب اُپماقی یوزیندن مقیاس فتوت حسیندی

باشندان باشا عشق یار اولماق  
 باش اگمیه سربدار اولماق  
 مجلس قورا هاردا بیر جماعت  
 مردان جهانندان اولسا صحبت  
 درد اهلینه مهربان و هم درد  
 نامردلری یخان ابرمرد  
 بنیان جفایه لرزه سالماق  
 جان نقدی ویروب شریعت آلماق  
 دین اوسته جهانی گوزدن آتماق  
 دنیاده یاتانلاری اویاتماق  
 عشق اوسته رموز عشقی سچماق  
 جانندان ره دین حقه گچماق  
 وار قانی روان پاک دینده  
 قرآنی ایدن همیشه زنده  
 عالملری چولقیان وفاسی  
 عالمده مریضلر شفاسی  
 عشق اهلینه سرقطار اولماق  
 معیار شهامت حسیندی  
 اول بزمده اهل دین و غیرت  
 سرسلسله صحبت حسیندی  
 تکلیقدا مین آتلویه هم آورد  
 تاریخده شهرت حسیندی  
 آفاقدہ صور عدل چالماق  
 قانون تجارت حسیندی  
 قانه بویانوب یارالی یاتماق  
 عنوان عقیدت حسیندی  
 قان سو یرینه یارالی ایچماق  
 قانیله کتابت حسیندی  
 روشندی بو صحبت مُبینده  
 غوغای شهادت حسیندی  
 هر قلبه صفا و یرن صفاسی  
 پُر غالیه تربت حسیندی

بیر رحمت ذات پاک رحمان  
 باخ شأنه تمام کون و امکان  
 الله چاغیروب علم اوجاتماق  
 افکارده روح دین یاراتماق  
 نفسیله ایدوب جهاد اکبر  
 علّت اودی روزوشب ملک لمر  
 ویرمیش اوزی وعده لایراسی  
 هر یاندا حسین حسین صداسی  
 مقتلده نه گوردی اهل بدعت  
 من نولمه میشم دیدی جماعت  
 حاشا گتورم قرار و طاقت  
 چون هاشمیم واریمدی غیرت  
 اوز قتلگه پینده حکم تحریم  
 خلق اولمیه اهل ظلمه تسلیم  
 تائب نقدر وار الدهه فرصت  
 دلرده حسین ایدر حکومت  
 وجه کرم قدیم الاحسان  
 پیچیده رحمت حسیندی  
 ترک سر ایدوب مرامه چاتماق  
 نیروی دیانت حسیندی  
 قدرین بیودوبدی حیّ داور  
 مشغول زیارت حسیندی  
 تجدید اولا ایل به ایل عزاسی  
 افزایش عزت حسیندی  
 یوز قویدی ایده خیامی غارت  
 زنده هله قدرت حسیندی  
 خوفه دوشه اهل بیت عصمت  
 بو غیرت اصالت حسیندی  
 قانیله یازیلدی اولدی تنظیم  
 بو رمز رشادت حسیندی  
 اوصاف حسینی قیل کتابت  
 پاینده حکومت حسیندی

### نوحه شور زنجیر زنی

ورون باشه گلون افغانه شیعه  
توکون گوز یاشوزی دامانه شیعه

سالون یاده حسینین کربلا سین  
ایدون از سینهنزی غمخانه شیعه  
نه ظلم ایتدی گورون اشرار کوفه  
او صحرا ده شه عطشانه شیعه  
ستمله باغلادی راه فراتی  
سو ویرموب عترت قرآنه شیعه  
قالوب اوچ گون سوسوز آل پیمبر  
سوسوز ليقدان گلوبلر جانه شیعه  
دولانندی روز عاشورا یتشدی  
داغلیدی اهل کین هریانه شیعه  
شه عطشان او گونده ایتدی ایفا  
ازل گون باغلانان پیمانه شیعه

اوگون یتیمیش ایکی قربان او چولده  
فدا ویردی ره جانانه شیعه  
کفن پوش ایتدی اوّل اکبرینی  
ایلله گوندروب میدانه شیعه  
قرار قلب لیلانی او چولده  
ایدوب شام اهلی غلطان قانه شیعه  
گلنده نعش اکبر یاندی زینب  
ویروب صبر دلین تالانه شیعه  
سکینه اکبرین نعشین گورنده  
عجب دی اولمادی دیوانه شیعه  
گورنده قاسمین نعشین آناسی  
وراردی باشه یانه یانه شیعه  
دیردی دمبدم ایوای اوغولوای  
توکردی گوزیاشین دامانه شیعه

یاتانموب اوج گجه اصغر سوسوزدان  
 او شیرین دل گلوب افغانه شیعه  
 حسین آلدی اله اول شیرخواری  
 آپاردی جانب میدانه شیعه  
 الینده اصغری زهرا عزیزی  
 دوتوب یوز فرقه عدوانه شیعه  
 دیردی رحم ایدون ایقوم کافر  
 بوسولموش غنچه عطشانه شیعه  
 آلون سیراب ایدون بو شیر خواری  
 اولان ای زاده سفیانه شیعه  
 الی اوستونده آلتی آیلیق بالاسین  
 نشان ایتدی عدو پیکانه شیعه  
 گیدوب لب تشنه سقا سوگتورسون  
 بنات سرور عطشانه شیعه

سو مشکی اوخلانوب سو آخدی گیتدی  
 یانوب دلدن غم سوزانه شیعه  
 قلم اولدی قولی یاتدی لواسی  
 اولوندی صبر ایوی ویرانه شیعه  
 گیدوب الدن علمداری حسینین  
 جهان تنگ اولدی اول سلطانه شیعه  
 کمک سیز قالدی اولموب بیر هوادار  
 او چولده ناطق قرآنه شیعه  
 الوب اطرافینی دشمن حسینین  
 یتوردی ظلمینی پایانه شیعه  
 آچوب لار ظلم الین اشرار کوفه  
 حبیب حضرت سبحانه شیعه  
 او قدری وردیلار اوخ نیزه خنجر  
 نه تقریرَه گَلَر نه سانه شیعه

بو نوعی ایلوری راوی روایت  
 دگوب سانسیز یارا بیر جانہ شیعه  
 دیردی العطش شاهنشہ دین  
 دُونَرْدی حوض کوثر قانہ شیعه  
 او چولده گلدی قان دریاسی جوشہ  
 دوشوب نوح بلا طوفانہ شیعه  
 گچوب جاندان او سرور قانہ باتدی  
 اولوندی جسمی شانہ شانہ شیعه  
 آیردی شمردون باشین بدنن  
 گتوردی ظلمینی طغیانہ شیعه

بو درگاہہ تیکوب گوز تائب آغلار  
 وروبدر چنگ بودامانہ شیعه

احوالات جوان نصرانی در روز عاشورا در مصرع حضرت امام حسین (ع)

سن دوشوبسن نیه‌ای شاهد زیبا یارالی  
 باش یارالب یارالی قامت رعنا یارالی  
 قانوه تشنه‌ندن بیله مسلمان لاراولوب  
 قتلوه حکم ویرن صاحب ایمان لاراولوب  
 منی مأمور ایلین حافظ قرآن لاراولوب  
 حکمی امضاء ایلوب مجلس شورا یارالی

من مسیحی بالاسی حافظ قرآندی بولار  
 من مسیحا رِوشم صاحب ایماندی بولار  
 بیلمورم بس نجه بی عار مسلماندی بولار  
 ایستدیلر قتلوه ترسانی مهیا یارالی

دیدیلر بو یارالی چون که اولوب عاق امام  
 قتلینی واجب ایدوب مفتی دین یوخدی کلام  
 سن گیت اَلدور بو غریبی ایله بو امری تمام  
 من ایناندیم اودی گلدیم ایدم اجرا یارالی

لیک حلقوندن انا الحق سسی گوژم اوجالار  
موسوی نور جمالون دل صحرايه سالار  
گورسه موسی اوزی بو عالمی حیرتده قالار  
بو چولی ایلموسن وادی سینا یارالی

کشور عشق و وفا یوسفی سن ای شه عشق  
مصرعوندور یارالی پیکریله بیر چه عشق  
ایتموسن قتلگهون ایله تماشاگه عشق  
که ایدورسن گورنی محو تماشا یارالی

کیمن آخر سنی بوقوم بو احواله سالوب  
آشنا یوخ سنه دور و برون اغیار آلوب  
هاتفن هاردادی بس خویش وئلون هاردا قالبوب  
قالموسان دشمن ایچینده بیله تنها یارالی

سنله انوار الهیه هویدا گورورم  
اوز گوزل نورویله محو تجلاً گورورم  
مهد خونین ده بیر طلعت عیسی گورورم  
بو آیقلیقدی ویا عالم رؤیا یارالی

دم جان بخشیله یوخسا یارالی عیسی سن  
آرنی دلدۀ او سیناده دوشن موسی سن  
طشت زرین کنارینده دوران یحیی سن  
سنله تجدید اولونور قصه یحیی یارالی

گذدیورسن بیله کیم نازیله حق بین گوزیوی  
دیوسن رمزیله محبوبه گزلین سوزیوی  
هانسی معشوقدی سن عاشق ایدوبسن اوزیوی  
محو عشق اولموسان ای عاشق شیدا یارالی

دلربا سن نه گوزل دلبر خوشخو سن سن  
عشق باغینده اولان بیر گل خوشرو سن سن  
عطر جنات ایدوسن پخش ایله خوشبو سن سن  
که دولوب عطریویله دامن صحرا یارالی

سن مگر شورسالان طورده موسا دگوسن  
سن مگر فوق قدا سنده مسیحا دگوسن  
سن مگر بودم جان بخشیله عیسی دگوسن  
کیمن آخر دی گوروم تاج مسیحا یارالی



أزیوی سوخته آتش آه ایلموسن  
بیر نگاهیله منی محو نگاه ایلموسن  
گل دله بیر گوروم آیا نه گناه ایلموسن  
که ویروب مفتی دین قتلوه فتوا یارالی

سن کیمه عاقّ اولوبسان ندی اوز آدی اونون  
اوز امام اولماقینا واردی نه اسنادی اونون  
مُتَسَبِّ دورکیمه کیمدور آب و اجدادی اونون  
حکم اعداموی ایلوب سنون امضاء یارالی

سوزیتنده بورا زهرا بالاسی چکدی بیرآه  
دوندی ترسایه حسینی گوزیله ایتدی نگاه  
بویوروب عاقّ امامت دگولم حقدی گواه  
منی ناحقّ یخوبلار بیله اعضا یارالی

عیسوی زاده منم سبط رسول الثقلین  
هم علی اوغلی همی فاطمیه قرّة عین  
اوز آدیمدور وطنیندن قوغولان تشنه حسین  
سوکنارینده دوشن جسمی سراپا یارالی

او امامی که دیورسن اودی محبوب بابام  
جدّ پاکیمدی رسول مدنی خیر آنام  
أزی پیغمبر خاتم قزی زهرادی آنام  
حق سوز اوستونده یخوبلار منی اعدا یارالی

منی مهمان چاغروبیلار بو گروه جانی  
تکلیوبلر بو بیاباندا بو سرگردانی  
ألدوروللر سو کنارینده سوسوز مهمانی  
لب دریاده دوشوب صاحب دریا یارالی

گلمیشم بو چوله دلداره طرف روی دلیم  
باشدایتمش ایکی تن اهل وفا ارخام تلیم  
گندی الدن او تلیم یاندی دلیم سندی بلیم  
قالمیشام ایمدی بیله بی تل و آرخا یارالی

ایله سولدور دولای بو چولده منیم گل لریمی  
قویدولار ناله جانسوزیله بلبل لریمی  
آرزو ایلرم آخر نفسیم تل لریمی  
ایدهلر قائیمه غلطان منی پیدا یارالی

گر چه نه سس ویرنیم واردی نه بیر داد رسیم  
بی کسم یوخدی منیم غیر خدا آیری کسیم  
یاره دگدیقجا قسم یاریمه آرتار هوسیم  
شوق دلداریلله آلام دله یارا یارالی

فخر دور عاشق ایچون عاشق جانان اولماق  
دلده محبوب آدی اوز قانینه غلطان اولماق  
شور عشقیله دوشوب عشقینه قربان اولماق  
گتوره ظاهره معنای فدینا یارالی

شوقیله سیر مقامات وفا ایلمیشم  
أزومی مَحوره صدق و صفا ایلمیشم  
هر نئیم واریدی جانانه فدا ایتمیشم  
سالمیشام عشقیمله صورته معنا یارالی

موسوی شور واریم گرچه او موسی دگلم  
باشمین قصه سی یحیادی او یحیا دگلم  
واردی عیسی نفسیم لیک او عیسی دگلم  
ایدرم مرده اولان دللری احیا یارالی

سنه الطاف الهی یتشوب معناده  
سن دیورسن منه عیسی نه دیوب رؤیاده  
یا او رؤیاوی دیوم من سنه بو ائنده  
نجه گور سرّدن آگهدی بو دانا یارالی

دیدى حاشا که حسین قتلینه سبقت ایده سن  
پیش طاهاده مسیحانی خجالت ایده سن  
امر عیسایه گرک ایمدی اطاعت ایده سن  
ویر قولاق گورنه دیور حق سوزه گویا یارالی

بوشلا انجیل یولون دوت طرف قرآنی  
اول موحد تانی تک ذات حق یکتانی  
واحد اللهی چا غیر راضی ایله عیسانی  
اولما راضی که اورکدن اولای عیسی یارالی

آختارورودن نچه مدتدی که سن دلدارى  
ایمدی تاپدون سنه لطف ایلدی ذات باری  
ترک تثلیت ایلیوب فوراً آج آت زُناری  
سنی توحیده چکور بنده یکتا یارالی

عاطفی باخماقی قان ایچره گوزل گفتاری  
گو که یاتمیشدی او نصرانی تاپوپ بیداری  
آچدی فی الفور او ساعتده آتوب زَناری  
دیدي گفتاریوه قرباندي بو ترسا یارالی

صحنه عشقده چاتدی اله تحصیل حصول  
اورگدوب کلمه تهلیلی اونا سبط رسول  
دیدي تهلیل او ترسا ایدوب اسلامی قبول  
سویلدی رحمته ایتدون منی دارا یارالی

نه گوزل وجهیله بو گمرهی ارشاد ایلدون  
دل ویرانه می بیر لطفیله آباد ایلدون  
نفس امّاره الیندن منی آزاد ایلدون  
سنده واردور نه گوزل شیوه شیوا یارالی

سنه من کثرت اغیار آرا تک یار اولام  
یوخدی بیر کیمسه هوادار هوادار اولام  
سن فدا کاره بو صحراده فداکار اولام  
بو فداکارلیقیمدور کچیک اهدا یارالی

باخدی بیر قانه باتان سروره دولدوردی گوزین  
شه ایاقینه ادبله دوشنوب قویدی یوزین  
اذن آلوب ایتدی جهاد ایتماقا آماده اوزین  
دیدي سندن ایدرم دفع بلایا یارالی

ساقی عشق اونا ویرمیشدی ایله پیمانہ  
که اولوب مست گیدوب رزمگهه مستانه  
قائینه باتدی دولانندی گهر غلطانه  
قانه غلطیده یخیلدی او دل آرا یارالی

آری آری اونا کیم ویردی حسین جام وفا  
مست اولار نشئه دینیه تاپار قلبی صفا  
أف دیمز ورسالا هر قدر اونا زخم جفا  
یاره لردن او ایدر کسب مداوا یارالی

چکدی ترسانی صفا اهل صفانین صفینه  
ایتدی ملحق اونی اهل وفانین صفینه  
امتیاز آلدی قاریشدی شهدانین صفینه  
قائینی قانلارینا قاتدی او ترسا یارالی

## آمدن حضرت زینب (س) به بالین برادر

گورنه خوشبخت او گوزل تازه مسلمان اولدی  
 دوتدی قرآن یولی قربانی قرآن اولدی  
 او طرفده او دوشوب قانینه غلطان اولدی  
 بو طرفده یخیلیوب سرور بطحا یارالی  
 او غریبین باشی اوسته بیر او ترسا گلدی  
 او گلوب گتدی صورا زینب کبرا گلدی  
 دیه بولمَم که نجه دختر زهرا گلدی  
 گوردی خندان گله بَنَزَر گل زهرا یارالی  
 دیدی سن تک یارالی گوهر غلطان اولماز  
 گلستاندا بدنون تک گل خندان اولماز  
 من کیمی نغمه سی خوش بلبل خوشخوان اولماز  
 او خشارام داغ داش اولار منله هم آوا یارالی  
 ای اولان کشور جود و کرمین سلطانی  
 بیر نگاهیه موفق ایلین ترسانی  
 تائبه لطفیله سالسان نظر احسانی  
 اولار البته عزیز یکی دنیا یارالی

## غارت خیام زبان حال حضرت زینب (س)

گل غارته گتدی خمیه گاهون قارداش بیله قتل و غارت اولماز  
 محشر قورولودی خمیه لرده محشرده بیله قیامت اولماز  
 وحشت بوریبودی کربلانی وحشته دی نور دیده قزلار  
 صیّاد ستم مقابلینده آهو تک اولوررمیده قزلار  
 صحرايه قویوبلا یوز هراسان مین نازيله پروریده قزلار  
 بیر اهل حمایت آختارولار اما اولارا حمایت اولماز  
 بو خیمه عزّت و جلالون باخمازلا حریم کبریادی  
 باخمازلا که بو گل اوزلی قزلار ذریّه ختم انبیادی  
 الدن نَقْدَر گلور ایدولر هر ظلم و جنایت وجفادی  
 هرگز بشریت عالمینده بو ظلم بیله جنایت اولماز  
 از بسکه قاچو بلا ات دوشونده هر سینه ده تنگ اولوب نفسلر  
 از بسکه ایدوبله آه و ناله قزلار یورولوب باتوبدی سسلر  
 دوتقون سسیله اورکده وحشت بعضی باجی بعضی عمّه سسلر  
 وحشت دوتوب ایله کربلانی هیچ یرده بوقدر وحشت اولماز

بیر یاندا گلوبدی شور و شینه فریادیله نازنین اوشاقلار  
 وحشتدن اولوبدی پاره پاره بیر ستمده غنچه وش دوداقلار  
 بیرستمده چار نعل آتلار وحشت زده قزلاری ایاقلار  
 بو ظلمه بیله فشاره هرگز خرده بالالاردا طاقت اولماز

آهوی حرم گورور دالنجای صید ایتماقا قصد ایدوبدی صیاد  
 هولیله ملیر قاچور قاباقدا گوزیاشی یوزینده دلده فریاد  
 بیردن یورولور دُونور دالنجای صیاده باخور او قلبی ناشاد  
 قصد ایلوری قاچماقا ولیکن قاچماقه دیزینده قوت اولماز

وحشته دیورای آتلو گلمه قورخوتما بوزار و دلفِگاری  
 هر زیب و زریم واریدی آلدی آتدی بی بیم اشقیایه ساری  
 بیر تک بو عبا قالور باشمدا اسباب حجاب استتاری  
 اَلَم اونی ویرمَرَم که عورت بی ستر و حجاب عصمت اولماز

نهپ اولدی نه چوخلی گوشواره قارداش یارالاندی چوخ قولاقلار  
 وحشتدن اولوب بو قانلو چولده صد پاره نه غنچه وش دوداقلار  
 خار اوسته ایاق یالین قاچوبلار مجروحدی قان ویرور ایاقلار  
 اطفالیله یاره لر سسزیدار بونوعیله رمز رأقت اولماز

سجّاد یانور خیمده گوردوم بیر همّت زینبی یاراتدیم  
 جانان ال ازوب سَمَندرانّه از فکریمی از باشمدان آتدیم  
 وردیم اُزیمی اوتا او اوتدان سجّاد مریضوی چخاتدیم  
 دشمن دیدی قارداشی اَلن بیر عورته بو قدر همّت اولماز

سند نصورا عابدین باشندا شایانیدی تاج پادشاهی  
 سعی ایتدیم اونی چخاتدیم اوتدان زنده قالا مسلمین پناهی  
 دنیانی دوتار بلای مُهلک گر اولماسا حجّت الهی  
 بی یمن امام نعمت اولماز آفاق بدون حجّت اولماز

بو باغریمی دُنُرویدی قانه چون لاله بو خون دل یماق لار  
 سنسبز سارالوب ایله سولویلار باغینداکی گل جمال اوشاقلار  
 گر اولماسا باغبانی باغین گل برگ لری زغن ایاقلار  
 بورسمدی نانجیب لرده شرم و ادب و نجابت اولماز

قارداش نه سپاه شام و کوفه آفاقده ظلمیدن دویالار  
 اهل حرم حریم حقّه حرمت نه بو اشقیایه قویالار  
 هم قزلاریوی قوغوب یورالار ظلمیله ورالا هم سویالار  
 هرگز بیله قتل و غارت اولماز هرگز بیله هتک حرمت اولماز

آغوشینه جان کیمی باسوبدور بعضی آنا خرداجا بالاسین  
شوریله سالوبدی نینوایه فریاد ونوای غمفزاسین  
شام اهلی جفائیله سویوللار هم خردا بالانی هم آناسین  
غارت چوخ اولوب جهاندا اما بو طرزیه قتل و غارت اولماز

سجاده وی سوگلین رقیه آچمیشدی یر اوسته ایمدی تازه  
هر گونده کی عادتیه قارداش گوزلردی بالان سنی نمازه  
بیر پنجه زاغ سالدی نقشه روی گل گلستان نازه  
سانوبدی که زاغ پنجه سیله گل یوزده حضور صحبت اولماز

بو حال سنون ایراق گوزیندن ای خاتم الانبیا سلیلی  
زهرای سه ساله وین یوزیندن ضربتله اوتوردی نقش سیلی  
بیر لگه سالوب جمال ماهه گل رنگی دولاندی اولدی نیلی  
سولدوردی ایله او گل جمالی بیر ده او گله طراوات اولماز

یوخ امن و امانیز بو چولده ای امن و امانیز یارالی  
جانیز آرا قالب خطرده تهدیدیه جانیمیز یارالی  
شمر ایستوری قالماسون جهاندا نامیله نشانیمیز یارالی  
بی رحم اولی دوزدی اهل غارت اما بیله بی مروّت اولماز

بولمزله طریقه مروّت بو آتش جهله او دلانان لار  
هریاندا دوتوب وروب سویالار اطفالوی الهی دانان لار  
فریادیله صاق صولا قاچولار دامنلری اود دوتوب یانان لار  
سسله گلون هرایه یاندوخ اما اولارا اعانت اولماز

تائب که بیز آل مصطفایه از خدمتینی بولور فریضه  
نی تک گلی روز و شب نوایه اشگیله یازار بیزه عریضه  
مشمولدی درد بی دویاه ایستر او شفا جوان مریضه  
الله دن آل ازون شفاویر اوزگه ایله طبابت اولماز

فقره ای از زیارت عاشورا  
لعن حق گلسون ایله امته که  
منع ایدر سیزلری مقاموزدان  
یاسالار ایله مرتبت دن کیم  
یتشوب ذات لاینا موزدان

لَعْنُ اللَّهِ أُمَّةً مَنَعْتَكُمْ عَنْ مَقَامِكُمْ وَأَزَالَتْكُمْ عَنْ  
مَرَاتِبِكُمْ رَبَّتْكُمْ اللَّهُ فِيهَا

## زبان حال حضرت زینب (س) در حال اسارت

سند نصورا دنیا گوزومه تنگدی قارداش  
 آئینه قلبیم هدف سنگدی قارداش  
 الدن گیدوب ئیل بی کس و بی یار و ظهیرم  
 محنت زده مقهوره اشرار شریرم  
 باخماز که قولی باغلی بلادیده اسیرم  
 شمیرن گنه قصدی منیلن جنگدی قارداش

صبر اوسته و ارام صبریله هر قدر اولا مقدر  
 سودای وفائیله و اریمدور سر پر شور  
 چول قورخولی دور دور و بریم دشمن مغرور  
 یول داشلیق اوزاق منزل ایاق لنگدی قارداش

چون طایر پر بسته ازوم قلبی یارالی  
 کاشانه نی گوزدن ایتیرن باشی بلالی  
 صید ایتماقا بیر طایر پر بسته و بالی  
 هر یاندان آتک لر دولوسی سنگدی قارداش

وارمنده رضا یاغدیرا گر امر قضا تیر  
 دلشاد اولارام هر نه قدردن گله تقدیر  
 یوخ شکوه سخا هر نقدر بوینومی زنجیر  
 عنقایه ولی طوق جفا ننگدی قارداش  
 بو گلشن عشقون ایله بیر حاله قالوبدور  
 گل یوزلیلرین رنگی سولوب هم سارالوبدور  
 بیر خرده قزون زمزمه شور سالوبدور  
 بو قافله ده مرغ شپاهنگدی قارداش

الفت سوز و موز صحبت دیرینه ده قالدی  
 یار عکسی دوشوب دلده کی آئینه ده قالدی  
 مین لر دیمه لی درد یانان سینه ده قالدی  
 مالک یارالی سینه آرنگدی قارداش

ماتم زدییه رسمدی هم ماتم اولالار  
 قارداشی آن بیر باجیه همدم اولالار  
 فریاد و نوائیله شریک غم اولالار  
 تسکین ویرنیم لیک دف و چنگدی قارداش

۱- آرنک درد و محنت

آل اموی عترت طاهانی و رولار  
 خردا بالانی مادر نالانی و رولار  
 دانش یارادان ساجد دانانی و رولار  
 بوقوم ایله بی دانش و فرهنگدی قارداش

شامه گیدورم شوريله شوریده سریم وار  
 بیر ناله شبگیريله آه سحریم وار  
 هشتاده یاخین اهل عزا همسفریم وار  
 ماتم زده لر منله هم آهنگدی قارداش

بیر قافله عشقده سرخیل قطارم  
 ظاهرده اسیر ستم قوم شرارم  
 باطنده سنون عشقوه دل بسته شکارم  
 عاشق لر آرا کیم منه هم سنگدی قارداش

عشقونده اولان عشقیله دلده هوسیمدی  
 دل ناله جانکاهی منیم هم نفسیمدی  
 یول اوسته رُقین سسی بانگ جرسیمدی  
 بو قافله عشقیم ایچون زنگدی قارداش

بیر قافله هممه دی منه درد و بلالی  
 قارداشی اَلن اوغلی اَلن یاسلی عزالی  
 سرخیل قطارم من اُزوم سینه یارالی  
 بیر بیر لریله قافله هم رنگدی قارداش

تائب ره عشقونده سانار شهد شرنگی  
 بیر عمر وروب صدقیله دامانوزه چنگی  
 محشرده رضا اولما سیاهی دوتا رنگی  
 بیر خادم یک چهره دی یکرنگدی قارداش

تائب که وفاداردی پابند و ثاقدی  
 دنیاسی گچوبدی سیزه عقباده قوناقدی  
 کم مرحمت اولسان گر آقالیقدان اوزاقدی  
 هم نوکروزه روز جزا ننگدی قارداش



### زبان حال حضرت زینب (س) در قتلگاه

از بس یتوب حسین غم و ابتلا منه  
زندان تار اولوبدی بودار فنا منه

قلبیم سنوبدی نی کیمی دائم سزیلدارام  
دارنسا اولوب یارالی نینوا منه  
خیمم یانوب ایویم یخیلوب باغلانوب قاپیم  
بی خانما نلیقی یازوب امر قضا منه  
ئلیسز آدامسیزام قریلوب ئل لریم تمام  
اغیار اسیریم داخی یوخ آشنا منه  
بیرگونده یددی قارداشیم الدن گیدوب منیم  
ورد زبان اولوب یارالی وا اخا منه  
سلطان لافتی قزی مردانه زینبم  
نامردلر ورویدیلای قید جفا منه  
امنیتیم گیدوبدی امانسیز لار ال تاپوب  
سس ویرامان یارات ای امین الورا منه

اطفال بی پناهه پناهم پناه خلق  
کهف الاماندی لطف حق کبریا منه  
دردیم اورکده چوخدی گنه دردیم آرتوری  
دردین دینده عترت آل عبا منه  
بونازدانه قزلارا دشمن آجیقلا نور  
وحشت زده ازیں یتورور هر بالا منه  
ایله یانقلی سوزلریله یاندرور منی  
آرتور بو اودلی سینه ده سوز خفا منه  
الله بولور گچن گجه نه چکمیشم حسین  
بیر نیم سوخته چادر اولموش سرا منه  
یانمیش چادر دا صبح آچیلینجا یاتانمادیم  
یاتماق حرام اولوب شه گلگون قبا منه  
قزلار سزیلدادی یارالی من سزیلدادیم  
من هم نفس نوائیله همدم نوا منه  
گوگلوب غبار غم له دولی اولدی ناگهان  
یانموش چادر او حالده دارالصفا منه

بیر اهل درده طالبیدیم با هم آغلاشاخ  
 درد اهلیم او آغلاماق اولسون دوا منه  
 گلدی آنام هراییمه تک قویمادی منی  
 اولدی او حالده اوز آنام همصدا منه  
 بولدوم گلوبدی شام غریبانوه سنون  
 هم سر سلامتی ویره خیرالنسا منه  
 هر گاه تاپمییدی آنام فاطمه منی  
 شاید که آل تاپیدی اجل بر ملا منه  
 معلوم اولان گنه دولانور قتلگاه ده  
 هریان یتورشمیم گل مصطفا منه  
 بیر گونده دوندی دور زمانه یارالی گور  
 یوز دوندروب نه عالم محنت فزا منه  
 زهرا عزیزی اولموش اسیر اهل ذلته  
 چوخ چوخ گران گلور بیله بیر ماجرا منه  
 من زینبم عزیزه ملک حجازیدیم  
 بو ذلت اهلی طعن ایدور ایمدی ایا منه

گندی سنیه شادلیقیم ای خوش گونوم حسین  
 سنسیز اولوبدی دار بکا کربلا منه  
 افسوس یوخ امان که دیونجا من آغلیوم  
 من آغلینده مانع اولور اشقیا منه  
 من آغلینده طعنیله دشمنلریم گولور  
 هر دم ورولاً زخم دل جانگزا منه  
 هاردا وراً آغلاسا قارداشلاری اُن  
 شمر و سنان گورور بیله ظلمی روا منه  
 دشمن دانشدیراندا ورار گرویرم جواب  
 بیرده ورار جفائیه چوب جفا منه  
 الله یولوندا منده دوگوللم آنام کیمی  
 مشقین ویروب دوگولماقین اول با وفا منه  
 قلبیم سنوب یارالی اورکدن یارالیم  
 از بس وروبدی بو آجی دلر یارا منه  
 گلدیم گیدنده بیر دولانوب باشوه گیدم  
 یتسون زیارتونله فیوض علا منه

قول باغلی سینه داغلی باجون سندن آیریلور  
 دورویر دعای خیر روان دعا منه  
 چوخ چوخ آغیر سفردی آنام اوغلی بو سفر  
 شامل اولا بو سیرده لطف خدا منه  
 سالم دیار شامه چاتا بلکه قافله  
 حاصل اولا او شهرده هر مدعا منه  
 سجاد منبر اوسته ديه مدح مرتضا  
 احسن ديه اویرده بابام مرتضا منه  
 شاماتی فتح ایدوب یخام اوردا یزید ایوین  
 عنوان افتخار اولا فخر التقی منه  
 ویرانسرای شامه ورام پرچم حسین  
 بو داغلی سینه ده بودی عمده منا منه  
 من تائبم شهان جهانه باش اگرم  
 آد قویسالار حسین قاپو سیندا گدا منه  
 اولسام حسین گداسی غنی اولام اوندا من  
 دست نیاز آچاللا هامی اغنیا منه

### زبان حال حضرت زینب (س) در سر نعش برادر در قتلگاه

ال تاپدیلار بو چولده حسین اشقیا سنه  
 شرم ایتمیوب ووروبلا بو قدری یاراسنه  
 نه بیر نه اون نه یوزدی یاران سانه گلموری  
 سانسیز یارا دگوب شه گلگون قیاسنه  
 هانسی غمون بیان ایلیم گوز یاشی توکوم  
 یا اوخشسوم نه دللریله یا انا سنه  
 دوشدون وطندن آیری غریبانه چولره  
 اولدی وطن بو بادیه کربلا سنه  
 الکه غریب تل آرالی سن ازون غریب  
 اغیار ایچینده اولمادی بیر آشنا سنه  
 یالقیزلیوب بو دشته نامردلر سنی  
 ای راد مرد آچدیلا ال اشقیا سنه  
 سانموبلا خلقتین یارالی آبروسی سن  
 بی آبرولر ایلدیلر چوخ جفا سنه


هل من معین دیدون کمک آختاردون اولمادی  
 بیر کس او گیر و دارده ویرسون صدا سنه  
 یالقیز گوروب توکولدیله یوزمین نقرشقی  
 شرم ایتمیوب وروب یارا اوستن یارا سنه  
 دوشدون یارالی سن سوکنارینده آج سوسوز  
 بیر قطره ویرمدی سو او قوم دغا سنه  
 یتدون اوروج آغز آنام اوغلی شهادته  
 افطار حاضر ایتدی بابام مصطفا سنه  
 اصل نمازی یخدی نماز اهلی غرقه خون  
 ایتدی هجوم او طایفه بی حیا سنه  
 اُدوردیلر نمازی گیدوب قیلدیلار نماز  
 گوردی نماز اهلی او ظلمی روا سنه  
 صحرای کربلانی بهشت عطری چولقیوب  
 هر دم آسور دگور دم باد صبا سنه  
 قرآنی سن شهادتیه زنده ایلدون  
 قرآن دا اوز دلیله دیر مرحبا سنه

شاهد همین بو عرضیمه قرآندا آیه وار  
 شامل اولار او آیه (۱) شفیع الورا سنه  
 اللّٰه یولوندا ایلموسن قانونی سبیل  
 اللّٰه ذوالجلال اُزیدور خونبها سنه  
 یازدون رواج دینه قانیه کتاب لر  
 اللّٰه ایدوبدی عزّت دارین عطا سنه  
 دنیا نقدر وار اولاسان یاد خیریه  
 تقدیس ایدلله حشره کیمی ماسوا سنه  
 روز جزاده تاج شفاعت باشوندا وار  
 مخصوصدور شفاعت روز جزا سنه  
 جدّیمن ام ایمن ایدوب بو حدیثی نقل  
 وار بو شهادتونده جزای علا سنه  
 حور و ملک فلک هامی ذرّات کاینات  
 آغلار نوائیه شرف نینوا سنه  
 قویمازلا یرده آغلاماقا نازلی قزلارون  
 آغللا گویده شوریه اهل سماسنه

یکسر مقرّبین خدا ساکنان عرش  
 ایلله عرش اعظمی دارالعازا سنه  
 بو سهلدور مصیبتوه یرگوی آغلوری  
 گلموش عزا دوتا بابامیز مصطفا سنه  
 جدّیم آتام یارالی آنام قارداشیم حسن  
 ایلوبله قتلگاهوی ماتمسرا سنه  
 باهم اولونلا اهل کسا قتلگاه ده  
 ماتم دوتوبلا خامس آل عبا سنه  
 بو قتلگاهه جدّیميله انبیا گلوب  
 آغلار تمام سلسله انبیا سنه  
 دنیا بوی زیارتوه اوصیا گلر  
 آغلار تمام قاطبه اوصیا سنه  
 ای معدن سخا هامونون سنده وار گوزی  
 دست نیاز آچار هامی اهل سخا سنه

ألسون باجون هانی بس اوالدن دوتان الون  
 کیم قطع ایدوب آپاردی کیم ایتدی جفا سنه  
 تائب سریر ملک قناعته شاه دور  
 چوخ فخر ایدر یازیلسا قاپوندا گدا سنه  
 بیر باخماقون منی ایکی دنیا ایدر غنی  
 ای کمترین گدا ساییلان اغنیا سنه

لطف ایله بیرده دوز سال آزون یازدقیم سوزه  
 شیرین یازوم یازاندا مدیح ورثا سنه




## عشق و امام حسین (ع)

قورتولدی روزگاریم دل داغدار قالدی  
 صیقل شکست اولدی آئینه تار قالدی  
 نه نوع توپراق آتدا ریشه قالار آقاجدان  
 گتدیم دلیمده آرزیم تاپدی قرار قالدی  
 وار هانسی مهربانیم دوتقون بو قلبی آچسون  
 دل داغلی لاله لر تک دل داغدار قالدی  
 بو عمر پنج روزه چون باد برق گتدی  
 درد آشنا اورکده دردییم هزار قالدی  
 بیر گون دو تار یقین ایت قانیم سنی ستمکر  
 من گتدیم انتقام دورمدار قالدی  
 دنیانین عشرتيله مندن داخی آینماز  
 آئیمدا یار ایویندن کیم بو غبار قالدی  
 من عاشقم ایله بیر معشوقه یوخدی مرگی  
 اُسم ده دلده زنده عشق نگار قالدی  
 من عاشق حسینم معشوق سرمدی دور  
 جاوید عشق اونندان بیر یادگار قالدی

عشق اوسته گجدی باشندان عشق اوسته دویدی جانندان  
 دللرده گل آدی تا وار روزگار قالدی  
 گلزار دینه قانندان سو ویردی ایتدی سیراب  
 کرب و بلاده اونندان بیر لاله زار قالدی  
 اوردا خزان دینی دوندردی نو بهاره  
 گلزار دین و قرآن دائم بهار قالدی  
 یتیمیش ایکی شهیده ایچدیردی باده عشق  
 هر تک تکی یخیلیدی مست و خمار قالدی  
 گلزاردن ال اوزدی اسلام باغبانی  
 نه گل قالوب نه بلبل نه شاخسار قالدی  
 صحرای کربلایه گلمیشدی بیر ئلیله  
 ئل کوچدی گتدی دوشدی ئیلدن کنار قالدی  
 قول باغلی شامه گیتدی بیر شیرخوار آناسی  
 سود سوز آنادان آیری بیر شیرخوار قالدی  
 هشتاده دین اسیر سینه یارالی گتدی  
 یتیمیش ایکی شهید تن زخم دار قالدی

سرنیزیه وریلدی یتیمیش شهید باشی  
 توپراقلار اوسته نعش هر سربدار قالدی  
 قان ایچره دوشدی یورقون اسلام سرقطاری  
 زینب اونون یرینده بیر سرقطار قالدی  
 میندیردی اهلیتی یرده قالب اوزی تک  
 بیر ده امام ساجد بیمار وزار قالدی  
 شرم و حیالی زینب صاق وصولا باخاردی  
 سویلردی نه مُعینیم نه غمگسار قالدی  
 یارب اسیر قوم بی شرم و بی حیایم  
 بی شرم الینده شرم کامل عیار قالدی  
 یوخ محرمیم دیم تا ایتسون سوار ناقه  
 نامحرم ایچره بیکس بودلفگار قالدی  
 سجّاد او حالی گوردی جوش ایتدی غیرتیندن  
 نه صبر ایده بولوب نه دلده قرار قالدی  
 فرمایش ایتدی عمّه الموب هله بو سجّاد  
 بیر بیله گونده سن تک بی یاره یار قالدی

قیلام سوار اُزوم من ای آبروی عفت  
 تاسانماسونلا یرده روح وقار قالدی  
 بوکدی دیزین قویاندا زینب قدم یخیلیدی  
 قارداش بالاسی عمّه بی اختیار قالدی  
 میندیردی عمّه سین چوخ رنج و مشقتیله  
 یرده اوزی پیاده اول شهسوار قالدی  
 سجّادی مندیروب کیم یازما اماندی تائب  
 خامه دایانندی تاپدی سوزا استتار قالدی



## قتلگاه زبان حال زینب کبرا (س)

قوی دیوم گلوب باشیمه نلر  
 کربلاده سندنصورا حسین  
 درد و غصّه یالقیزلیوب منی  
 اولموشام اسیر بلا حسین  
 آفتاب عمرین باتان کیمی  
 قاره یل اسوب گتدی گرد غم  
 گون دوتولدی گوندوز گوزی عیان  
 اولدی کربلا لیلّه ظلم  
 چخدی قوم خفاش لانه دن  
 جرأتیله ایلوبله قد عَلم  
 قصد غارتیله تبوکولدیلر  
 خیمه گاهوه بر ملا حسین

غارته ال آچدی جفائیله شام و کوفه نین اهل غارتی  
 آلدورون سویون بانکی چولقادی کربلای پر خوف وحشتی  
 هم وراردیلارهم سویاردیلار خاندان ختم رسالتی  
 هم سویولدیلارهم دؤولدیلر اهل بیت آل عبا حسین  
 اوت ورا ورا خیمه گاهوه باشلیوبله شام اهلی هلهله  
 سالدیلار خیام طهارته بانگ هایه شور و لوله  
 آشیانی یانموش همالین لانه دن چخوب قاچدیلار چوله  
 لانه سی یانان بیر کبوترین وار هاراسی گتسون هارا حسین

وحشته دوشن نازلی قزلارین آت دوشینه اشرار سالدیلار  
 هم قوغولدیلار هم یورولدولار قورخودان سولوب هم سارالدیلار  
 توپراق اوسته بی حال دوشدیلر هم ایاق لار آلتندا قالدیلار  
 بیر نفر مسلمان تاپیلما دی قزلاریوا حامی اولا حسین  
 سوزویروب ازل گون سوزالمیشام تاوارام و ارام بو سوزا اوسته من  
 سالمادیم گوزیمدن اوشاقلاری ساخلادیم ازون تک گوز اوسته من  
 هر بالایخیلمیشدی تیز آلوب رأفتیله باشین دیز اوسته من  
 جان بالا خطاب ایتمیشم ازوم عمّه سسلیوب هر بالا حسین

اهل کینه اطرافیمی آلوب ظلم اودیله یاندیر دیلار منی  
 بیلدیلر منم مرتضی قزی بو عداوته وردیلار منی  
 تازیانه لر یاغدی باشیمه وردیلار منی یوردیلار منی  
 دوزدوم از آنام فاطمه کیمی ایتدیلر تقدری جفا حسین  
 یاندی خیمه لر قاچدیلار چوله خوفدن بنین قورخودان بنات  
 قلب نار نمروده قالب و وارث خلیل (سوه ثبات  
 تیز ازمی وردیم یانار اودا قطب عالمه تاویرم نجات  
 باغریما بسوب جان تک ایلدیم حجّت خدانی رها حسین



گون باتوب قرالدی شفق قالب طایران قدس آشیانه سیز  
صبح ایدر نجه قورخولی گجه قورخولی بیاباندا لانه سیز  
بیر یانان چادردا یغشدیلار ایتدیلر سحر آب و دانه سیز  
من نجه گجه ایلدیم سحر شاهدیم دی ذات خدا حسین  
هر نه سن دیدون آیریلان زمان بیر دقیقه یاددان چچامتادیم  
ای پیمبرین نور دیده سی نازلی قزلاری گوزدن آتمادیم  
یاتدیلار قوری یرده قزلارون صبح اولونجا من لیک یاتمادیم  
کنج غمده راحت نجه یاتار بیر بلالره مبتلا حسین  
هر اسیر غم دیزینده باش او دلی آهیله سینه داغلا دی  
هر عزالی دولدوردی گوزلرین اشگ آلی رخساره باغلا دی  
هر عزیز الموش عزیزنه گزین اوخشادی گزین آغلا دی  
اشقیا ویروردی مگر امان قزلارون او جالدا صدا حسین  
انجیدوب وروب یورموشیدی چوخ بسکه زینبون لشکردنی  
هوش آپاردی بیرقدر گوردوم از فاطمه انام سسلدی منی  
زینبیم نه یاتماق زمانیدور بیله ساخلا مازار یتیمه نی  
خردا فرلاری سایدیم اوندا وار بیلدیم اوز گه بیر ماجرا حسین

قزلارین بیری خیمه دن چخوب یوزقویوب چوله اضطرابیله  
چخدوق ام کلثوم بیله دیشره خیمه گهدن شتابیله  
گوردوق ایسلادوب کربلا چولون دیده دن سپن اشگنا بیله  
بولدوم آغلیه آغلیه گلوب قتلگاه اول دلربا حسین  
مقتله یتنده نه گوردوخ اول نازدانه دردانه آغلوری  
شور عشقیله ایلیوب اُزین شمع عشقه پروانه آغلوری  
هی دولانوری باشوه سنون اوخشوری یانایانه آغلوری  
بیزده اوخشادوخ بیزده آغلادوخ ایتدوخ اونلا با هم نواحسین  
عمه سین گورنده اورکلنوب توکدی گوزلری قانیاش آغلا دی  
نوحه باشلا دی نوحه خوان لیقا ایلدی بیزی یولداش آغلا دی  
ایله اوخشادی ایله آغلا دی سس سسه ووروب داغ داش آغلا دی  
واپا دینده او خردا قز لرزه ایتدی عرش خدا حسین  
نائل اولدوخ اول زیارته اول وفالی شیرین زبانیله  
ایلدی بیر آز سنله درد دل سوگلی قزون خوش بیانیله  
سس سسه ووروب نوحه باشلا دی بیز او خرداجا نوحه خوانیله  
بیزدیدوخ یانایانه و اخا نازنین بالان واپا حسین

شکویه دل آچدی سولان گلین نیش خار ظلم زمانه دن  
 دویمادی خوش آواز سوگلین آه و ناله عاشقانه دن  
 گل جنازَن اوسته اوبلبلین اولدی خسته دوشدی ترانه دن  
 یاندیم آغلادیم حالینه یانان قلبیمه اوتوردی یاراحسین  
 رأفتیله آلدیم کناریمه اول حیا و عفت عیارینی  
 دل دیوب دله دوتدوم عاقبت مهریله محبت شکارینی  
 یوللانوب یانان خیمیه طرف بوس ایده ایده گلغذارینی  
 خیمیه یتوردوم کنارینی آلدی نچه خرده بالا حسین  
 آلدیلار خبر هاردا قالموسان سالموسان بیزی درد فرفته  
 سویلدی بابام عشقی باشیمه دوشدی چکدی کوی محبته  
 گتدیم اول آچدیم ازوم یولی نائل اولدوم اول زیارته  
 اهلبیت ایشیتدی بو صحبتی شور محشر ایتدی بپا حسین  
 بیر بیره دگوبلر یانان چادران اوجالدی وا غربتاسسی  
 آغلادی اوغولسولار اوج ایدوب عرشه قزلارین و ابا سسی  
 قارداشی اَلن باجیلار گلوب داده قوزانوب و ااخاسسی  
 و اخادیدی آغلادی باجی وای اوغول دیدی هر انا حسین

بو گچن گجه چکوشم نه لر عرض اولوندی شرحاً حکایتیم  
 کاش آچلمییدی سحر تاپوب آیری رنگ درد و مصیبتیم  
 داغلی دله وار داغ حسرتیم قوللاریمدا قید اسارتیم  
 شام شومه قول باغلو یولاً نور کاروان کرب و بلا حسین  
 آل عصمتی قوم اشقیا باغلیوبله ظلمیه قول قول  
 دوره ده گورور قانلو قاتلی قزلار آز قالور غصه مرگ اول  
 دور بو کاروان محبتی سال محبتیله ازون یولا  
 بی پناه اولان اهل بیتوی بویول اوسته ایله دعا حسین  
 شمر فکره سالمور که رشته عشق قلبیله باغلیم سنه  
 حَبْرُ ایلوری، روحی روحدن قویموری اورک داغلیم سنه  
 بیر حجاز لحنیله او خشیم بیر دیونجا من آغلیم سنه  
 نیلیوم قالام ممکن اولمادی تا سنه دوتیدیم عزا حسین  
 ویرمدی امان شمیرله سنان نعشون اوسته دل داغلیا نمادیم  
 شیونیه وای قارداشیم دیوب گوزیاشین یوزه باغلیا نمادیم  
 قارداشی الن باجیلار کیمی سس چکوب سنه آغلیا نمادیم  
 قالدی دله داغلار بویی غمیم غمله سندن اولام جدا حسین

بوردا اولمادی فرصت آغلیام سیر ایدوب بیاباندا آغلارام  
گون ایوبنده گه ناقه اوسته گه شیونیله زنداندا آغلارام  
واردی تانفس سینه داغلارام واردی تانجانیجهاندا آغلارام  
آغلاماق بوشالدار اورک غمین درده اشگیم ایلردوا حسین

هر بلا گله راه عشقده گلرم دله شکوه ایتمیرم  
باشون عشقی قارداش چکرمنی از باشما شاماته گترم  
گریاشون دالنجاسورونمه سم مقصده چاتوب کامه یترم  
یولدا انجیمده دارخمارام گریاشون اولارهنما حسین

هربلایه صبر ایلیوب آنام من او فاطمه یادگاریم  
او آتام علی دستیاریدور من حسینمون دستیاریم  
ظاهراً اسیرم بو دشمنه باطناً محبت شکاریم  
بیر اسیر عشقین نه لازمه قوللارینا قید جفا حسین

تائبم محبت شکاریم دوشموشم بلا دامینه اسیر  
صرف عشقون اولموش جوانلقیم اولموشام سنون عشقوله پیر  
قبریون طوافیندن اتری چون برگ بید گوگلرم منیم اسیر  
ایسته کربلانی گوروم اوم ای شهشه کربلا حسین

ای آخان قزلقانی ایلین کربلا چولون گلشن صفا  
از آدی دوا صحبتی شفا جان مرتضی روح مصطفی  
تائبین جوانی مریضدور از مریضینه ایستوری شفا  
ویر آزون دوا نسخه سین اونا لطف ایله کلی شفا حسین

### پند و اندرز گریز به قتلگاه

چوخ دوشر زحمته هر کس که سبک بارد گل  
چکمین بار وفا یار وفا دارد گل

زر بی غش عیارین محک ایلر اعلان  
لیک قلب اولسا قزل قابل معیار دگل  
باطنی اولماسا بی بهره دی ظاهر سازی  
مغز سیز پُستیّه تک رویتی مقدار دگل  
گیدیروب باطله حق جامه سی حق اُدوروری  
حق با اینکه بولور قابل انکار دگل  
دوتما یاشیخ بلد مست گریبانیندن  
که او پیراهن هشاردی دستار دگل  
چکمه قاضی ایوینی مست اوزوینه قورخوتما  
چون که قاضی ایوی جز خانه خمار دگل  
دیمه مست اولموسان از بس ایتیروبسن یولیوی  
یول گیدنده نه گنه وار یولی هموار دگل  
کفلینی مسجده چکمه دیمه یات مسجده  
کنج مسجد حرم مردم بدکار دگل

دیمه ویر بیر نچه دینار ایدوم آزاد سنی  
 شرع ده حکم ایلین درهم و دینار دگل  
 دیمه سوی پالتاریوی ویر ایلایق جرّمه حساب  
 چورین جامه داخی رایج بازار دگل  
 دیمه یوخدور خبرون بورکده دوشوب باشیندان  
 عقل لازم باش آچیقلیق کیشیه عار دگل  
 دیمه می چوخ ایچوبسن سنی چوخ مست ایلوب  
 بورا که جای کلام کم و بسیار دگل  
 دیمه که حدورا هشیار گرک مست اولانا  
 مست ایدوبلر هامونی کیمسنه هشیار دگل  
 اولسا هشیار بیلر شهرده مسئول نه وار  
 شهر مسئولی صد افسوس که بیدار دگل  
 دست فرهنگ شهرده یارادار فرهنگی  
 صدر فرهنگده کی کارکن کار دگل  
 باطل اللر اوزانوب پرده چکوب حق اوسته  
 حق پس پرده ده پنهاندی پدیدار دگل

عدلی الدور سلّه هر یرده اولار ظلم پدید  
 اوندا ظلم اهلینه ظلم ایتماقی دشوار دگل  
 عدل ایدر حکم حکومتلر علی وار اولسا  
 هچ حکومت اولا افسوس علیوار دگل  
 شمر عدل ایتمدی ظلمیله حسین اُلدوردی  
 دیموب اُلدورماق او مظلومی سزاوار دگل  
 گوردی زینب یخلوب سرو سمنبار علی  
 ایله یورقوندی که آماده رفتار دگل  
 قریلوب قول بوداقی یوخدی بدنده باشی  
 باشینا سایه سالان سروسمنبار دگل  
 دیدی یوخ سن تک اولان کُشته بیداد حسین  
 من کیمی بیر باجی مظلومه دلافگار دگل  
 بیچدیلر اگنیمه بوچولده عزا جامه سینی  
 دهرده من کیمی هچ باجی عزادار دگل  
 شمر غیظیله ورور انجیدیری قزلاریوی  
 دیه سن بوبالالار عترت اطهار دگل

آغلینده بالا قزلار دیوری آغلامیون  
 بیله ده ظلم اولی سوز قابل تذکار دگل  
 نازیله بسلنن اطفال اولوب اعدایه اسیر  
 یتن امداده به جز دیده خونبار دگل  
 نیلسون آغلاماسین بیر آتاسیز خردا بالا  
 آتاسیز آغلاما قا یوخسا که ناچار دگل  
 هانسی مذهبه یتیم آغلا سا منع ایلر  
 بسته هج مذهبه بو شمر ستمکار دگل  
 گاه سیلی وروری ظلمیله گل یوزلی لره  
 یوخ دین سیلی سزای رخ گلنار دگل  
 سیلی شمرها را عارض گلنار هارا  
 جرأت خار ردیف گل بی خار دگل  
 گاه زنجیر ورور گردنینه سجّادین  
 جای زنجیر دیمور گردن بیمار دگل  
 آتش عشق حسینیه یانا هرکس تائب  
 روز محشرده یقین همنفس نار دگل

### زبان حال حضرت زینب (س)

قتلگاهون کیمی گلشن گورن اولماز یارالی  
 زینبون تک گل ماتم دَرَن اولماز یارالی  
 بیر طرفده گورورم پرپر اولان گلریوی  
 قانه آغشته دوشن سوسن و سنبل لریوی  
 بیر طرفده گورورم غمزده بلبل لریوی  
 من کیمی غمکده گلشن گورن اولماز یارالی  
 گل آچوب گل یارائیله یارالی گل بدنون  
 یخلوب سنله نچه عاشق گلگون کفنون  
 عالم عشق و محبت یارادوب انجمنون  
 بیله عالم بیله بیر انجمن اولماز یارالی  
 یوزلره گل کیمی بو گلشن عشقون گوله جاق  
 گلشنون قدری ندور اهل محبت بوله جاق  
 گل آدون دلده هامی دسته بدسته گله جاق  
 گلی چوخلار ولی بیز تک گلن اولماز یارالی

بویانوب قاینه چوخ قافله سالار دوشر  
 طعنه خار گوروب چوخ گل بی خار دوشر  
 چوخ ایاقدان یارالی سرو سمنبار دوشر  
 سن کیمی لیک ایاقدان دوشن اولماز یارالی

جبر چوخ بلبل شیدانی چمندن آیروب  
 سندیروب بال و پَرین سرو و سمندان آیروب  
 چوخلارین دست جفاکار و طندن آیروب  
 سن کیمی کیمسه جلای وطن اولماز یارالی

گرچه بی شرمدی اوز قانوه غلطان ایدنون  
 گوینگونه آپاروبدور قویوب عریان بدنون  
 لیک وار خون شهادتله گوزل پیرهنون  
 هامویه قسمت ایله پیرهن اولماز یارالی

قان دولوب باغریما دل قانی دمامد یریم  
 نقدر آلمه میشم اگنیمه قاره گیرم  
 نفسیم هر نقدر واردی حسین وای دیرم  
 من تک عالمده حسین وای دین اولماز یارالی

بیر قوشون لانه سی یانسا چمنی نیلیوری  
 کوی معشوق غریبی وطنی نیلیوری  
 وادی عشق قتیلی کفنی نیلیوری  
 فدیة دینه نیاز کفن اولماز یارالی

آزون عریان ولی وار قانیله گلگون کفنون  
 گل زهرا سن ازون پاره اولوب پیرهنون  
 هامو ایستر سنی دنیا دولوسی وار سونون  
 چوخ سون وار ولی من تک سون اولماز یارالی

مبتلا زینبوین هر نقدر مشکلی وار  
 مین او مشکل جه بو خدا قزوین نسکلی وار  
 ایله شیرین دلیلله او خوشوری شیرین دلی وار  
 بیله خوش لحن ایله شیرین سخن اولماز یارالی

آغلوری گوزدن آخان قان یاشیدا آغلادیری  
 غم قطارینده کی یار یولدا شیدا آغلادیری  
 ایله اوخشور یارالی داغ داشیدا آغلادیری  
 دیمه نازلی بالاوا سس ویرن اولماز یارالی

ای اولان ذکر شیفا بخش گوزل آدی دوا  
 تائبین قلبی ستقدور سال ازون نور صفا  
 وار مریضی او مریضه ایله اعطای شیفا  
 دردینه سن کیمی درمان ایدن اولماز یارالی

### زبان حال حضرت زینب (س) در قتلگاه کربلا

قارداش بو کربلانی عجب گلستانی وار  
بیر گلستانی رؤیت باغ جنانی وار

بیر لاله زار عشقدی وار چو خلی لاله سی  
هر لاله داغ آلوب دله قلبینده قانی وار  
بیر جویبار عشقدی جاریدی سرخ قان  
دوشموش ایاق دن نچه سرو روانی وار  
بیر گلستان عشقدی صحنینده باش ویروب  
توحید گل لری که بیوک داستانی وار  
بیر گلستان صفادی که گلزار سینده  
نسرین و سرخ ویاسمن و ارغوانی وار  
اکبر محمدی گلی قاسم گل حسن  
عبّاس ماه رو کیمی مزد جوانی وار  
بیر انجمن گل شرفه زینت آرتوران  
گل یوزلی اصغرون کیمی غنچه دهانی وار

توحید گل لریله دولوب گلستان ولی  
هم گل یارالی هم یارالی باغبانی وار  
باطنده گلستان همیشه بهاردی  
ظاهرده گرچه رؤیت فصل خزانی وار  
هر بیر گل اوسته شوره گلوبدور بیر عندلیب  
هر بیر گلین نوایه گلن نغمه خوانی وار  
گل لر تمام بیر یانا بیر یانه سن حسین  
سنله بو گلشنین شرف جاودانی وار  
قان صاحبی گلونجه آلینجا گوزل قانین  
گلزاریوین طراوتی وار عزّ و شانی وار  
بو گلستانی ترک ایده بیلمز گلوب گورن  
دهرین هایاندا بیله گوزل گلستانی وار  
بو گلستان دن دونه حاشا بو زینبون  
بو گلستان عشقده آرام جانی وار  
بیر سینهدن ویروب بیزه سوت فاطمه آنام  
بو شیر مادری ده هزاران معانی وار

مهر و وفا یاراتدی بیزی همدل ایلدی  
 بو عالمین جهان دولی شرح و بیانی وار  
 قویماز همان علاقه باجون سندن آیریللا  
 بو عاطفه او سوتدن اثر دور نشانی وار  
 افسوس جبریلله آیرور قائلو - قاتلون  
 اولموش اسیر قولدا جفا ریسمانی وار  
 گلموش یول اوسته قارداشنا درد دل دیسون  
 نه دردینی بولن نه ده دردین آلانی وار  
 گلموش گیدنده سنله خداحافظ ایلسون  
 فرصت بلالی زینبون نچه آنی وار  
 دردیم اورکده چوخدی سوزوم چوخ مجال یوخ  
 مانعدی باشیم اوسته مین اعدای جانی وار  
 عاشقدی زینبون سنه ای عشق جاردان  
 عشقونده گلسه هر نه بلا امتنانی وار  
 اما شکسته قلیمی چوخ سندیرویدیلار  
 سنمیش بو قلیمین نچه زخم زبانی وار

اللّهدان اتری آل بوستق گوکلونی حسین  
 اللّه سنق اورکدهدی اوردا مکانی وار  
 اطفال بی پناهون آپارسون هارا پناه  
 نه بیر پناهگاهی نه دارالامانی وار  
 گون پرتویله یاندی گل اوزلی بالالارون  
 نه کولگه بیر مکانی نه بیر سایبانی وار  
 بَنزَلَلَه قبول قانادلاری سنمیش کبوتره  
 نه آب و دانه نه اولارین آشیانی وار  
 زینب فدا او نحر اولونموش بوغازه کیم  
 حلقومی اوسته نقشه ضرب سنانی وار  
 قربان اولوم یارالی دوشن قائلو پیکره  
 نه زخمینین شمارهسی واردی نه سانی وار  
 قربان اولوم او نحره که مذبوح اولوب سوسوز  
 ذبح عظیمه قانیله شرح و بیانی وار  
 قانون گلوب آنجا بالان صاحب الزّمان  
 تشنه بوغازیوین گنه خون روانی وار



بیر گون گلر او مهدی موعود آلا ر قانون  
 مظلومین آری عدلیله قانین آلانی وار  
 خیمم یاناندا غارت اولوب احتشامیمیز  
 نه اهلیتوین ایوی نه خانمانی وار  
 اطفالوی یغوب باشا یانمیش چادردامن  
 قوردوم عزا بساطی بیوک داستانی وار  
 الله بولور یارالی نه چکدیم گچن گجه  
 ایل لرجه هر دقیقه ده دردگرانی وار  
 آغلاردی اهل بیت اورک ایستردی تاب ایده  
 گور زینبین نقدر اورکده توانی وار  
 یالقیز من اولموشام هامونین دردینه یتن  
 اهل حرم بوله اولارین جانفشانی وار  
 قورخان بالالارین گتورردی منه پناه  
 بیر بیر دیردی دلده نه درد نهانی وار  
 مهر و محبتیله آلاردیم کناریمه  
 بولسونله قزلارون اولارین مهربانی وار

قزلار سنیریلدادی ایلدی باغریقان منی  
 لاله کیمی بوداغلی دلین لخته قانی وار  
 گل یوزلی قزلار آغلیوب اغلاتدیلار منی  
 آغلار گوزیمین ایمدیده اشگ روانی وار  
 دوتدی غریبه شام غریبان غریب لر  
 زهرا کیمی اوشام غریبانه بانی وار  
 آلدیم کنار خیمه ده زهرا آنام سسین  
 گوردوم ایله سنیریلدیری تکلا فغانی وار  
 بولدوم آنامدا شام غریبانوه گلوب  
 آغلار یانار دلینده اوغولوای بیانی وار  
 گلدیم نوایه منده حسین وای دیه دیه  
 زینب کیمی آنام گوره بیر همزبانی وار  
 معلوم اولان که چوخ دولانوب قتلگاه ده  
 بو قتلگهده نکهت عنبر فشانی وار  
 آخמוש بو چولده قانونیله اشگ فاطمه  
 خاک شفادی توپراقی آرز گرانی وار

زهرا آنام اُپوب بوغازون منده قوی اُیوم  
 بو حلق نازی اُپماقین ارز گرانی وار  
 بو سرزمینی سن ایله دارالامان خلق  
 زینب گیدور و لیک نه امن و امانی وار  
 ناامن اولان بالاریوی باشینه یغوب  
 شامه گیدور گوره نجه دور زمانی وار  
 گوردوم دیار کرب و بلانین جفا سینی  
 شامه گیدوم گوروم نه جفای عیانی وار  
 سن آل کناره پریر اولان سرخ گللی  
 بیر دسته بلبل اُز باجوین همعنانی وار  
 گوزیاشلی باشلاسونلا نوالی ترانه لر  
 هر فردینین نوائیله ورد زبانی وار  
 بیر کاروان عزالیدی من روضه خوانیم  
 من روضه خوان رقیّه کیمی نوحه خوانی وار  
 نازلی رقیّه آغلاسا دنیانی آغلاردار  
 از بسکه خوش ترانه سی شیرین زبانی وار

بیر کارواندی اوغلی اُلن قارداشی اُلن  
 سجّاد کاردان کیمی سرکاروانی وار  
 امّا وروبلا گردنینه غلّ جامعه  
 سانموبلا کیم مریضدی هم خسته جانی وار  
 سن آل کناره نازیله شهزاده اکبری  
 زینب یانندا لیلی مجنون نشانی وار  
 سن دلشکسته قاسمی ساخلا محبّت ایت  
 منله آناسینون گجه گوندوز فغانی وار  
 سن آل علیّ اصغریوی سینن اوستونه  
 منله رباب دیده گوهر فشانی وار  
 سن ساخلا سرسپاهوی صحرای عشقده  
 بولسونله شاه عشقین عجب جانفشانی وار  
 اهل حرمدن اولما آنام اوغلی ناگران  
 زینب کیمی بالالاریوین پاسبانی وار

بو نازنین لرین چکرم نازینی اُزوم  
 آلام اورک لرینده نه درد نهانی وار  
 بیر گونده احتشامیم الیمدن گیدوب حسین  
 بو زینبین فقط قوری جانہ گمانی وار  
 روحیم سنہ فدادی قوری جان ندور حسین  
 صرف ایتمسم یولوندا بو جانی زبانی وار  
 اللہ یولوندا چون که آخوبدور گوزل قانون  
 علت اودور که قانونین ارز گرانی وار  
 ویردون گوزل طریقیله سن امتحانوی  
 بو زینبین قاباقدا بیوک امتحانی وار  
 نائب یخیل حسین کریم آستانینه  
 سلطان باکرمدی وسیع آستانی وار  
 خط امان آارسنی اهل بهشت ایدر  
 گورمز جحیم او کیمسه که خط امانی وار

### نصایح گریز به احوالات کوفه

هر بیر اورک که آینه حقنماسی وار  
 انوار کبریائیلہ صدق و صفاسی وار  
 سعی ایت حلاوت حسدی سینه دن بوشات  
 چون نیشکر بوشالسا شکردن نواسی وار  
 تقویٰ ضمیر باکیله دور نه لباسیله  
 وار چوخ پلید دل که نظافت لباسی وار  
 یاندیردی شمعی بی ادب ایولرده گولماقی  
 سانموب که گولماقیندا محلّ سزاسی وار  
 بی جا دانشما گولمه که بیهوده گولماقین  
 الدن آلا ر وقاریوی ننگین جزاسی وار  
 بتخانیه سالوب یولوی اولما بت پرست  
 گل هوشه هوش ایله که بو ملکین خداسی وار  
 سالماز اُزون دخیل سلیمانہ مورچه  
 هر قدر لانه سینده که قوت و غداسی وار

اولماز چراغ ره یاری یانمیش اودون سنه  
 یاندیر ایله چراغ که عالی ضیاسی وار  
 بیهوده ایتمه عمر گرانمایه وی تلف  
 آخر بوگوهرین بولوسن نه بهاسی وار  
 پُررولریندی یریزونون ناز و نعمتی  
 خون جگر بیر او که یوزده حیاسی وار  
 آقا مَنش یاشا گوزوم اولما گدا صفت  
 ال دوت که ال دوتان لارین عالی جزاسی وار  
 گُربَه خصال اولماز اولان نوکر حسین  
 چون سفره حسینین اونا اکتفاسی وار  
 بیگانه سفره سی باشنیا گیتسه ننگدور  
 ارجی گیدر دُولله دُوگولماق سزاسی وار  
 کلب حسین یازدیر آدون ویر وفانشان  
 قیمتلیدور او کیمسه که مهر و وفاسی وار  
 گنمه بیزید سفره سینین باشینه گوزوم  
 هر لقمه سینده مین اثر کفر زاسی وار

هر کس اولا گدای در خانه حسین  
 مطلق غنی دی چون که حسین تک آقاسی وار  
 الله و یروب حسینه گوزل شوکت و جلال  
 وصفه قلمزنین قلم نارساسی وار  
 دنیا سولارینا سالوب از بس محبتین  
 عالم ایچوبدی دلده او مهر خفاسی وار  
 گر چه اوزی جفائیله خانه بدوش اولوب  
 اما هامی اورکده محبت سراسی وار  
 عالم سُور مرامینی قربان مرامینه  
 اولموش فنا مرام یولوندا بقاسی وار  
 گاندی هندی قاندی حسینین یولون دوتوب  
 ویردی نجات ملت هنده صلاسی وار  
 افسوس کوفیان تانموبلار بوله بوله  
 زهرا عزیزیدور شرف مصطفاسی وار  
 روح کرم کریم آبوینون بالاسیدور  
 دریای مهر دورکرم کبریاسی وار

نامه یازوب قوناق چاغیروب چکدیلر قلیج  
 اُلدوردیلر سوسوز بیر اوزون ماجراسی وار  
 شهره قوناقچیلار قوناقی قویمادی گله  
 باشین کسوب گتوردیله جای بکاسی وار  
 گَزْدیردیلر قوناق باشینی نوک نیزه ده  
 گور میزبان لارین نه وفانه حیاسی وار  
 عرض ایلدی گوزل سسوه زینبون فدا  
 خوش لحنویله سینه ده دردیم دواسی وار  
 سن نوک نی ده صحبت ایله ناچه اوسته من  
 هنگام اخذ بهره دی وقت اقتضاسی وار  
 بیدار ایداخ بیانیه غافل یاتان لاری  
 غافل یاتان لارین باشینین چوخ بلاسی وار  
 قربان اوقانلو لبلره کیم نوک نیزه ده  
 قرآن تلاوت ایلوری شیوا آداسی وار

قرآن اوخی یارالی بو قرآن دانان لارا  
 بولسونله بو بلالی باشین نه هواسی وار  
 قربان اولوم او گل یوزه کیم چولقانونب کوله  
 دوتقون آیا شیبهدی ایله نماسی وار  
 قربان او مه جبینوه کیم تازه قان آخور  
 وار سنگسار علامتی تازه یاراسی وار  
 باشون دالنجامنده سورونم هایان گله  
 هشتاده دین باشمدا بلا مبتلاسی وار  
 تائب ایکی جهاندا اولار اَغْنَى الاغْنیا  
 یازسا حسین که تائب آدینلی گداسی وار  
 عمرین ویروبدی آخره عشق حسینیه  
 شرکت ایدوبدی هاردا حسینون عزاسی وار

چون آشنا اولوبدی حسینه غم ایلمز  
 محشر گونی حسین کیمی آشناسی وار

راه شام زبان حال دختر مظلومه امام (ع) خطاب به سریدر بزرگوار

باپانوک جداده دیده حق بینی باز ایله  
 گوزومده اشگه باخ قلبیمده سیرسوز و ساز ایله  
 نجه گور پوزقونام ای رونق اسلام اولان سلطان  
 بو پوزقون حالی مندن برطرف ای دلتواز ایله  
 دله گل ای سرافرازان اسلامین سرافرازی  
 شکسته دل یتیمون بیر دانشدور سر فراز ایله  
 عدویله سانور من بی کسم بیر داد خواهیم یوخ  
 آزون داده یتش بو عقده نی دلدن فراز ایله  
 مخالفلر سالوب گورنه حصاره پرده غمده  
 حسینی شوريله آزادای شاه حجاز ایله  
 عراقیلر الینده پرده پرده قان اولوب گلوگلوب  
 منی دیندیر داخی آز ای حجازی شاه ناز ایله  
 اسیرم دستگیرم لاعلاجم چوخلی دردییم وار  
 منیم دل دردییمه چاره آزون ای چاره ساز ایله

بابا ویران اولوب حسرتله قلبیم بیر نگاهیه  
 بو ویران گوگلیمی آباد آزون ای باز ساز ایله  
 محبت گورموشم سندن همیشه ایتوشم عادت  
 گچن گونلرکیمی بیرده محبت بابی باز ایله  
 محبت قیل محبت گورما قاچوخ چوخ نیازیم وار  
 بو محتاجون نگاه رأفتیله بی نیاز ایله  
 اوزاق گتمه گوزومدن سوگلون سالما بیله گوزدن  
 یاخوندور من آلم هجرونده ترک احتراز ایله  
 اسیر عشقوم گلّم هارا چکسه باشون عشقی  
 یورولمام هر قدر سُوسن یولی طول و دراز ایله  
 مگر عاشق اولان خسته اولار عشقین مسیرینده  
 منی منظور عشقونده حقیقی عشقباز ایله  
 سلیل احمد محمود سن محمود خصلت سن  
 وفالی تائبه باخ بیز نگاهیه ایاز ایله

## تصویری از خرابه شام شوم

عجب خرابه شاماتده صفا گورونور  
 صفای اهل صفا واردی بر ملا گورونور  
 خرابه دور آدی اما صفا ایدوب آباد  
 که اوردا قافله عشق اولیا گورونور  
 شمیم مصطفوی وارعبیر مرتضوی  
 قرانلیق ایودی ولی نور کبریا گورونور  
 باخاندا بیر یانا اهل یقین پیدادی  
 صفای قلبیله اولاد مصطفا گورونور  
 آچوبدی سیّد سجّاد اویماندا سجّاده  
 قیلور نماز نماز اوسته جایجا گورونور  
 خرابه گوشه سین ایلوبدی نوری نورانی  
 دلینده ذکر خداوند لایری گورونور  
 اویماندا زینب کبری اوتوردوقی یرده  
 نماز شب قیلور آماده دعا گورونور  
 ویروب اوشاق لارا گویا طعام حصّه سینی  
 وجودی ظاهر صورتده کم قوا گورونور

آناسی فاطمه تک لیک ایله قوی دلدور  
 هامی بلالره آماده و رضا گورونور  
 اویماندا زمزمه ناله لر قولاقه گلیر  
 باخاندا جمع اسیران کربلا گورونور  
 بویاندا روشن اولوب شمع آه آل الله  
 ایشیق گونوز تک ایشیق لیله سیا گورونور  
 اویماندا خرداجا بیر قزگل اوزلی شیرین دل  
 یوزونده رنگ وفا واردی با صفا گورونور  
 ایله عفیفه دی عفت یاغیر نگاهیندن  
 ایله نجیبه دی باشندان باشا حیا گورونور  
 اوشاقدی لیک بیوک لر کیمی مؤدبدر  
 وقار فاطمه وقرینده بر ملا گورونور  
 رقیه دور آدی دللرده آرتورور رقت  
 غریبه دور ولی هرقلبه آشنا گورونور  
 گلیندن آیری دوشن بلبله شباهتی وار  
 دلینده گل آدی انگیزه نوا گورونور

دولی گوزیله باخور صاق صولا یتیمانه  
 او بیر باخشدا اومین درده مبتلا گورونور  
 گهی باخور او گل اوزلی قابارایاق لارینا  
 یوزینه شبنم اولوب اشگ پربها گورونور  
 ایاق یالین او قدر شام یوللاریندا قاچوب  
 تکان باتوبدی ایاقینده زخم پا گورونور  
 گلِ جَمالینه لطمه سالوبدی پنجه زاغ  
 و یا که نقشه سیلی اشقیا گورونور  
 گهی باخور اوبالا قزلارا او قزلار اونا  
 سزیلتي قوزانوری عالم بکا گورونور  
 آلور گهی آنا گه عمه سی قوجاقه اونی  
 گهی نوایه گلور گاه بی صدا گورونور  
 حسین اُپن یوزینی گه قویور او دیواره  
 دلینده صحبت نفرین او دلربا گورونور  
 دیور خدا یخ ایوین بو یزید جبارین  
 اونون الیله بیزه ظلم ناروا گورونور

گهی بابا سینی ایلور سراغ گاه دیور  
 بابام نه وقت بو ویرانه ده خدا گورونور  
 گلر بابام اولی رُو یاده منله هم صحبت  
 آیلجاقین او منی ترک ایدور جدا گورونور  
 گهی دیور بی بی ویرانیه گلوبدی بابام  
 خرابه ده بو گجه اُزگه بیر صفا گورونور  
 ایاقه دور بی بی قیل شمع آهوی روشن  
 خرابه نی دولناق گورنه ماجرا گورونور  
 تاپوم بابامی دیوم گلموسن آپار منی ده  
 که فرقتون ده مننه دهر تنگنا گورونور  
 نجه کناره آردون گنه کنار یوه آل  
 بولطفون اولسا اگر دردیمه دوا گورونور  
 هانی او گون که آلاردون منی قوجاقوه سن  
 اوگونلریم گیدوب ایمدی گونوم قرا گورونور  
 بابا بابادیدی رُو یاسی اولدی بیداری  
 گوروب خرابه ده بیر اوز گه ماجرا گورونور



باباسی گلدی کسیک باشیله قزین تاپدی  
 دیدی بابا گوزیمه عین مُدَعَّا گورونور  
 بونقد جانیمی قوی باشوه ایدیدم شاباش  
 بالا دیسونله آتایه اولوب فدا گورونور  
 یتوب دوداقیمه جان یاخشی وقتده گلدون  
 بو گلماقون منه بیر دولت علا گورونور  
 گلوپسن ایمدی که قال نعشیمی گوتور یردن  
 آدامسیزوخ بیزه سندن فقط رجا گورونور  
 تواضع ایلماقون باشیمی اوجاتدی منیم  
 همین بو امریله شأنیمده اِرتِقا گورونور  
 یازاللا صفحهٔ تاریخده بو حادثه‌نی  
 اگر بوسوز دوشه دلدن دله بجا گورونور  
 دیلله بیر قز اَلْنَدَهٔ بیر ایله عالم اولوب  
 که شاه هر دو جهان اورد ابر ملا گورونور  
 بلالی باشوه قربان اولا بلالی قزون  
 نچه یارایه اولوب باشون آشنا گورونور

علاوه باشدا اولان یاره لر یارالی بابا  
 دوداقلاروندادا گورم تازا یارا گورونور  
 اُپوپ منیم یریمه یوخسا خیرزان دوداقون  
 که لعل لبلرون آلودهٔ دما گورونور  
 گل اوخشیاق ایکمیز سن یارالی من یارالی  
 سن آغلاسان منه منده سنا گورونور  
 اجازه ویر سنیه بیر دوداق دوداقه قویوم  
 او حالیه گر اَلْم رُویتِ بقا گورونور  
 حسین محبتی قلبونده یرسالوب تائب  
 همین او نوریه قلبونده انجلا گورونور

اورک گوزیله دل آئینه سینه ایله نظر  
 او دلده نقش حسینیه کربلا گورونور

## عزای امام حسین (ع) در شام

شام شومده بزم غم بنا خاندان خیرالانام ایدوب  
شامی چولقادی بانگ شورشین شام گوندوزون تیره شام ایدوب  
گوئیا قیامت قیام ایدوب

نه عزا نه ماتم نه بزم غم یوخ نشان ویرن بیله عالمی  
گورمیوبدی دنیا گوزی بیله مجلس عزا بزم ماتمی  
قاتلی اوزی دوتدی ماتم افتخار اولاد آدمی  
نچه گون عزای حسینیه شامی صبح ایدوب صبحی شام ایدوب  
بزم غمده ماتم نشینیدی قرخا دین عزالی قرا لچک  
باشینه ووروب گوزیاشی توکوب آغلاشاردیلار جمله تک به تک  
شورش جزا آشکار اولوب دولدی بانگ دادیله نه فلک  
وار یری او ساعت دیسم جهان انتظامی فقد نظام ایدوب  
اهل بیت او ویرانه منزله رسم یاسیله چکدیلر قرا  
اهلیت دین قاره گیدیلر باشلانوبدی ویرانه ده عزا  
صدر بزم ماتمده آگلشوب زینب حزین باشلادی نوا  
آگلشوب قاپی چگنینی مکان سربدوش بیمار امام ایدوب

دلده داد معناده ماتمه باش آچوخ گلوب جدی مصطفا  
گوزده یاش حسین وای دیده حاضرا اولدی مجلسده مرتضا  
زینبینه سس ویرماقا گلوب الده ساچلاری خیره النساء  
زینبیه شرکت او بزمده روح شاه خیرالانام ایدوب  
اهل بیت او ماتمسرایده شور حشردن قوردولار اساس  
مجلس عزای حسینده توکدیلر یره بیر پارا لباس  
جامه لر کنارینده آگلشوب سالدیلار اله فرصت اهل یاس  
هر عزالی عطر عزیزینی حسرتیله قُرب مشام ایدوب  
بیر دلیل او خشاردی دادیله اوز عزیزینی هر عزانشین  
اوزگه طرزیه نوحه باشلادی فاطمه قزی زینب حزین  
شیونیه سالدی برابره اوز حسینون قائلو کونینگین  
آلدی حاجی قارداش شمیمینی کونینگیندن اخذ مرام ایدوب  
بیر طرفده وای قارداشیم دیوب زینب آرتروب دلده رشگینی  
بیر طرفده کلثوم شوریه باغلیوب یوزه سیل اشگینی  
باوفا ابوالفضلینین قویوب گوز قباقینه اوخلی مشگینی  
قائلو بیدقین الده آسدیروب پاره گیسوی مشگفام ایدوب

خانواده ختم‌الانسیا گلدی نالیه ویردی سس سسه  
هر شهیدین اولموشدی جامه‌سی مایه غم‌وغصه بیر کسه  
اکبرین یتیشدی عمامه‌سی داغدیده لیلای بیکسه  
عطربین آلدی قانلو عمامه‌دن باغربنا باسوب اخذ کام ایدوب  
آغلادی او مجنون‌نما خانم اکبره توکوب اشگ حسرتین  
باشلادی سربّه نوائیله بیر طرفده قاسم مصیبتین  
نالیه گلوب باسدی باغربنا قانیله باتان قانلی خلعتین  
وای اوغول صداسی آناسینون اهل مجلسی تلخکام ایدوب  
بیر قانا بلشمیش آغ اُنوگی ردّ ایدوبله اصغر آناسینه  
باغربنا باسوب یاندی اوخشادی اوخلانان لب‌عطشان بالاسینه  
ایله اوخشادی ایله آغلادی سس و یروب حرملر صداسینه  
اصغربین بهانه دوتوب گلوب داده یاد عطشان امام ایدوب  
حقّی قلب شهر یزیده بو عزا ایدوب گون‌کیمی عَلمَن  
بولمین‌لره ایلدی بیان ظلم آل‌سفیانی هر بولن  
روشن اولدی مطلب او مجلسه اهل شامدن اولدی چوخ گلن  
اوزگه عالم اولدی او بزمده بسکه شامیان ازدحام ایدوب

آغلاماق حسینیه مجاز اولوب گوزیاشین یوزه خلق باغلادی  
داغدیده‌لر حالینه یانوب شامین اهلیده سینه داغلادی  
زینب اوخشادی قزلار آغلادی سس‌سه و یروب دشمن آغلادی  
دود آه زینب ایشیق گونی شامین اهلینه تیره‌شام اولوب  
مجلس عظیمی گلر یغار بیر عظیم روشندی مسئله  
کیم حسین عزاسین ییغا بیلر زینبین گله خاطر الیه  
محترم عزا یغماقا گرک عزت آرتیران محترم گله  
عابدین قوران مجلسی بیوک شخص ختم‌ایده التزام ایدوب  
نالهدن او دلخسته کاروان نه دویوب نه بیر لحظه دنجلوب  
تیر غم یارالی اورکلری بزم یاسده تازه‌دن دلوب  
شاه کربلا باشی مجلسه از عزاسینی یغماقا گلوب  
از عزاسینی ختم باشیله اول شهشه مستطام ایدوب  
تائب حسینیه حسینیه همدل و هم‌آهنگ اولا گرک  
بیر علاوه آئینه دلی بی‌غبار و بی‌زنگ اولا گرک  
آغلینده زینب تک آغلیوب یکدل اولایکرنگ اولا گرک  
چون که جمع یکرنگیله حسین کربلاده دینی قیام ایدوب

## ندامت یزید و آزادی و کوچ اهل بیت

عصمت و طهارت از شام  
 یزید نادم اولوب شامده خطاسیندن  
 گوتوردی ظاهراً آل ایتدیقی جفاسیندن  
 دیار شامی حسینیه ایدوب عزاخانه  
 اوزی ده دوتدی عزا سرور شهیدانه  
 حسینیه تعزیه قاتل ایوینده باشلاندى  
 قرا علملر اولوب نصب خانه به خانه  
 و لیک گوشه ویرانه ده قیامتیدی  
 قرا چکیلدی سیه پوش اولوندی ویرانه  
 یغوب عزالیلری باشینه خانم زینب  
 رقیه قبری اولوب شمع او جمع پروانه  
 او توردی رسم عزائيله حضرت سجّاد  
 بنات فاطمه آغلاشدیلار یانا یانه  
 همین او بزم عزا روضه خوانی زینبیدی  
 او روضه باشلادی توکدی سرشگ دامانه

او اوخشادی یارالی اهل بیت آغلادیلار  
 دگویله بیر بیره یکسر گلوبله افغانه  
 دویونجا آغلامین لر سالوبلا فرصت اله  
 دویونجا آغلادیلار سرور شهیدانه  
 او بزم غمده هره بیر دلیلله اوخشاردی  
 سالاردی اهل عزا شور حشر او سامانه  
 او آغلاماق لار او فریاد وناله بیر طرفه  
 رقیه وای سسی ویرانسراده بیر یانه  
 اولوب او خرذا قزین نوحه خوانی خورد وکبار  
 ایدویله نوحه او بیر نوحه خوان خوشخوانه  
 عزاده ایتدیلله شامین خانم لاری شرکت  
 غم آشنا لرینه همدم اولدی بیگانه  
 حسین عزاسی دوتولدی دمشق شهرینده  
 عزا او شهرده ظاهرده یتدی پایانه  
 و لیک آغلاماقین اولیدی معناده  
 آلونجه زینبه اولدی جهان عزا خانه

## کوچ اهل بیت از شام

قراگینلری باشه یغوب باشندا قرا  
بلالی زینب ایدوب عزم کوی جانانه

اولار که ورمیشیدی اهل بیته دل یاراسی  
ایشتدیلر ویریلور کوچ آل عمرانه  
قرالباس گیوب گلدیلر مشایعته  
حضور زینبه دل آجدیلار ذیلانله  
دیر دیلر بیزی زهرا قزی گذشت ایله  
یزیدین ایلسون الله ایوینی ویرانه  
سیزی بیر اوزگه آدیله بیزه تانتیدردی  
فریب ویردی بیزی سالدی بیله خسرانه  
بو سوزلری ایشیدوب فاطمه قزی زینب  
دو باره قلبی یانوب دوندی گوزیاشی قانه  
دولی گوزیله باخوب شامیانه دل بی تاب  
یانایانا ایلدی اهل شامه بیله خطاب  
بوشامدن گیدویروخ شامیان ایویز آباد  
بویردن آیریلوروخ باغریقان ایویز آباد

بوسیز بوشام سیه روی بیز خدا حافظ  
گونوز قرا اولا سفیانیان ایویز آباد  
پیمبر عترتینه یاخشی ایلدوز حرمت  
عجیبه عاطفه ویردوز نشان ایویز آباد  
اسیر ایدوب قولی باغلی بیزی قوناق گتدوز  
قوناقه اولدوز عجب میزبان ایویز آباد  
بیزه شماتتیله دل یاراسی چوخ وردوز  
گلوب یولا سالوسوز باغریقان ایویز آباد  
گچنده کوچه لروزدن بیزی داشا باسدوز  
نهانی کینهزی ایتدوز عیان ایویز آباد  
بلالی باشیمیزه بام لردن اودیاغدی  
اولوب سیزون آلوز آتش فشان ایویز آباد  
همای اوج شرف عابدین ایچون ویردوز  
حَضِیض فقرده سیز آشیان ایویز آباد  
پیمبر اوغلونا سیز خارجی آدی قویدوز  
خدنک تهتمته ایتدوز نشان ایویز آباد

بیز آغلادوخ بیزه سیز گولدوز ایتدوز استهزا  
 او گولماقیز بیزه گلدی گران ایویز آباد  
 اوتانمادوز چوخ آجی دلرله سیز وردوز  
 یارالی دل لره زخم زبان ایویز آباد  
 بو قافله دیمدوز مصطفا عزیزیدیلر  
 بیزه خرابه ده ویر دوز مکان ایویز آباد  
 بیر اوچ باشندا قزی بوردا غصّه مرگ ایلدوز  
 خرابه یرده بالام ویردی جان ایویز آباد  
 مدینه یوسفینین قانلی گوینگلین ویردوز  
 مدینه آپارام ارمغان ایویز آباد  
 بو شهردن گیدیروخ بیر سفارشیم واردی  
 اونی قبول ایللیون شامیان ایویز آباد  
 منیم خرابه ده بیر نازلی سوگلیم قالوری  
 چخاتمیون اونی یاددان بیر آن ایویز آباد  
 قطار عشق گیدور لیک او قز قالور یالقیز  
 ورون خرابیه باش هر زمان ایویز آباد

بو شهرده بو قزین ئیل قبیله سی یوخدور  
 اولون بوئلسیزه سیز مهربان ایویز آباد  
 محبت اوسته اُلوبدور محبت عاشقیدور  
 ایدون محبت اولون دلستان ایویز آباد  
 گیدور بو قافله یوخ قبری اوسته آغلیانی  
 توکون مزارینه اشگ روان ایویز آباد  
 سنقدی قلبی سیز اللهدان اُتری گوگلون آلون  
 جزا ویرر سیزه حق بی گمان ایویز آباد  
 غریبه دوربو بالا روضه خوانی یوخ بالامین  
 اولون بو سوگلیمه روضه خوان ایویز آباد  
 گوزل مزارینین او ستونده شمع روشن ایدون  
 سپون گلاب اولون عنبر فشان ایویز آباد  
 نه دردوز اولسا اولار بو قزین الیه دوا  
 گلون زیارته پیر و جوان ایویز آباد  
 بو اوچ باشندا حسین نوحه خوانینه تائب  
 اولون حقیقتیله نوحه خوان ایویز آباد

### اربعین امام حسین (ع)

دلده عشق و محبتون یارالی  
باشدا شوق زیارتون یارالی

شامدن چکدی کربلا چولینه

غمزده آل عصمتون یارالی

هامی درد اهلی منده درد اهلی

خسته درد فرقتون یارالی

دردی درد اهلینسن آزون بولوسن

وار گوزل خبرویتون یارالی

غملیسن دردیله دولان دلده

وار غم بی نهایتون یارالی

هامی دل دردینه دوا ایستر

مین دوا بیرجه رأفتون یارالی

بوسنق قلبلر صفا ایستر

بسدی رمز محبتون یارالی

دوشکُوب قبریوه شفا ایستر

ناخوش خسته حالتون یارالی

دورمریض اوغلوا شفا ویر ازون

مین شفا بیر طبابتون یارالی

شکر قیلام که ویردی مهلت اجل

قسمت اولدی زیارتون یارالی

قبریوین باشینه دولانام من

آلارام عطر و نکهتون یارالی

بوردا گوردوم گیدنده دوشموشدی

یارالی سروقامتون یارالی

قلبون ایتیمیشدی بیر پیالّه خون

زخم تیر عداوتون یارالی

گلدیم ایمدی گورم بتوب صافالوب

دلده کی اوخ جراحتون یارالی

سنه من آغلیانمادیم گتدیم

دلده داغ مصیبتون یارالی

من اسارتله ایلدیم اعلان  
 خلقه سرّ شهادتون یارالی  
 گلیمشم ایمدی سینه داغلاماقا  
 قبرون اوسته دویونجا آغلاماقا  
 ایسترم اذن شهر یاریمدن  
 تادیم شرح روزگاریمدن  
 نه دیوم چکمیشم نلر یارالی  
 آیریلاندان حضور یاریمدن  
 گلشن عزتیم خزان اولدی  
 اُزدوم ال گلشن بهاریمدن  
 جبراً ایستکیلردن آیریلدیم  
 دویمادیم نازنین نگاریمدن  
 دوشدی بو چولده گل لریم پرپر  
 باد غم اسدی هر کناریمدن  
 قولی باغلی اسیر ایدوب دشمن  
 چکدی اُز صحن لاله زاریمدن

اوردا صد برگ لاله لر گوردوم  
 آخدی قان قلب داغداریمدن  
 ایتمدی ناله نوالی بلبل لر  
 مین نوا قاخدی مرغزاریمدن  
 سالدیلار کوفیه گذاریمیزی  
 آه ایله روز و روزگاریمدن  
 اولمادی اوردا زینبون تائیان  
 اشگ آخوب چشم اشگباریمدن  
 باشلادیم خطبه شوريله توکدوم  
 دُرّ لعل گهر نثاریمدن  
 یاد ایدوب نطق بوترا بیله  
 دوره باب تاجداریمدن  
 خواب غفلتدن ایلدیم بیدار  
 مردمی بانگ هوشداریمدن  
 بیلدیلر بیز پیمبر عترتیوخ  
 یاندیلار حال انکساریمدن



گفتیم ابن زیاد مجلسینه  
 سنمادیم ذره جه وقاریمدی  
 دوشه‌دی سفره طعام او لعین  
 تاب آلوب قلب بُردباریمدن  
 قزلارین بعضی بویلانوب باخدی  
 چخدی اود قلب شعله باریمدن  
 یومدی امّا رقیّه گوزلرینی  
 وقر گوردوم اوبا وقاریمدن  
 دیدیم احسن حسینیمین قزینا  
 آلدی اود بـودل فگاریمدن  
 پوزدوم ابن زیاد مجلسینی  
 منه لطف اولدی کردگاریمدن  
 دوشدی شامین یولوندا قزلاردان  
 بیر یول اوسته غم قطاریمدن  
 بیر مسلمان تاپیلما‌دی گتوره  
 بیر خبر طفل گل‌عداریمدن

عاقبت من اُزوم گیدوب تاپدیم  
 اولدوم آگاه او حالی زاریمدن  
 گوردوم آلموش آنام قوجاقینه  
 آلوری درد او دل فگاریمدن  
 دیدی بیر یادگار دور بوبالا  
 بیر حسین آدلی یادگاریمدن  
 بو قزی ساخلاسن گوزون اوسته  
 اول مواظب بو خوش تباریمدن  
 رنگی سولموش خزان ایگی گلوری  
 بو گوزل نوگل بهاریمدن  
 او قزی ساخلا‌دیم گوزوم اوسته  
 قویما‌دیم آیری اوز کناریمدن  
 داد و فریاد شام ظلمیدن    نه دیوم شام انزجاریمدن  
 وردی شام اهلی چوخ شماتله    دل یاراسی دل فگاریمدن

وورمین دل یاراسی گچمزدی  
 ردّ اولمازدی رهگذاریمدن  
 ووردیلار دل یاراسی من دزدوم  
 چخمادیم خطّ اصطباریمدن  
 نه دیوم شام ماجراسیندن  
 ماجرای پُر ابتلا سیندن  
 بیر یانا هر مصیبتیم قارداش  
 بیر یانا شام محنتیم قارداش  
 بیزی هر یرده انجیدوب دشمن  
 شامدن وار شکایتیم قارداش  
 شام دروازه سی قیامتیدی  
 اوردا قوپدی قیامتیم قارداش  
 اوردا سجّاد ایستدی اَلومون  
 اولدی تاراج طاقتیم قارداش  
 دیدی ایکاش دوغمییدی آنام  
 بسدی تک بو اشارتیم قارداش

آتدیلار اود عمامه سی یاندی  
 گچدی مین نیل او ساعتیم قارداش  
 گه باشون اوردا سنگسار اولدی  
 ای منیم شان وعزتیم قارداش  
 گاه قوردی یزید بزم شراب  
 مجلسه اولدی دعوتیم قارداش  
 گتدیم اوردا محاکمه قوردوم  
 باشدا شور شهامتیم قارداش  
 باش و جاندا گچوب دانشدیم من  
 اولمادی خوف و وحشتیم قارداش  
 نه دیدی من جوابینی ویردیم  
 دوتدی بزمی اُبّهتیم قارداش  
 ایلدی بزم عیشینی برهم  
 او بیانیم او صحبتیم قارداش  
 ایتدی فرمان قتلیمی صادر  
 دشمن پست فطرتیم قارداش

منده بولموب علی شهماًتی وار  
 اونا واردور وراثتیم قارداش  
 بیر بیره دگدی لیک او مجلسده  
 او پریشان جماعتیم قارداش  
 آز قالبور قورخودان آله بالالار  
 آرتدی قلیبمه رقتیم قارداش  
 اولمادی بیر نفر هوا داریم  
 کمکه اولدی حاجتیم قارداش  
 یتدی امدادیمه یارالی باشون  
 باشدای تاج عزتیم قارداش  
 باشلادی کفر ایوینده قرآنی  
 خوش بیان خوش تلاوتیم قارداش  
 آیه ظلمی ایلدی ایراد  
 شاه ملک عدالتیم قارداش  
 مندن آل گوتدی قصد ایدوب باشوی  
 دشمن بی لیاقتیم قارداش

آلدی بیر چوب خیزران الینه  
 آرتدی درد و مصیبتیم قارداش  
 دیمورم نولدی پرده‌لی گچورم  
 واردی اوزگه حکایتیم قارداش  
 نه چکوب شامدن خلاص اولدوم  
 بولی خلاق خلقتیم قارداش  
 باشه از عهدیمی یتور دوم من  
 قزلارون قبریوه گتوردوم من  
 ایتدیم ایفا او عهد و پیمانہ  
 تایتوردوم او عهدی پایانه  
 شامدن اهل بیتوی گوتوروب  
 تاگتوردوم ریاض رضوانه  
 شوريله بلبلان باغ عزا  
 یول سالوب بو گوزل گلستانه  
 شمع عشقین تاپوبلا مدفیننی  
 شمع عشقه اولوبلا پروانه

هره بیر نوعیله دیور دردین  
 توکوری اشگ چشم دامانه  
 بیر قرون لیک آیریلوب مندن  
 گله بولموب بو مهد ایمانه  
 قدرتی اولمادی گله بیزیله  
 چوخ یورولموشدی چون او دُرَدانه  
 منه سندن حسین وصییدی  
 که محبت ایدم او نالانه  
 او بالانی گوز اوسته ساخلاردیم  
 گیده قویمازدیم اُزگه بیر یانه  
 نیلیدیم الیمن آلدی اجل  
 منی قویدی بیله یانا یانه  
 چوخ سُوردیم ایکی گوزومدن اونی  
 روحیدی جسمیمه او ریحانه  
 یاندویروب قلیمی یاخاردی منیم  
 اوباخاندا منه یتیمانه

باغریقان لاله تک اوتاردیم قان  
 دُوندرردی بو باغریمی قانه  
 نه دیوم شرح روزگاریندن  
 عصمتیندن ویا وقاریندن  
 او بالا عصمتین عیاریدی  
 عفت و شرم پرده داریدی  
 اُزی عفت حیا گوزیدی گوزی  
 ادبین شأن و اعتباریدی  
 اُزی باشدان باشا محبتیدی  
 سوزی مهر و وفا عیاریدی  
 ظاهراً دشمنه اسیر ولی  
 عشق بی غشّینین شکاریدی  
 اوتاناردی دیمزدی اُز دردین  
 صبریله صبر پایداریدی  
 آج قالاردی غذا یئیمزدی  
 بوغازی غصّه زخم داریدی

غم گلوگیر ایدردی دائم اونی  
 روز و شب آغلاماق دچاریدی  
 گه باخاردی قابار ایاق لارینا  
 شام یوللارینین قاباریدی  
 دولی گوزلی باخاندا قلیینده  
 گزلتن دردین آشکاریدی  
 تاپدی رنگ خزان گلین گرچه  
 عمرینین اول بهاریدی  
 بابا جان سسلیوب یولوندا سنون  
 روز و شب چشم انتظاریدی  
 تاپدی آخر سنون یارالی باشون  
 حیف اولا حال احتضاریدی  
 سنله سوز باشلادی دانشدی بیر آز  
 شرح مشروح او اختصاریدی  
 آزجا فرصته چوخ او شیرین دل  
 دیدی هر رنج روزگاریدی

ایستدی باغرینا باسا باشوی  
 لیک معدوم اختیاریدی  
 اگیلوب بیر دوداق دوداقه قویوب  
 هامی بو حالین اشگباریدی  
 آیپله گون قووشدی بیر بیرینه  
 زینین موقف شماریدی  
 ویردی بلبل گل اوسته شیرین جان  
 سن گلین با وفا هزاریدی  
 آتدی هجرانی نقد جانیه  
 وصل آلوب عشق جان نثاریدی  
 دوداقوندا دوداقی جان ویردی  
 اودا مهر و وفا شعاریدی  
 ئل لریم اولمادی ایده تشیع  
 لیک جمع اوردا غم قطاریدی

او قزین قبرینی ازوم قازدیم  
 بوهمین امر اضطراریدی  
 ازقرا معجرین کفن ایلدیم  
 ازی بو امر خواستاریدی  
 خدمتیم آزدی چوخ حساب ایله  
 اوگونون وضع کار وباریدی  
 هامی نشریه لرده نشر اولاجاق  
 زینین عالی ابتکاریدی  
 اُلدی بیر خردا قز اونون بی بی سی  
 قبرینی قازدی حسن کاریدی  
 دفن قیلدیم خرابه ده بیر گنج  
 فاطمه دُرّ شاهواریدی  
 قزوا پر بها کفن قیلدیم  
 قپیزوین پر بها عیاریدی

گیدرَم اوندان اتری شامه گنه  
 اونیله زینین قراریدی  
 تائب آله بودودوقون خامه  
 لطف خلاق کردگاریدی  
 جمعه بیر اربعین زیارتی آل  
 بو قدم امر شاهکاریدی  
 کربلا گورمین اولار ناکام  
 کربلا باغ کامکاریدی

### در جلالت و شأن حضرت زینب کبری (س)

خامه‌مین مدادی اولوب روان ایستوری گیده راه زینبی  
ال یتورسه حق ایلرم بیان شأن و عزّت و جاه زینبی

فاطمی نَسَبدور مرتضا حَسَبدور

مُصحف محبّتده بر ملا گل آدی گلر سورة وفا  
سورة صداقتده مطلقا آیه صداقتدی هم صفا  
بی معلّمه بی مُفَهّمه علمده بلاغته خودکفا

بی سبب دگل اوج علمده حق قوروبدی خرگاه زینبی  
اهل ذکر سویلوبله قرخ گجه هر کس ایتسه رازونیا شب  
بیر صفا تاپار قلبی دولدورار قلبین علمیه بی نیاز شب  
درس آلوب آناسیندان عمریجه هر گیجه قیلوبدور نماز شب  
دولدوروبدی الله علمیه قلب پاک و آگاه زینبی  
گر دیسم ادبلی اولار خطا اوندا ختم اولوبدور ادب سوزی  
گر دیسم که عصمتیلدور گینه نقص اولار اودور عصمتین گوزی  
عَقْتینده صحبت ایدنرم سر به سر اودور عَقْتین اوزی  
عَقْت آختاران عصمت آختاران طیّ ایده گرک راه زینبی

جدّ پاکیدور ختم انبیاء هم آناسیدور مصطفی قزی  
هم آناسیدور شاه اولیا هم اوزی شه لافتا قزی  
هم اوزیدی هر مشکلی آچان هم امام مشکل‌گشا قزی  
ای بلا گرفتاری وور دَرِ درگه علاجاه زینبی  
منطقینده وار چوخ بلاغتی صَحَبْتینده عالی فصاحتی  
علم دینده علامه حلمده مجتبايه واردی شباهتی  
صحنه حسینی‌ده بر ملا واردی هم حسینی شهامت  
اولماقا حسینیه همقدم یازمیوبله اکراه زینبی  
صاحب وقار و سکینه‌دی قول و فعلده یاغدیران ادب  
جوهر حیا گوهر شرف فاطمی نَسَب مرتضاحَسَب  
نطقی آتشین نهضت آفرین زینب اوز آدی یعنی زین اب  
کهربای زین ابی آلوب قلبده اولان کاه زینبی  
ایلمیشدی اول مطالعه نهضت حسینی کتابینی  
گوردی چون کسوفه سالوبدی‌لار ظلمت اهلی دین آفتابینی  
آچدی بیر حسینی علم ایدوب زنده کربلا انقلابینی  
زینت اولدی تاریخه خدمت قُرْبَةً اِلَى اللّٰهِ زینبی

قارداشی گیدندن صورا اونون اولماسیدی گر استقامتی  
ایتمه سیدی همته قد علم اولماسیدی غوغای نهضتی  
اولمازیدی عنوان گفتگو قارداشی حسینین شهادتی  
ایلدی زبازد او صحبتی دُرّاری فاه زینبی  
ظاهراً اسیر اولدی باطناً گردنبنده زنجیر عشق یار  
دلده یاحسین دوشدی چوللره اوز باشیندا شوریده بیر قطار  
هر یره او شوريله یول سالوب مست اولانلاری ایتدی هوشیار  
هم اویاتدی غافل یاتانلاری بانگ حق گهگاه زینبی  
عهد باغلامیشدی ازل کی گون چون حسین عالم پناهيله  
باشینین دالینجا دوشوب گیدوب قارداشی آچان شاهراهيله  
گلمدی دله ایتمدی گله درد دل ایدوب دلده آهيله  
خرمن مرام یزیده اوت ووردی آتشین آه زینبی  
هر سحر خانم آه سرديله ایلدی هم آغوش ییل لری  
قاصد صبائيله گوندروب بیک ایتدی آگاه ئل لری  
داغ داتا سالوب واحسین سسی دولدوروب نوائله چوللری  
نالّه شبانگاه زینبی نغمه سحرگاه زینبی

طی ایدردی اوز گونلرین خانم باشینه مصیبت یاغا یاغا  
یاندیراردی گر آه سردینی یل اونون آپارسیدی هر باغا  
داغلی سینه ده داغ سزلیتسی داغ دل اوتورداردی هر داغا  
بسکه دل یاران دلنشینی دی ناله شبانگاه زینبی  
یاغدیروب گه اود اولدی سینه دن آه سرد آتش فشانيله  
گه سالوب یزیدین بساطینه لرزه آتشین بیر بیانيله  
ظلم ایوین یخوب عاقبت خراب ایتدی سیل اشگ روانيله  
ریشه امید یزیده اود سالدی آه جانگاه زینبی  
ممکن اولمادی روزگاره مرتضا علی شیر داوره  
شامه ال تاپا حق بیانيله حق سوزون دیه قوم کافره  
زینب ال تاپوب شامه یولادی عابدینی بالای منبره  
منبر اوسته مدح علی دیدی حاصل ایتدی دلخواه زینبی  
شامی آلدی زهرا عزیزه سی دختر شهنشاه محتشم  
شامده ووروب شام امیرینین نحس آدینا بیر قرمزی رقم  
قلب شهر شوم دمشقده نصب ایدوب حسین آدینا علم  
شهر شامده امیدده أسر پرچم خداخواه زینبی



ایستدی که قالسون حسینون زنده آدی پاینده شامده  
 دائماً اونون بی‌زوال اولا مهر حقی تابنده شامده  
 قویدی بیر درخشنده آی‌کیمی بیر قزی نماینده شامده  
 طلعت حسینی او شهرده جلوه‌گر ایده ماه زینبی  
 عالم وفاده دیمه خانم اوز وفا یولون آزدی آغلادی  
 اوز ایله نازلی رفیه‌نین قبریته اوزی قازدی آغلادی  
 فتح شام تاریخین اشگیله خاک قبرینه یازدی آغلادی  
 تا تانیتدیرا فتح شامده بو کچیک هواخواه زینبی  
 بو کلامی والائی ایستدی تائب ایلدی دفتره رقم  
 رشتیه دوزنده بو گوهری تائبه طهوری‌ده ویردی دم  
 قسمت ایله ای حیّ ذوالمنن اوچ رفیق اولسونلا هم‌قدم  
 بوسه ایلسونلر دمشقه آستان درگاه زینبی



### خطاب حضرت زینب (س) در مدینه بعد از آزادی از اسارت

به اهل مدینه  
 مدینه اهلی گر آساز خبر بو حال زاریمدن  
 سیزه شرح ایلمر گوزیاشلی رنج روزگاریمدن  
 او گون که ظلم اشراریله من میهن آیریلدیم  
 نوالی بلبل شیدا کیمی گلشندن آیریلدیم  
 امانسینلار ایلمدن باصفا مأمندن آیریلدیم  
 گلر مین سوز بیانه بیر بیان اختصاریمدن  
 امان اولسیدی یوخسا ملک بطحادن دوتردیم من  
 دویاردیم یا طواف قبر طاهدان دوتردیم من  
 آنام یوردون آتوب یا کوی زهرادن دوتردیم من  
 آیردی جبریه دشمن منی دار و دیاریمدن  
 بلا پیمان‌سین ویردی قضا من جرعه‌نوش اولدوم  
 اولوب سرمست مین‌لرله بلا و درده توش اولدوم  
 گنیش دنیاده دوشدوم چوللره خانه‌بدوش اولدوم  
 یانقلی خاطراتیم وار او سیر روزگاریمدن

حسین دین اوسته ترک عزّت ایتدی منده ترک ایتدیم  
 پوزولدوم ظاهراً غم غصّه گوردوم هریره ایتدیم  
 حسیندن آیریلانمازدیم هارا گیتدی اورا گیتدیم  
 نه مندن او گوتوردی گوز نه من نازلونگاریمدن  
 حسینله دولاندوخ نه خطرسیز بیر مکان تاپدوخ  
 هارا گیتدوخ هارا ایتدوخ نه بیر امن و امان تاپدوخ  
 قَطَا مرغی کیمی نه امن اولان بیر آشیان تاپدوخ  
 هارا دوندردیم اوز مین فتنه یاغدی رهگذاریمدن  
 عوام آل بیر اولوب سردسته اهل نفاقیه  
 حسینون قتلینه بیئل باغلیوبلر اتفاقیه  
 چکیلدی غم قطاریم کربلایه اختناقیه  
 دانیشسام چوخ سوزوم وار کربلای غصّه باریمدن  
 بلا دشتی حصار اولدی بیزه جور و جفائیه  
 قطار غم اولوبلار روبرو درد و بلائیه  
 حجازیلر نوایه گلدیلر شور و نوائیه  
 مخالفلر بیزه وحشت یاراتدی هر کناریمدن  
 علاوه اوزگه بیر غوغا اولوب غوغای عاشورا  
 نه عاشورا بلاخیز و ملال انگیز و وحشتزا

نه عاشورا اولوب آل عبا یه محشر صغرا  
 نه محشر آیت کبرا منه روز شماریمدن  
 سوروشساز کربلا ده سویلرم عیناً نه لر گوردوم  
 اوغوللار قانه غلطان چوخ آنا قالدی ملر گوردوم  
 جوانلار پاره پاره حلقی اوخلی صودامر گوردوم  
 یانار قلبیم ایدنده یاد او طفل شیرخواریمدن  
 اوزوز انصاف ایدون هاردا قوناقی بیله یوخلالار  
 وطن آواره سی ایلله دردین دله چوخلالار  
 الی اوسته قوناقین شیرخوارین هاردا اوخلالار  
 بالامی اوخلیوب تاب آلدیلار قلب فگاریمدن  
 چکوب اوخ حلق اصگردن حسین محشر عیان ایتدی  
 آتوب قانین گویه گویده عیان رنگین کمان ایتدی  
 یاخوب اصغر یوزینه قانینی واقعه قان ایتدی  
 صفا تاپدی جمال دین او نقش جان نثاریمدن  
 حسینون غنچه سی اوخلاندی سولدی گل بوداقینده  
 آناسی یاندی گوردی قطره قان اصغر دوداقینده  
 اوتورماز کولگه یرده اگلشر گونلر قباقینده  
 دیرگه اصغریندن گه حسین تاجداریمدن

گلوب بیر گردباد غم او چول طوفانیله دولدی  
 ایاقدان سرولر دوشدی صفالی گُللریم سولدی  
 بهارین ویردی الدن گلشنیم ایله خزان اولدی  
 که حتی قالمادی بیر گلده اون سگیز بهاریمدن  
 حسینون یارهسی قان ویرماقین عیناً اوزوم گوردوم  
 بدنده اوخلاری سان ویرماقین عیناً اوزوم گوردوم  
 دلینده العطش جان ویرماقین عیناً اوزوم گوردوم  
 الیم قوینومدا اشگیم آخدی چشم اشگباریمدن  
 اوزوم گوردوم حسینیم عهدینه وابسته جان ویردی  
 یخوب صوری مسلمانلار اونی دلخسته جان ویردی  
 همیشه حق دانیشدی حق دیدی حق اوسته جان ویردی  
 اوزوز انصافیه ییاد ایلیون اول شهریاریمدن  
 باخوب اللّه یولوندا عقد صبری سینهمه دوزدوم  
 حسینیم ال ایاق چالدی گوروب دؤزدوم ایله دؤزدوم  
 بولر اللّه حسینیمدن ال اوزدوم من نجه اوزدوم  
 اوزوم ئولدییم دیریلدییم اوزمَدیم ال اصطباریمدن

اسوب باد حوادث شمع نازیم سوندی بیر گونده  
 ایشیق گوندوز گوزومده شام تاره دوندی بیر گونده  
 ایله سیندیم ایله بو روزگاریم چوندی بیر گونده  
 که بیرده گورمرم خوش گون بو عمر مُستعاریمدن  
 نجه بیرده حسینون آدینی دلدن سالا بوللم  
 حسینیمدن صوراً بیرده نجه دلشاد اولوب گوللم  
 اولار وردیم حسین ذکریم حسین بو دردیله ئوللم  
 ئولونجه دونمرم بو ذکردن بو خوش شعاریمدن  
 حسین سیز روزگاری نیلرم خوش روزگاریم یوخ  
 عزالی بلبل اولدوم گلشنیله کار و باریم یوخ  
 اگر مینلر بهار اولسا منیم بیرده بهاریم یوخ  
 بهاری نیلرم قالمور نشانه لاله زاریمدن  
 حسینه عاشقم اوندان نه دویدوم من نه سیر اولدوم  
 حسین خطین دوتوب گیتدیم اونیه هم مسیر اولدوم  
 شهید اولدی حسینیم منده دین اوسته اسیر اولدوم  
 باخون بو سیریمه عبرت آلون بو کار و باریمدن

او گون قان موج ایدن دریاده اوز نوحیمن آیریلدیم  
 یارالی قلیله اوز نوح مجروحیمن آیریلدیم  
 حسنینم پیکریمده روحیدی روحیمن آیریلدیم  
 غمیله آیری دوشدوم روح پرور نازلو یاریمن  
 منیم تک گوردی هانسی بیر باجی بو دار دنیاده  
 که مذبوح القفا قارداشی دوشسون قانلی صحراده  
 دلینده و آخا اولسون اسیر اشرار بیداده  
 امان ایله اسارتدن امان رنج فشاریمن  
 جهاندا گورمه سون بیر باجی بیر وضعی که من گوردوم  
 دوشوب توپراقلار اوستونده یارالی چوخ بدن گوردوم  
 گزوب تاپدیم مدینه یوسفین بی پیرهن گوردوم  
 امان الله او ساعتدن امان ایله نظاریمن  
 سوزوم چوخدور دیسم اوضاع عاشورای محنتدن  
 جفادن ظلم لردن هتک حرمت قتل و غارتدن  
 بیر آزدا صحبتیم واردور سیزه دور اسارتدن  
 ایدم حالی سیزی اوز درد و رنج و انزجاریمن

حسنینم صورا عالمده چوخ مشکل لره دوشدوم  
 تمام مشکلاتی سهل ساندیم دل لره دوشدوم  
 گوزی یاشلی حسنینم وای دلیمده چوللره دوشدوم  
 هامی دشت و دمن دولدی یانارلی آه و زاریمن  
 اگرچه اوز حسنینم صورا گوندوزلریم شب دور  
 ولی بو قلیمی چوخ یاندوران بیر اوزگه مطلب دور  
 گورن سویلوب بو قارداشی ئولن قول باغلی زینب دور  
 ووروب بو سوز دوباره یاره قلب زخم داریمدن  
 حسنینم گیتدی تک قالدیم بلالر دوره می آلدی  
 دوزنمزدیم حسین سیز فرقتی اود قلیمه سالدی  
 اوزی گیتدی خلاص اولدی هامی غم لر منه قالدی  
 کیمیم وار حالی اولسون بیله درد جانشکاریمن  
 چکیلدی غم قطاریم کوفه شرم و غم افزایه  
 وفاسیز اهل کوفه گلدیلر یکسر تماشایه  
 ووروبلار دل یاراسی کاروان آل طاهایه  
 اوجالدی ناله لر افلاکه هر خُرد و کباریمن

او شهر شومده قلبیم شرار غمله اودلانندی  
 گوروب هر بیر تانیش دوردی منی ناآشنا سانندی  
 تانیشلیق ویرمدی حتی تانیشلیق شیوه سین دانندی  
 یوزون دوندردی مندن تئز اوزاقلاشدی کناریمدن  
 گچن عزت لریم یاده دوشوب دردییم زیاد اولدی  
 من آغلاشدییم وفاسیز اهل کوفه گولدی شاد اولدی  
 پریشان حال گوردی آشنالر دوندی یاد اولدی  
 او صحنه ایستدی تالان صبری قلب بردباریمدن  
 بلی رسم جهان دور هر کیمین وضعی اولا برهم  
 حریم احترامین سیندیرار اشخاص لایعلم  
 هامی اوندان قاچار بیر کس اونا اولماز شریک غم  
 سراغیم اولمادی اول شهرده بیر غمگساریمدن  
 گهی گزدیم قولومدا قید دوشدوم گاه زندانه  
 اراده ایلدی گه قتلیمه فرزند مرجانه  
 دایاندیم داغ کیمی ویردیم شکست اول شوم نادانه  
 خلاص اولدوم کمکلیق اولدی اوز پروردگاریمدن

گل اوزلی قزلاری زاغ و زغن وردی ایدوب خسته  
 دوتولدی غنچه لب اطفالدن گلدسته بیر دسته  
 اوچی دوردی اوتوردی بیر بعیر بی جهاز اوسته  
 اولاردان بعضی قالدی بعضیسی گیتدی کناریمدن  
 گل اوزلر سولدی من باخدیم او سولموش یوزلره سولدوم  
 بولود تک دولدی قزلار غصّه دن منده باخوب دولدوم  
 اورکلر دوندی قان اولدی اوزومده باغریقان اولدوم  
 او قان گیتمز ئولوب گئتسمده قلب داغداریمدن  
 آلوب داغلی اورکلر دردینی دل باغلا دیم یاندیم  
 غمیم آرتدی اورکده عقده غم باغلا دیم یاندیم  
 دوولدی نازلی قزلار آغلاشاندا آغلا دیم یاندیم  
 یانوب اود یاغدیران چول دلده کی حسرت شراریمدن  
 بالا قزلار اولاندا توش ظلم قوم اشراره  
 پناهنده اولاردی فرد فردی بو دل افکاره  
 قولوم باغلیدی بو درده ای دنمز دیم ای دم چاره  
 او دردییم اولدی آرتیق جمله درد بی شماریمدن

تاپوب صیاد کین آل طایران بی پر و باله  
 ووراردی شمر ظالم ظلم الیله قمچی اطفاله  
 دیدی بیز ووراخ بیز ئولدوراخ سیز ایتمیون ناله  
 نه سوزدور بو ایشتدیم دشمن بی شرم و عاریمدن  
 یتیم اولسا بیری اشگی عذاره باغلاماز یوخسا  
 بیری داغ عزیزین گورسه قلبین داغلاماز یوخسا  
 بیرسی عزتی گیتسه الیندن آغلاماز یوخسا  
 اولوندی آغلاماقدما منع اطفال نزاریمدن  
 دوشوب شامین یولوندا خرده قزلاردان بیری قالدی  
 گیدوب تاپدیم ایله بیر حالیه اود قلبیمه سالدی  
 آنام اوردایدی دیندیردی منی دل دردیمی آلدی  
 بو یوردی گوز گوتورمه زینیم بو گلعداریمدن  
 یاتیمیشدی آنام زهرا او نالانی دیز اوستونده  
 دیدی سوز ویرموسون قارداشوه دور اول سوز اوستونده  
 بو شیرین دل قزی ساخلا حسینیم تک گوز اوستونده  
 قرار آلدی او فرمایش بو قلب بی قراریمدن

بالام زهرا قوجاقینده ایدردی ناز نازیله  
 آنامدان آلدیم اول شیرین زبانی سوز و سازیله  
 نقدری ناز قیلدی نازینی چکدیم نیازیله  
 هزار افسوس تئز ال اوزدوم اول زیبا نگاریمدن  
 او سیر روزگاریم یاد اولار آغلار گوزوم واردی  
 غمیله همشینم نه گجم نه گوندوزوم واردی  
 دیار شامدن چوخ چوخ گلایم چوخ سوزوم واردی  
 ایشیق گوندوز او یرده اولدی تیره شام تاریمدن  
 بیزه دروازه ساعاتده سخت اولدی ساعتلر  
 بیزه شام اهلی چوخ ایتدی جسارتلر اهانتلر  
 یارالی دللری قان ایلدی طعن و شماتلر  
 شماتت یارهسی گیتمز بو قلب زخم داریمدن  
 بیزه ایتدی یزید الدن گلن هر ظلم و آزاری  
 دولاندوق صبحدن شامه کیمی هر کوی و بازاری  
 اولار گولدی او یاندا بیز بو یاندا ایلدوخ زاری  
 فضای شامه اود دوشدی او آه شعله باریمدن

گه اود یاغدیردیلار هر ستمدن شامات اشراری  
 دوشروب اود یانندیروب عمّامه سجّاد بیماری  
 الی باغلیدی خاموش ایلینموب شعله ناری  
 بالام یاندی قرار آلدی منیم قلب فگاریمدن  
 یهودیه آلوب بیر داش اله کین آشکار ایتدی  
 حسین قرآن اوخوردی نوک نی ده سنگسار ایتدی  
 سالوب دلدن او خوش گفتاری بیرده زخمدار ایتدی  
 اورک قانیم او دم آخدی یوزه گوز چشمه ساریمدن  
 قانادسیز قوشلاری یغدیم باشا بیر لانه گنجینه  
 غمیله الفت ایتدیم دائماً غمخانه کنجینه  
 نچه درّ یتیم آغلاشدیلار ویرانه کنجینه  
 اوجالدی گویلره داد و نوا دارالقراریمدن  
 رقیّه ئولماقی شاماتده محشر عیان ایتدی  
 اوجالدی وای رقیّه ناله سی یردن گویه یتدی  
 گلن خندان گلوب اما گیدنده آغلادی گیتدی  
 هامی یاندی ملال دختر والاتباریمدن

وفا رسمین نه من یاددان چخاتدیم نه یولون آزدیم  
 توکوب رخساریمه گوزیاشیمی شرح وفا یازدیم  
 ویروب گوزیاشلی غسلین از الیمله قبری نی قازدیم  
 هامی صحبت ایدر بو اهتمام شاهکاریمدن  
 رقیّم دزدی هر درد و بلایه امتیاز آلدی  
 یزیدین سلطنت ارکانینه چوخ ولوله سالدی  
 بیزی سالدی یولا بیر گنج تک ویرانه ده قالدی  
 ولی من دویمادیم گلدیم او درّ شاهواریمدن  
 اسارتدن قوتولدوم لیک چوخ ناشاد گلدیم من  
 شکسته خاطريله خانمان برباد گلدیم من  
 یولوندی پرلریم قوش تک اولوب آزاد گلدیم من  
 داخلی سلب اولدی اوچماق اقتداریم اختیاریمدن  
 بو شرحی ایستیوبدور بیر عنایت نوحه خوان منصب  
 ایدوبدور دفترینده ثبت تائب بیله بیر مطلب  
 نصیب اولسا مدینه سویلر و خ اوردا دیوب زینب  
 مدینه اهلی گر آلسا ز خبر بو حال زاریمدن  
 سیزه شرح ایلرم گوزیاشلی رنج روزگاریمدن

## اولیاء الله

اولوب اولار که بو عالمده حقدن آگاه  
دوتوبلا حق یولونی اولمیویدیلر گمراه

دوتوبلا مهر و وفا یوللارین صفائیه  
ایدوبله جور و جفادن جهان ده اکراه  
ویروبله فقری همیشه غنی لبقا ترجیح  
جلال و دبدبیه اولمیوبله خاطر خواه  
آتوب فنانی دوتوبلار بقانی مدّ نظر  
ایدوبله اوزلرینی بر ملا فنا فی الله  
خدا اومرینه فعلیله دیوب لبّیک  
حضور حقه اولوب سلّم ایلمز له گناه  
پناه عالم اولان کردگار حیّ و قدیم  
ایدر تمام یارانمیشلارا اولاری پناه  
اولار نه ایسته سلّر لا کلام ردّ اولماز  
ایدر خدا اولارین خاطرینه خلقه نگاه  
بلی اولار که اولوبلار وجیه عندالله  
آچقیدی یوزلرینه سوی حقدن درگاه

## غلام سیاه حضرت سجّاد (ع)

ایدوبله طیّ عبودیتین مراتبینی  
یتوبله گنه رسویتیته بعون الله  
همین بو عرضیمه عبدی اطعنی دور مصداق  
بو خطّ مشی ده یکساندیلار سفید و سیاه  
بلی غلام سیه چهره دن سراغیم وار  
یازوبدیلار اونی اجزاء اولیاء الّاه  
گلوبدی منتهی الآمالده همین بو خبر  
سعید قولیجه مسعودی بیله نقل ایلر  
دیر که معتقدم گوردوقوم قضایایه  
گوزل مناسبتی وار ویریلسه پیرایه  
دیر مدینه ده بیر خشکسال اولوب یاندی  
تمام باغیله بستانی گتدی یغمایه  
تمام اهل مدینه به قصد استسقا  
بیوک کچیک هاموسی چخدیلار مُصّلایه  
کمال شیونیه دللرینده جوش و خروش  
اوجالدی ناله لری طاق چرخ مینایه  
نقدر آغلادیلار ایتدیلر طلب باران  
یتنمیوبله او دلخواه اولان منایایه



هوایه گلدی نه بیر ابر نه یاغیش یاغدی  
 نه پیره نازل رحمت اولوب نه بُرنایه  
 او جمع خلقدن آیریلدی بیر غلام سیاه  
 ولیک دوشموشیدی باشی اوز گه سودایه  
 اوزی اگر چه غلام سیاهیدی اَمّا  
 سفید طالعیله غرقیدی تجلّایه  
 عیان اولوردی اونون قلبی چوخ صفالیدی  
 صفا سالوردی صفائیله کوه و صحرایه  
 کمال حیرتیله ایلدیم اونی تعقیب  
 گوروم مرامی ندور یادوشوب نه غوغایه  
 حضور قلبیله گوردوم دایاندی بیر یرده  
 دولاندیروب یوزینی بارگاه یکتایه  
 دگوبدی بیر بیرینه لبلری عفیفانه  
 او حالتیله آخاردی سرشگی سیمایه  
 هَلّه دعاسی اونون یتمه میشدی اتمامه  
 بیر ابر گلدی او ساعتده چرخ خضرایه

دولی گوزیله او ابره باخوب غلام سیاه  
 دیدی که شکر اولا درگاهوه گوزل الله  
 او آبردن ایله یاغدیردی ابر بارانی  
 که سیل آب دوتوب جمله کوه و صحرائی  
 منی معانی عرفانی ایتدی محو خیال  
 گوزنده اول قره قولدا مقام اعلانی  
 دیدیم که واردی خدا نه عزیز بنده لرین  
 تاپویلا معرفتونله طریق عرفانی  
 دعا ایچون دل آچاندا اولور دعاسی قبول  
 بیله ده عالم اولار بیله لطف ربّانی  
 غلام دوشدی یولا منده آردیجا دوشدوم  
 گیدردیم اونلا بیله قصد ایدردی هریانی  
 یتشدی وارد اولوب فخر ساجدین ایوینه  
 کمال شوقیله دوگدوم اوباب احسانی  
 اجازه حاصل اولوب وارد اولدوم ایتدیم من  
 او یرده درک حضور امام والانی

امامه عرض ایلدیم از گوزومله گوردوم اوزوم  
 بودودمان ده من بیر غلام زیبانی  
 اونسی بغشلیه سیز گرمه خریدارم  
 اگر چه قیمت اولا مبلغ فراوانی  
 امام امر ایلدی گلدیلر غلام لری  
 گورنمدیم من اولاردا او روح ایمانی  
 دیدیم آقا اونسی کیم ایستورم او یوخ بوردا  
 واریدی اوندا عجب بیر جمال نورانی  
 امام امر ایلدی گلدی حاضر اولدی غلام  
 دیدیم بلی بودی عاشق ایدن بوشیدانی  
 دیدی امام غلامه که مالکوندی سعید  
 اونسیله گیت گنه سیر ایلله دوردورانی  
 غلام باخدی منه بیر دولی گوزیله دیدی  
 منی آقامدان آیردون نه اولدی عنوانی  
 آقام آدیله هامی بیریره ویرردی نشان  
 ایدردی خلق منه احترام عظمانی  
 هنوز دویمامیشام من آقام حضوریندن  
 نه نوع ترک ایلیم بوکریم مولانی

دیدیم که گوردوم او ساعت که اوز گه حالیه  
 دعا ایدوب چاغراردون خدای یکتانی  
 دعا اجابتّه یتدی آچیددی باب کرم  
 رحیم امر ایلدی یاغدی رحم رحمانی  
 من اوندا درک ایلدیم سنده اولیادن سن  
 که تاپموسان حقیله ارتباط شایانی  
 همین او حالی گوروب محو عشقون اولدم من  
 جهانیه عوض ایتمم او بیر تماشانی  
 سنه غلام خطاب ایلماق خطادی خطا  
 غلامده بیله اولماز جلال سلطانی  
 غلام اولام سنه واجبدی سن منه مولا  
 اَلونجه وقف ایلیم خدمتونده بو جانی  
 بو سوزده دست نیاز آچدی عرض ایدوب یارب  
 واریدی سنله آرامیزدا راز پنهانی  
 همین او راز نهانیم که ایمدی کشف اولدی  
 نه ایلورم داخی من بو حیات بی جانی

## وفات غلام گریز به مصائب امام سجاد (ع)

گلوبدی بو قفس تَنده تنگه طایر جان  
 منیم بو جانیمی آل ای جهان جهانبانی  
 امام آغلادی هم حاضرین آغلادیلار  
 گوزومده گوزیاشی ترک ایلدیم او مأوانی  
 دقایقی صورنا گه گلوب رسول امام  
 که گل جنازه مولوی گور همین آنی  
 یتوب نه گوردوم عزاخانه دور امامین ایوی  
 ایدوبدی ترک او آزاده مرد دنیانی

بلی غلام سیه گورسه درس سجّادی  
 خدا یانندا تاپار امتیاز شایانی

بو ذکرده او جالور خامه دن نوای صریر  
 بلای حضرت سجّادی ایلوری تحریر  
 نَلر گلوب باشنا شرحینه قلم عاجز  
 بیاینه هانی دللرده قدرت تقریر  
 یانان چادردا قالبوتدا روز غارتده  
 خیام طاهره نی یاندراندا قوم شریر

## حضرت امام سجّاد (ع)

خلیل وارثی اوتدا یاناندا زینب اُزین  
 وروب یانار اودا ویردی نجات بی تأخیر  
 او سروری که غلامی ملّک رقاب اولدی  
 نجه روادی که ایتسونله کربلاده اسیر  
 نجه اسیر اوزی تاب وتبده بیر ناخوش  
 سوار ناقه عریان بویوندا بیر زنجیر  
 ایاق لارین دوه نین قارنی آتدا باغلادیلار  
 دولاندر و بلا نجه شهری خسته و دلگیر  
 عجب دگل که قتیل ایتدی حقی باطل لر  
 آسف بودور که اسیر اولدی قوم روبهه شیر  
 او سَمتمده دوگوری اهل کوفه عمّه لرین  
 بوستمده اوجادور اهل شام بانگ نَفیر  
 زیادین اوغلی ووروب گاه قتلینه فرمان  
 قالبوت نه حالته عالمسن ای خدای خَبر  
 سز یلدیوردی یول اوستونده کوفه دن شامه  
 قولوندا بندرسن دلده آه عالمگیر

ویردی سس اونا بونونداکی غل جامع  
 سز یل دینده ایدنده اونا له شبگیر  
 امان او وقت و اوساعتدن الامان الله  
 اولوبلا وارد شام آل شاه خپیّر گیر  
 بویوردی شامده فریاد شام ظلمیندن  
 او شهر شومده قوم ظلام ظلمیندن  
 چکردی داد گچن تلخ روزگاریندن  
 توکردی گوز یاشینی چشم اشگباریندن  
 مگر ایشیتمه موسن کیم یتنده شاماته  
 توکندی تاب و توان قلب داغداریندن  
 دیدی عقاد ذلیلاً شکسته حالیه  
 کفایت ایلر اوسوز شرح روزگاریندن  
 امام باقر آناسین دیمم نجه گوردی  
 که او دلی آه چکوب قلب شعله باریندن  
 بو قدر واردیدی ایکاش دو غمیدی آنام  
 یتشمیدی بیله غم بو غم دیاریندن

گهی اوت آتدیللا باشدا عمامه سی یاندی  
 خدا بولور نجه یاندی او اود شراریندن  
 خموش ایدنمدی باغلیدی اللری یارب  
 ازونسن آگه اونون ایله حال زاریندن  
 وروبلا گاه او مظلوم امامه دل یاراسی  
 آلوبلا تاب و توان قلب بردباریندن  
 آتاسی باشینی اشرار چکدی گوز ایوینه  
 آلودی مین یارا قلبه او بیر نظاریندن  
 چکیلدی کوی یهوده گهی قطار لری  
 او کوچه نین دیمورم شرح سنگساریندن  
 بو قدر وار آتاسی باشی نطقدن دوشدی  
 کلام حق کسیلوب لعل لعلباریندن  
 قالب خرابه ده بیر مدّت اهل بیتیه  
 یانوب یانان دلی اطفالین آه وزاریندن  
 آلوب رقیّه شیرین زبانی آغوشه  
 سیلردی گوز یاشینی چشم اشگباریندن

## وفات حضرت سجاد (ع)

مدینہ قیدوب تلخ خاطر اقیلہ  
 ایدردی یاد گچن تلخ روزگاریندن  
 اَلونجه آغلادی شوریلہ و ابادلده  
 ایدنده یاد غم باب تاجداریندن  
 منیم بابامه سوویرموب سوسوز ایدوبله قتیل  
 آخوبدی قانی چوله حَلق زخمدریندن  
 دیردی شوریلہ عطشان اَلن بابام ایوای  
 ایدردی یاد سوسوز باب تاجداریندن  
 قوتاردی عمرینی آغلار گوزیلہ جان ویردی  
 قوتولدی هم و غم درد بی شماریندن  
 ایدر اور کلری قان عابدین غمی تائب  
 ایدنده یاد اونون شرح روزگاریندن

تولدینده آناسی وفات ایدوب گیتدی  
 اَلونجه دوشمهدی آیری جهان فشاریندن

گیت ای صبا خیر ایله زهرا بالاسینه  
 سجاد اَلوب عزاسیدی گلسون عزاسینه  
 سندنصورا بالالاریوا سرپرست اولوب  
 دائم یانوبدی آل علی ابتلا سینه  
 یانمیش چادردا شام غریبان دوتوب سنه  
 گل اوغلوین بوشام غریباندا یا سینه  
 کرب وبلا چولونده گوروب قانلو صحنه لر  
 اولدی اسیر کوفه وشام اشقیا سینه  
 بیماریوه طبابت ایدوب تازیانه لر  
 زجر و عتابلر بَدَل اولدی دوا سینه  
 جبراً ایاق لاری دوه قارنیندا باغلانوب  
 قرخ منزلین دُزوبدی عذاب و آذا سینه  
 دشمن دُگنده عمه لرین خردا قزلاری  
 علّت اولاردی ناله و داد و بکاسینه  
 داغ داش اونون او حالینه آغلاردی لیک اوزی  
 آغلاردی سیر ایدنده اسیر اقرباسینه

دل یارہسی ورویدیلا چوخ شام و کوفہدہ  
 قربان اونون اورکده اولان دل یاراسینه  
 ابن زیاد مجلسینه چکدیلر اونی  
 اول مجلسین یانار اورگیم ماجرا سینہ  
 آچدیردی مجلسینده اودم سفره طعام  
 لعنت گله اوشوم لعینین حیا سینہ  
 بویلاندی باخدی آج سوسوز اصحاب قزلاری  
 اما رقیه یومدی گوزون باخ غنا سینہ  
 سجّاد باغری قانه دُنوب داغلی لاله تک  
 اول مجلسین باخاندای غم آگین فضا سینہ  
 جلّاد حاضر اولدی او مجلسده قتلینه  
 وحشت توزی اوتوردی دل با صفا سینہ  
 جلّاد الیندن آلدی اونی لیک عمه سی  
 صد آفرین او همت با اعتلا سینہ  
 شامه یتنده حضرت باقر آنا سینی  
 بیر نوع گوردی یاندی غم غمفزا سینہ

سویلوب منی اؤلده آنام دوغمییدی کاش  
 توش ایتمییدی چرخ دنی ابتلا سینہ  
 چوخ گوردی شام شومده دشمن شماتتی  
 سوزش چوخاتدی قلبده سوز خفا سینہ  
 اوت آتدیلار عنادیلہ یاندی عمامه سی  
 باخ شامین اهلینین ستم ناروا سینہ  
 باغلیدی آل لری اودی خاموش ایدنمّدی  
 زینب یانوب اورکدن اونون ابتلا سینہ  
 آلدی اَلنّ قالان لاری گتدی مدینہ  
 سالدی اولاری فاطمه دارالشفا سینہ  
 غربت اولوب مدینہ اسلام او حضرتہ  
 مشغول اولوب اوتوز بش ایل اوز آه و وا سینہ  
 هاردا سوگوردی و ابا العطشان دیوب یانوب  
 چشم دلی باخاردی حسین کربلا سینہ  
 شوریلہ جان ویرنجه باخوب آغلیوب مدام  
 جان لار فدا اولا او وفالی وفا سینہ  
 تائب امام باقر اولوبدور عزانشین  
 گل سنده شرکت ایت او عزیزون عزا سینہ

### در وفات حضرت امام صادق (ع)

ای اولان قتیل اعدا سینه ده یاراسی ایوای  
جعفری لرین رئیسی شیعه لر آقاسی ایوا  
دلرین صفاسی گندی شیعه لر آقاسی گندی

عمریجه دوزن فشاره حقیله حقیقت اوسته  
توش رنج و انزجاره دینیه دیانت اوسته  
قلب داغداری یاره صدقیله صداقت اوسته  
فعل و انفعالی صادق باشدا چوخ بلاسی ایوای

بار مرگیله خمیده تا او سرو قامت اولدی  
جعفری لره بو محنت بیر بیوک مصیبت اولدی  
شیعه عالمینده برپا برملا قیامت اولدی  
شیعه ذکری آه و وادی جعفری نواسی ایوای

نعشینی گوتوردی یردن شیعه جمع کثرتیله  
مردم مدینه تشیع ایتدی چوخلی عزتیله  
نعشنین دالنجا دوشدی اهل بیتی حسرتیله  
شور و شینیه دیردی خویش و اقرباسی ایوای

سر بسر مدینه شهرین دوتدی بانگ و اماما  
دلده ذکر و اماما گلدی داده پیر و برنا  
بیریانا تمام مردم بیریانا امام موسی  
حسرتی یاراتدی حسرت ناله و بکاسی ایوای

اوغلی تک آتا غمینده سینه داغلین تاپیلماز  
عارضه دولی گوزیله اشگی باغلین تاپیلماز  
چوخلار آغلاشار اوغول تک لیک آغلین تاپیلماز  
خلقی آغلادار دینده شوریه بالاسی ایوای

تاپشوروب امام هفتم قبره مهربان آتاسین  
همجوار ایدوب امام باقره گوزل بالاسین  
توپراقا قویان زماندا گل جمال حقنماسین  
سویلدی سولان جمال پاک و حقنماسی ایوای

عارضه امام موسی شور گوز یاشین آردی  
شیعه لر جماعتیله گوگلون آماقا گلردی  
دست رأفتیله گوزدن گوزیاشین اونون سیلردی  
آغلا شاردیلار دینده شیعه مقتداسی ایوای

کربلایه شیعه لردن کاش بیر گلن اولیدی  
حضرت امام ساجد حالینی بیلن اولیدی  
دردینی ندور بولیدی گوزیاشین سیلن اولیدی  
سس ویریدیلر دینده شیعه مُهتداسی ایوای

رحم ایدهلله رسمدوربو هر مریض و ناتوانه  
سهلدور که ایتمیوبلر رحم اوزار باغریقانه  
ایتدی طعن سعدین اوغلی شمروردی تازیانه  
غیظین آزتروب دینده رنج مبتلا سی ایوای

داغلی قلبینی گه او دلار آه سرد غم فزاسی  
خاطرین ایدر پریشان گه اوشاقلارین نواسی  
گه ورار آجی دلیل اهل کوفه دل یاراسی  
عمّه سی دیر بلالی قارداشیم بالاسی ایوای

تائبم گدای مسکین هاردا من کیمی گداوار  
هاردا بیله باب حاجت هاردا سیز کیمی آقاوار  
بیرئلیم اُزوم مریضم سیزده نسخه شفا وار  
گریز یلماسا الوزله نسخه شفاسی ایوای

### در وفات حضرت موسی ابن جعفر (ع)

خبیردن خبر آلدیم نه شور و غوغادی  
تمام خلقلده حال عزا هویدادی

چکوبله قاره اولوبلار سیاه پوش هامی  
باتوبلا خلق عزایه هامی مُعزّادی

دیددی مگر خبرون یوخدی کیم امام رضا  
قراگیوبدی وفات امام موسادی

ویرویدی گوشه زنداندا جان غریبانه  
ولی جنازه سینین نقلی چوخ غم افزادی

یازولاً گوردی سلیمان که نقل اولور بیر نعش  
اونون غریبلیقی آشکارو پیدادی

قویوبدیلار اوجا بیرنعشی قسا تابوته  
حقیر وضعیله نقل اول بلند بالادی

ایاق طرفدن ایاقلاری باش طرفدن باش  
آخوب کناره عجب حالتی غم افزادی



### نقل جنازه حضرت موسی ابن جعفر (ع)

دوروب آنوب آشاقا بیر نفردن ایتدی سؤال  
 گتور بیانه گوروم بونجه معمادی  
 بو نعلش صاحبی کیمدور بیله حقیرانه  
 جنازه سین آپارولار نه اسمه دارادی  
 هارالیدور یتر آیا کیمه حسَب نَسَبی  
 نندندی خویش و تلیندن بیله مُجزادی  
 بیله گمان ایدورم من بو مبتلای غمیین  
 بو شهرده آدامی یوخدی فرد و تنهادی  
 غریب اولسادا باری غریبلر یتیشر  
 گلوب سراغ ایده نی یوخدی بونه معنادی  
 جواب ویردیله اصلی بونون مدینه لیدور  
 امام جعفر صادق بالاسی موسادی  
 مه سپهر امامندی جدی پیغمبر  
 آتاسی شیر خدادور آناسی زهرادی  
 بونون وجودینه خاطر هامی اولور مرزوق  
 ثبات فرش زمین گنبد مُعلادی

مقام زهدده ممتاز علمده اعلم  
 سالاردی حیرته زهدی تمام زهدادی  
 ولی اسیر اولوب اون بیر ایلدی هارونه  
 یاتوبدی حَسَبده دلده نوای آزادی  
 قوتاردی عمرینی زندان ده عبادتیه  
 عبادتیه ایدوب سرفراز عُبّادی  
 بو شیر زاده دی روباهلر کمنده سالوب  
 ویروب شکنجه قفسده همیشه صیّادی  
 ووروبلا بوینونا زنجیر ایاقینه کُنده  
 انیسی رشته زنجیر و کُنده پادی  
 اوروج دوتوب گونوزی شام وقتی افطاری  
 ویروب غذایرینه تازیانه جلّادی  
 امامدور بو ولایتده چوخ دی ایستینی  
 ولیک دشمنی جابردی حکم فرمادی  
 اودور که گورماقا گلمزله شیعهلر یاخینا  
 آشوب داشوب خَققان چولقیوبدی بغدادی

### ناله زنان بغداد سر نعش حضرت موسی ابن جعفر (ع)

آلوب او نعشی سلیمان قویوب یره دولانوب  
 ویروب جماعته اول وقت اذن آزادی  
 دیدی خانم لاروزی یکسر ایلیون حاضر  
 گلوب بیر ایلیه لر بوردا ناله ایجاد ی  
 بونون بو شهرده اهل و عیالی یوخدی گله  
 سالا جنازه سی اوسته فغان و فریادی  
 آناسی یوخدی اوغولوی دیه نوائیله  
 جهانی آغلادا فریاد و شیون ودادی  
 آنا دلیلله گلوب اوخشاسون بونا آنالار  
 که ناله لرده مؤثر نوای ثکلادی  
 عیالی یوخدی باشی اوسته باشینی آچسون  
 باجی سی یوخدی ایده آه و ناله بنیادی  
 گوزلدی او خشیه بیر کس عیالینین دلجه  
 باجی یرینده بیر ی اوخشاسا چوخ اولادی  
 قزی یاندا گر اولسیدی یاخشسی اوخشاردی  
 قز اوخشاسا گوزل اوخشار بورسم دنیادی

### حضرت موسی ابن جعفر (ع)

قزی دلینجه گلوب اوخشاسون خانم قزلار  
 که قز سزیلتی سینین مشتری سی آبادی  
 گوزلدی آغلاماقوز بو غریب غربتینه  
 غریبه آغلاماق اجری رضای یکتادی  
 جنازه سینی خانم لار ایدوبله گل باران  
 گل اتدا ایتدیلله پنهان غریب بغدادی  
 آنا باجی دلجه اوخشیوبله شیونیلله  
 سالوبلا قزلاری تک شور شیون و دادی  
 اولیدی آیری سلیمان گلیدی کاش اوگون  
 گوریدی کرب وبلاده او ظلم و بیدادی  
 حسین جنازه سینه قتلگهده گل یرینه  
 سفق قلج اوخی توکمودشدی کفر افرادی  
 گلوب خانم باجی سی تاپدی قارداشین گوردی  
 نهان قلج لارین اتدا او جسم زیبادی  
 گوتوردی بیر به بیر آلات حربی آتدی کنار  
 گوروب یاتان یوزی اوسته امام والادی

## قتلگاه

حسین دیه دیه آلدی او نعشی آغوشه  
 چویردی آرخاسی اوسته او فخر اوتادی  
 حجازی دلریله اوخشادی او نعش اوسته  
 حسین عزاسینون اوردا قویولدی بنیادی  
 دیدی گوزوندن ایراق گورنه گون لره قالدیم  
 عدونه حاله سالوب گور بوزارو ناشادی  
 او زینبم یارالی پرده پوش عفتیدیم  
 گور ایمدی پرده سیز اولموش بو قد رعنادی  
 ایشیتیمیوب سسیمی بیر کلام نا محرم  
 نقدر او جالماسا عورت صداسی باجادی  
 یتوبدی بیر یره ایش چاره سیز سسیم او جالور  
 او جاسسیله دلیم وا حسین گو یادی  
 ایدوم نه چاره منی درد و غم دانشدیریری  
 سیز یلدارام ایدرم بیله نوحه انشادی  
 خلوص نیتیه یاز یازاندا سوز تائب  
 قبول اولونسا دیللر نه عالی انشادی

### تشییع جنازه حضرت موسی ابن جعفر (ع)

زندان ده جان ویردی جگر گوشه زهرا  
فریاد و نوائیله دولوب عالم بالا  
امر ایلدی هارون ستمکار و بد افعال  
نعشین گوتوروب حمل ایده لر دورت نفر حمال

سویله او ظاهر گورونن بیر جریانی  
معناده ولی واردی بیوک شرح و بیانی  
جدی یغوب اوز باشینه اشرف جنانی

دربار جلالتن ایدوب کسب اجازه  
گلموش ایده اوز اوغلونی تشییع جنازه

بیر کس که مقامی اولونا سدره لاهوت  
فضلیله دولا عالم لاهوتیله ناسوت  
تشییع ده اولدی اونا زندان دری تابوت

تابوت نه تابوتیدی کوتاه سیاقی  
باشدان باش ایاقدان کنار دوشدی ایاقی

بو صحنه جانسوزی باخوب گوردی سلیمان  
آندی اشاقا غرفه دن احوالی پریشان  
آلدی خبر آیاندی بو امر بو عنوان

بو نعش کیمین نعشی دی چوخ خوار آپارولار  
بیر آغلین احوالینه یوخ خوار آپارولار

مظلومدی چوخ اهل وفا یوخدی یاندا  
فاضلدی ندن بس فُضلاً یوخدی یاندا  
غربتده ویروب جان غُربا یوخدی یاندا

معلوم اولونان قوميله خویش وتلی یوخدور  
ئل سیزدی آدامسیزدی اودور نسکلی چوخدور

اولسا اَلنّین طایفه سی قلبینی داغلار  
بیر بیله زماندا یوزه گوزیاشینی باغلار  
تابوت کنارینده دوشر سس چکر آغلار

واضحدی آدامسیز لیقی دل داغلینی یوخ  
قبره گیدوری قلبی ستنق آغلیتی یوخ

بیردن دیدیلر سرور بطحادی بو مظلوم  
 وار حُرمتی ذرّیة طاهادی بو مظلوم  
 فرزند علی سیّد والادی بو مظلوم  
 موسی آدی زهرایه جگر پاره سیدور بو  
 غربنده ویروب جان وطن آواره سیدور بو  
 تا اینکه سلیمانی اولار ایتدیله حالی  
 احضار ایلیویدور هامی نسوان ورجالی  
 سویلوب بو غربیین یوخیدی اهل و عیالی  
 جمعیله گلون آغلیاق ایمدی بو غربیه  
 شوریه جگر داغلیاق ایمدی بو غربیه  
 هر کیمسه غریب اُسه گوزین باغلین اولماز  
 دلدن یانوب احوالینه دل داغلین اولماز  
 تشییعی غریبانه اولار آغلین اولماز  
 حرمت ایدون اللهدان اُتور میر حجازه  
 عزّتله ایداخ بوشهی تشییع جنازه

نولدی بو غریب اُسه ده شخصیتی واردی  
 حیثیت اسلامدی حیثیتی واردی  
 زندان دا اُلوب لیک غم غربتی واردی  
 بیر پیکره دیندی اسلام کتابی  
 بو سروره وار آغلاماقین چوخلی ثوابی  
 تابوتی خانم لاریغشوب آلدی آرایه  
 گل توکدیله نعلش شرف صدق و صفایه  
 آغلاشدیلاناله اوجالوب عرش خدایه  
 سسلردیله زندان ده مظلوم اُن ایوای  
 ایوای اولان ظلمیه مسموم اُن ایوای  
 ایکاش که بیر آیری سلیماندا اولیدی  
 بیر کرب و بلا دشتینه شوریه گلیدی  
 کیمدور او یارالی یخیلان یرده بولیدی  
 گلدسته توکیددی بیر او گل پیرهن اوسته  
 گوزیاشی سپیدی او یارالی بدن اوسته

گلدی باجیسی گوردی بیابان بلانی  
سپدی اوبلا خیز چوله اشگ روانی  
تاپدی یارالی پیکر شاه شهدانی

نه گوردی ایدوب نیزه قلج پاره‌سی پنهان  
سویلوب یارالی جانوه جانیم اولاقربان

ای خاک شهادتده دوشن گوهر غلطان  
ای قتلگه عشقی صفا خیز گلستان  
ای پیکر زیباسی اولان گل کیمی خندان

قائین بزویوب قانلو بیابانی حسینیم  
عطرون بورویوب دامن صحرانی حسینیم

تائب که حسین وایدی اونون ورد زبانی  
یاکرب وبلا دله تو کراشگ روانی  
گورموبدی ولی قبرشه کرب وپیلانی  
بیر وقفه بو تزلیقدا الهی ایله قسمت  
بو جمعیله ایتسون او گوزل قبری زیارت

### در حضور حضرت ثامن الائمه (ع)

چوخ شکریتدی لطف خداوند لایری  
گلدیم طواف قبریوه یا ایها الرضا

یاندیم شرار فرقته شوق وصالیه  
ترک علایق ایلدیم ای شاه ماسوا  
عشقونله من اوزاق یولی فرض ایلوب یاخین  
طی ایتیمیشم اویوللاری پیرانه لنگ پا  
هر ایل گلوب حضوریوه من حاجت آلمیشام  
بو ایلده ایله حاجتیمی سن ازون روا  
من آیریلان زماندا هامی دردمندلر  
امیدیه آچوبلا منه دست التجا  
بیله سانوبلا عرضه لیم محضرونده من  
ایلوبله التماس دعا خواجه و گدا  
من دردمند سنده ازون اهل دردسن  
درد اهلینین بولر غمینی درده آشنا

هر قدر دلدۀ درد اولا درمائی سنده دی  
من گلیمیشم آلام هامونین دردینه دوا  
وار بیر تلیم مریض و مریضه ازوم مریض  
ای درد عالمینه اولان گل آدی دوا  
شافی بولوب او جمع شفا سندن ایستوری  
بیر باخماقون شفا دی آقا ایلر اکتفا  
سندن شفا آلام اولارا قول ویر میشم  
ایتمه خجل بو نوکرون ای شاه ماسوا  
ویرم قسم جوان بالاوین جانینه سنی  
بیرئل مریضیمه ازومه لطف قیل شفا  
حاشا گیدم بیر اوزگه طیبین مطینه  
حاذق طیب بیله مطبون اولا اولا  
جرّاحلر پیچاق دمینه قورخورام گیدم  
بو گیر و داردن سن ازون قیل منی رها  
هچ زایدیم ازون بیودوب بیر زاد ایتموسن  
سندیرما از بیوتدوقون ای معدن عطا

مندن تمام جامعه‌نین انتظاری وار  
 لطفون ویروب منه بو قدر شأن و ارتقا  
 اللّهدان آل بو مُلتمسینین حوائجین  
 زهرایه خاطر ایتمه خجالت منی آقا  
 درویش تک قاپوندا گلوب خیمه قورموشام  
 مَدّاحوام محبّت ایله ویر صله شها  
 هر بیر گدا گلر قاپوا ایله سن غنی  
 هج بیر گدانی سن آلی بوش سالماسان یولا  
 من بیر گدای در گهم ای معدن کرم  
 لطفاً آلی دولی یولاسال منبع سخا  
 قلبیم سنقدی سن بولوسن ای شکسته دل  
 ایوای اگر حوائجیمی ایتمه سن روا  
 تائب تمام عمرده یا کربلا دیوب  
 سندن برات ایستر ایده عزم کربلا  
 یاران با وفائیمیله ویر براتیمی  
 جدّون حسینّه از حرمینده دوتاخ عزا

### زبان حال حضرت امام رضا (ع)

سینمده وار درد نهانیم الله  
 گوزدن آخار اشگ روانیم الله  
 غربنده وار کیمیم آلا دردیمی  
 یوخدی منیم بیر درد آلا نیم الله  
 مسند نشین کشور رضایم  
 آدیم علیدی شهرتاً رضایم  
 بلایه دل ویروب بلا آلمیشام  
 دین اوسته هر بلا گلسه رضایم  
 بوسمدور یار دردینی یار آلی  
 قلبینده هر درد و غمی وار آلی  
 هانی بیر یار آلا درد دلیمی  
 نیلیوم دوشموشم ئلدن آرالی  
 نه حالیمی بو غربنده وار بولن  
 نه وار منی گورماقا کیمسه گلن  
 نه وار آلان بو درد غربتیمی  
 گوزیاشمی نه وار گوزومدن سیلن



یاخونلاشوب دیرلیقدان ال اوزوم  
 آلان اولسا اورکده وار چوخ سوزوم  
 ئل آرالی وطن اوزاق غریم  
 غریب اللم قالار وطنده گوزوم

اهل دل اولسادردی دلدن آلار  
 دردی آلان اولسا غصّه آزالار  
 کیم دردینه یترّ غریب اله نین  
 کیم آدامسیز قالانی یاده سالار

باجیم اگر صاق اولسیدی گلردی  
 منیم غریتده دردیمی بولردی  
 نه دردیم وار اودلی دلدن آلاردی  
 رأفتیله گوزباشیمی سیلردی

تائب غریبلر ازین ایتیر  
 غمی دله مین بار غم گتیر  
 غریتده وار مریضون شمس الشموس  
 شفاویرر وطنینه یتیر

### یا امام الجواد ادرکنی

استغاثه از امام جواد علیه السلام  
 ای وجودی اولان عیار سخا یا امام الجواد ادرکنی  
 روح احسان و منبع اعطا یا امام الجواد ادرکنی  
 لطف قیل درده مبتلا لریوه نظر ایله اوز آشنالریوه  
 صلّه احسان ایله گدالریوه یا امام الجواد ادرکنی  
 سینه ده آه پر شراریم وار لاله تک قلب داغداریم وار  
 لطفوه گوزده انتظاریم وار یا امام الجواد ادرکنی  
 عزّت جلیله حرم سنسن زینت گلشن ارم سنسن  
 هم کریم اوغلی ذوالکرم سنسن یا امام الجواد ادرکنی  
 سنه هر با صفا اورک یوزی وار هامی مجلسده جود یون سوزی وار  
 تک نه من سنده هامونین گوزی وار یا امام الجواد ادرکنی  
 باخیشی چشم نرگس نگران فقرايه باخ ای امام جوان  
 او گوزل گوزلره اولاخ قربان یا امام الجواد ادرکنی  
 بیز محبّوخ سنه محبّت ایله لطفویله غریق نعمت ایله  
 سنی زهرا آنان عنایت ایله یا امام الجواد ادرکنی

سن گل گلشن سخاوت سن باغ احساندا سروقامتسن  
سن بیزه شافع قیامتسن یا امام الجواد ادرکنی

سوسوزام لطف ایله آب منه سولموشام ویر بیر آب وتاب منه  
سائلم ویر ازون جواب منه یا امام الجواد ادرکنی

گوزم سنله سو بسو دائم اولارام سنله رویرو دائم  
ایدرم سنله گفتگو دائم یا امام الجواد ادرکنی

ایسترم کاظمین زیارتینی سرور نشأتین زیارتینی  
قبر پاک حسین زیارتینی یا امام الجواد ادرکنی

سن حسین تک غریب جان ویردون شرح عاشورینه بیان ویردون  
سوسوز الماقینی نشان ویردون یا امام الجواد ادرکنی

تائبیله جناب خاقانی  
سندن ایستلله لطف شایانی  
بیر نظر باخ سنی آنان جانی  
یا امام الجواد ادرکنی

### شهادت حضرت امام جواد (ع)

منه محرمیم ایتدی جسارت آنا یاندیم  
ویروب ظلمیله زهر عداوت آنا یاندیم

گتورسم دله واردی منیم چوخ سوز ایویمده  
گزور قاتل جانی همیشه گوز ایویمده  
ایدوبدور منی مسموم او جانی از ایویمده  
یاخور جانیمی سوز حرارت آنا یاندیم

جوادم از آتام تک جلای وطن اولدوم  
دوشوب غربته غرق ملال و مَحَن اولدوم  
بو حالیه مثال امام حسن اولدوم  
نشان ویردیم اونا من شباهت آنا یاندیم

او مظلوم از ایوینده اولوب من کیمی مغموم  
اونون تک از ایویمده من اولدوم آنا مسموم  
او اولدی ایله مظلوم من اولدوم بیله مظلوم  
گوروب دلده اونون تک جراحت آنا یاندیم

نجه صاق صولا دوندی آنا من ایله دُونم  
 او دردیله بوروندی ایله منده بورونم  
 اودایاندی سوروندی ایله منده سورونم  
 ویروب یوزمنه عیناً او حالت آنا یاندیم

یانوب زهریله باغریم قزلقانیله دولدی  
 خزان اولدی بهاریم حیاتیم گلی سولدی  
 یتوب کامینه اهل عداوت اولان اولدی  
 منی سالدی ایاقدان او جرأت آنا یاندیم

بهاریم گیدوب الدن خزانیم یتشوبدی  
 جهانندان داخی گتماق زمانیم یتشوبدی  
 بو حسرتله دوداقه بو جانیم یتشوبدی  
 سالوب قلیمه آتش بو حسرت آنا یاندیم

آنا بیر باشیم اولدی منیم مین غمیم اولدی  
 بلا مونس جانیم غمیم همدمیم اولدی  
 منی ظلمیله مسموم ایدن محرمیم اولدی  
 ایدر باغریمی قان بو جسارت آنا یاندیم

سوسوز گوردی کنیزیم منیم قیدیمه قالدی  
 منه گتدی سوگتدی یانان گوگلیمی آلدی  
 آلوب جامی الیندن عیالیم یره چالدی  
 حیا ایتمدی اول بی مروّت آنا یاندیم

پریشان لیقا اعلان پریشان ویروم من  
 توکوب قطره اشگی غمی سان ویروم من  
 سالوب جدیمی یاده سوسوز جان ویروم من  
 او عطشانندان آپاردیم وراثت آنا یاندیم

منیم حالیمه شیعه گلر شیونه آغلار  
 توگر گوزیاشی اهل وفا دامنه آغلار  
 یازار نوحه می تائب سزیلدار منه آغلار  
 دلیمجه منیم ایلر کتابت آنا یاندیم

## زبان حال امام جواد (ع)

آنا یا فاطمه مظلوم الورم  
ایلیوبلر منی مسموم آلورم  
جگریم یاندی آنا یاندی دوغراندی آنا  
باغریقان جانویریرم جان لب عطشان ویریرم

میل ایدوب زهر جفا یاندیم آنا  
قلبدن اود دوتوب اودلانیدیم آنا  
جگریم یاندی یارالاندیم آنا  
آنا یا فاطمه مظلوم آلورم

صون نفسده ایله یاد اوغلوی گور  
آشنا کشته یاد اوغلوی گور  
گل بو جان اوسته جواد اوغلوی گور  
آنا یا فاطمه مظلوم الورم

غم منه مونس اولوب من محنه  
آغلیوب اوخشامیشام غمله سنه  
سنده بالینمه گل آغلا منه  
آنا یا فاطمه مظلوم الورم

قاتلیم جور و جفا اذنین آلوب  
گور جواد اوغلوی نه حاله سالوب  
آل اورکده گوزی صاق صولدا قالوب  
آنا یا فاطمه مظلوم الورم

کلک تقدیر ازی مرقوم ایلیوب  
معتصم اوغلوی مظلوم ایلیوب  
آز عیالیم منی مسموم ایلیوب  
آنا یا فاطمه مظلوم الورم

جوهر جرم و خطا امّ الفضل  
عاری از مهر و وفا امّ الفضل  
منه چوخ ایتدی جفا امّ الفضل  
آنا یا فاطمه مظلوم الورم

اودلانان باغریماقان دولدی منیم  
گل جمالیم سارالوب سولدی منیم  
عمرمین باغی خزان اولدی منیم  
آنا یا فاطمه مظلوم الورم

جدیمه من تبعیت ایدرم  
تشنه جان ویرماقا رغبت ایدرم  
نوش صهای شهادت ایدرم  
آنا یا فاطمه مظلوم الورم

زهر کین لرزه سالوب جان و تنه  
وار نیازیم بیر ایچیم سویرونه  
ایسترم سو - سوویرن یوخدی منه  
آنا یا فاطمه مظلوم الورم

بویانوب جدیم اگر قانه سوسوز  
جان فدا ایلدی جانانه سوسوز  
ألورم مننده غریبانه سوسوز  
آنا یا فاطمه مظلوم الورم

آلیشان قلبیله فریاد ایدرم  
العطش دلده یانوب داد ایدرم  
جدیمین تشنه لیقین یاد ایدرم  
آنا یا فاطمه مظلوم الورم

اوز عالییم منه ایذا ویردی  
ظلمینه صورت و معنا ویردی  
سوسوز الماقیمه فتوا ویردی  
آنا یا فاطمه مظلوم الورم

تیکمیوب ازگییه تائب گوزونی  
یازدیروب دور بیزه خادم ازونی  
خوشدی بیرده یازا اول سوزونی  
آنا یا فاطمه مظلوم الورم

### احوال حضرت امام هادی (ع)

گوردوم کتاب غمده بیله بیر کتابتی  
شرح ایلمرم بیاناً او غملی روایتی

طغیانی با شلیوب متوکل غروریه  
عاق اولدی هم خدایه دانوب هم امامتی  
امکان ویروبدی فرقه اشراوه ظلمیله  
چوخ تنگنایه سالدی امام عدالتی  
فرصت تاپوب مُداهنه گرلر ایدوبدیلر  
حق امام حقه چوخ چوخ سعایتی  
سویلردیلر امام ایدور جمع اسلحه  
مطلق سنون علیهوه وار فکر نهضتی  
حال غروریه متوکل روان ایدوب  
مظلوم امام منزلینه بیر جماعتی  
بیت امامته گجه وقتی توکولدیلر  
نه عرض ایدیم یاراتدیلا نه خوف و وحشتی

الله بولور نه حاله قالب اهل بیت دین  
نه نوع ایلدی نگران آل عصمتی  
بیر زاد تاپولمیوبدی و لیکن تاپوبدیلر  
حال عبادت اوسته او روح عبادتی  
جانانیه گوروبله که راز و نیاز ایدر  
گوز یاشی ایسلادوبدی او گلرنگ صورتی  
شرم ایلورم دیم که او مشروب بزمنه  
نه نوع گتدیلر او سلیل ولایتی  
مشروب مجلسی هارا میر هدا هارا  
بیر بیله مجلسیله امامین نه نسبتی  
وارد ایدنده مجلسه افسرده حالیه  
اول مُهتدای دینی اورکن شریعتی  
سرمست جامیدی متوکل الینده جام  
اگلشدیروب اوشوم کنارینده حضرتی  
جام شرابی ایتدی تعارف او سروره  
باخ بیر حیایه سیرایله بیر گور خباتتی

حضرت بویوردی دوت منی معذور اولمیوب  
 داخل شراب قانیمه چون واردی حرمتی  
 مَعْفُو دوتدی قصد اهانتله سویلدی  
 اشعار اوخی بیر آز منه ویر روح لذتی  
 سویلوب امام شعرده چوخ یوخ روایتیم  
 آل چکمدی نقدر واریدی وقاحتی  
 مجبور ایدوب امامی او بی شرم و بی حیا  
 باشلوب امام شعريله پند و نصحیتی  
 فرمایش ایتدی مرگ سلاطین دن صورا  
 شرح ایلم که واردی نه خواری نه ذلتی  
 چوخلار گیدوبدی قلّه مُحکّمده اگلشوب  
 اما اولوبدی قطع اونون هر حَراستی  
 غالب اولوبلا قلعه لره لیک او قلعه لره  
 بیر نفع ویرمیوب اولارا پَشْهَ قیمتی  
 فریاد او وقتدن که او عزّتی قلعه نی  
 جبراً آنوب تاپاللا حَضِیض ذلالتی

بیک اجل تاپار اولاری قبض روح ایدر  
 چوخ پیس مکان لرده تاپالار سکونتی  
 مدفنده دفن اولاندا منادی ایدرندا  
 نولدی او دستبندلر اعضاء زینتی  
 نولدی او چهره لر که تَنَم ده غرقیدی  
 نولدی او پرده لر هانی تالار دولتی  
 نولدی او گیرودار او فرامین اوتاج و تخت  
 نولدی اوزرَق و برق او میز حکومتی  
 نولدی او چلچراغ لی تالار زرنگار  
 فی الحال اختیار ایلیوب دار ظلمتی  
 مأمورلر سؤاله گلر قعر قبرده  
 وحشت دوتار او وقتنده اهل ضلالتی  
 اوندا ندور جواب او طغیان ایدن لره  
 حقی دانوب دوتوبلار اولار راه بدعتی  
 دنیاده هر قدر که اولار عیش ونوش ایدوب  
 جبران ایدر مزار ویرن رنج و زحمتی

غفلت یوليله شربت شیرین ایچنلره  
 بیر تلخ صحنه ایچدیری بیر تلخ شربتی  
 قبر ایچره مردمان جهانخوار گوزلرین  
 فی الجملة مورومار ییر وار روایتی  
 اوندا بیلر اولار نه جنایت ایدوبدیلر  
 یا انجیدوبدیلر نجه مظلوم ملتیی  
 سوزبویره یتوب متوکل چکوب بیرآه  
 حالی پوزولدی توکدی یوزه اشگ حسرتی  
 سس چکدی آغلادی اوجادان هایهائيله  
 ایسلانندی گوز یاشيله اونون ریش و صورتی  
 جام شرابی وردی یره گوزده گوزیاشی  
 بر چیده ایلدی او گجه بزم عشرتی  
 دوندی امامه چوخلی محبت و یروب نشان  
 چوخ احتراميله یولا سالدی او حضرتی  
 ظاهرده خوش دلیلله امامی سالوب یولا  
 باطنده آرتیراردی دمامد عداوتی

گاهی ایدوب اذیت و آزار او سروره  
 گاهی اولوب او حضرته طعن و اهانتی  
 گاهی جفائيله علویننی انجیدوب  
 گاهی حسین مزارینه اولدی جسارتی  
 امر ایلدی حسین مزارین ایدون خراب  
 شخم ایلون شروع ایدون اوردا زراعتی  
 گه باغلیوب جفائيله کرب و بلا یولون  
 ممنوع اولوندی خلقه حسینین زیارتی  
 اللر کسیلدی لیک اویولار کسيلمی  
 چکدی آپاردی خلقی حسینین محبتی  
 راوی دیر بیر عورت ایدوب عزم کربلا  
 مأمورلر گوروبله یول اوسته او عورتی  
 سویلوبله شرط دور صاق الیندن گیدن گچه  
 تا ایلیه زیارت شاه شهادتی  
 عورت و لیک ایلدی آماده صول الین  
 سویلوبله صول الون ویروسن وارنه علتی



ویردی جواب صاق الی ویردیم گچن سفر  
 ویرم بوگونه صول الی وارجانہ متتی  
 چون کہ آقام حسینی گوزومدن چوخ ایسترم  
 گوز ایستہ سزده گر ویررم یوخ کراہتی  
 آل گوزندور بو جانیمی ارزانی ایلرم  
 جانانیمین محبتی نین چوخدی قیمتی  
 بیر عمریله برابر اولار هانسی شیعہ نین  
 اولسا حسین زیارتی عالمدہ قسمتی  
 یا رب نہ وقت اولور آچیللا کربلا یولی  
 قسمت اولا بو جمعه حسینین زیارتی  
 با ہم طواف ایداخ بیر او ششگوشه مدفنه  
 بالای سرده بیرده دویاخ باب رحمتی  
 پائین پایه بیر دوشناق وای علی دیاخ  
 لیلا دلینجه اوخشیاق اول ماه طلعتی  
 تائب باشوندا واردی سنون شوق کربلا  
 امّا گورنمیویسن او گلزار جتتی  
 عهد ایله نائل اولسان اگر بو زیارتہ  
 اوردا دعا ایله هامی اعضاء ہیئتتی

**استغاثه از امام زمان (عج)**

ای اولان کلّ عالمه مولا یا امام زمان ادرکنا  
اوزی مولا گوزل سوزی اولا یا امام زمان ادرکنا

یا امام زمان ادرکنا

داده یت صبر یمیز تمام اولدی مشرکین مقضی المرام اولدی  
اهل اسلام قتل عام اولدی آل آچویلار یهود و هم ترسا

یا امام زمان ادرکنا

سن فساد عالمین صلاح ایده سن هر گره اولسا افتتاح ایده سن  
لطف هر شام و هر صباح ایده سن قالدی یکسر گره ده اهل ولا

یا امام زمان ادرکنا

غملی دنیاده گولموری یوزوموز انتظارون سوزی اولوب سوزوموز  
سن گلن یولدا دور بیزیم گوزوموز گل گلن یوللاریوا شیعه فدا

یا امام زمان ادرکنا

گل یوزون پرده دن عیان ایله گل بو دنیانی گلستان ایله  
عالم پیری گل جوان ایله قوجا دنیانی چولقیوب غوغا

یا امام زمان ادرکنا

ای سرافرازی جوان مردان با هدف مَفخَر جهان گردان  
 اهل اسلام اولوبدی سرگردان دولانولار بدون راه نما

یا امام زمان ادرکنا

سنه خاطر وئی ذات خدا رزق و روزی تاپالاکل ورا  
 اولی ثابت تمام ارض و سما سنه محتاجدور هامی دنیا

یا امام زمان ادرکنا

ناامیدون رجاسی سنسن سن خلق مشکل گشاسی سنسن سن  
 آقالارین آقاسی سنسن سن آقالیقلا آقالیق ایت مولا

یا امام زمان ادرکنا

قوم بیداد چوخ ایدوب بیداد دادگر یوخ اسیر اولار آزاد  
 هرطرف مسلمین چکر فریاد اولارا یوخدی ملجاء و مأوا

یا امام زمان ادرکنا

درس آلوب مکتب جهالتدن دولدوروبلار جهانی بدعتدن  
 یوخ خبر عدلدن عدالتدن عدل کُشلق ایدوله بی پروا

یا امام زمان ادرکنا

نولی نیرو وی آشکار ایده سن ظلم ایوبین محو وتار ومار ایده سن  
 عدلی دنیا ده برقرار ایده سن ایاق آلتندا قالدیلار ضَعفا

یا امام زمان ادرکنا

گر بیان اولسا واردی چوخ سوزلر دلدۀ زیبا آدون دولار گوزلر  
 بیر جهان مصلح جهان گوزلر جمله مظلوم لر ایدلله نوا

یا امام زمان ادرکنا

نه اولار ظلم رشته سسین قراسان پرچم عدلی هریره وراسان  
 گردن اهل ظلمی سندیراسان چوخ بیزی سندیروبلار اهل جفا

یا امام زمان ادرکنا

نولی رحمت هماسی پرچالاسان عالمه سایه هما سالاسان  
 جدیوبین قانینی گلوب آلاسان طالب خون شاه کرب وبلا

یا امام زمان ادرکنا

مهر تابان حجاب غیبته اهل دنیا جهان ظلمته  
 هامی سرگشته تیه حیرته سنی گوزلله دللرینده نوا

یا امام زمان ادرکنا

واردی دلدرده گچ قالان گله جاق      خرمن کفره اود سالان گله جاق  
شهدا قانلارین آلان گله جاق      گوزوموز قالدی سن گلن یولدا

یا امام زمان ادرکنا

باد کفریله باغ دین سولدی      یاندی گلر هزاره لال اولدی  
گلشنه زاغیله زغن دولدی      دوتدی گلزاری گرد درد و بلا

یا امام زمان ادرکنا

غرقه اسلام و بحر کفر آراسی      شیعه گتسون هارایه وارها راسی  
بی حیالر ووروللا دل یاراسی      گل ازون الده مرهمیله دوا

یا امام زمان ادرکنا

رتل قرآن اولوب غزلخوانی      اوخیوب آنلا موللا معنایی  
الده قرآن دانوللا قرآنی      هم حجاب آیه سین دوتوللاها

یا امام زمان ادرکنا

سنده کیم رمز آزمایش وار      گورنجه جهلده فزایش وار  
بزم قرآن ده نمایش وار      واردی صورت و لیک یوخ معنا

یا امام زمان ادرکنا

بی خبر احمدی وصیتدن      آیرو لار کتابی عترتدن  
یوخ خبر صحبت ولایتدن      وار فقط بانگ هی هی وهیها

یا امام زمان ادرکنا

اوزگه عالمدی محو اولورا اوهام      هامو بد نام لر اولور خوشنام  
هامو یولدان چخوب سانور اسلام      اهل اسلامی ایستدیلر سوا

یا امام زمان ادرکنا

نسخ اولوب رسم دین و دینداری      دولدوب دور حرام بازاری  
ایلر اصنافیمیز رباخواری      سسلنور هر طرفده زنگ ربا

یا امام زمان ادرکنا

تائب اقل سوزون بویرده تمام      گتورر رسمدور کلامی کلام  
قوی حرام خوار لر یسوئلکه حرام      سن صفای دلیلله ایله ندا

یا امام زمان ادرکنا

### طلب شیعه از درگاه ربوبیت جهت ظهور امام زمان (عج)

رحم قیل ای خدای عالمیان      کفره میدان اولوب زمین و زمان  
 اهل اسلامه یوخدای امن وامان      پیامال اولدی امت قرآن  
 امر ایله صاحب الزّمان گلسون      فاطمه قانینی آلان گلسون  
 دوتوب اهل جفا کمین گاهی      یوخ مسلمانلارین هوا خواهی  
 هانی چرخ عدالتین ماهی      هاموگوزلور بقیة اللہی  
 اذن ویر صاحب الزّمان گلسون      فاطمه قانینی آلان گلسون  
 هانی عدلیله داد معیاری      هانی جُند خدای سرداری  
 هانی منکوب ایدن ستمکاری      هانی مظلوملر طرفداری  
 اذن ویر صاحب الزّمان گلسون      فاطمه قانینی آلان گلسون  
 هانی تاریک شامی گوندوز ایدن      هانی دوزلیقلا آیرینی دوزایدن  
 ایشلرین خوش عمل لره گوزایدن      صحبتینده بیان حق سوزایدن  
 اذن ویر صاحب الزّمان گلسون      فاطمه قانینی آلان گلسون  
 هانی دین گلستانینی سوواران      هانی ظلمات کفری نوری یاران  
 ریشه رِجسی ریشه دن قوپاران      آرادان هر تجاوزی آپاران  
 اذن ویر صاحب الزّمان گلسون      فاطمه قانینی آلان گلسون

هانی اسلام اونا ذخیره دین      عادلانه لباس عدل گین  
 بدعتی دین ایوینده محو ایلین      سنت و واجباتی تازه لین  
 اذن ویر صاحب الزّمان گلسون      فاطمه قانینی آلان گلسون  
 هانی دیدینده حق گورن گلسون      باطلی حقه چوندرن گلسون  
 باغ دیننه صفاویرن گلسون      کفری اسلامه دوندرن گلسون  
 اذن ویر صاحب الزّمان گلسون      فاطمه قانینی آلان گلسون  
 هانی دنیا و دین جهانبانی      چکه زنجیره جهل دنیانی  
 ایلیه زنده حد قرآنی      ایده آزاد اهل ایمانی  
 اذن ویر صاحب الزّمان گلسون      فاطمه قانینی آلان گلسون  
 هانی اعلان ایدن او قدرتینی      سندیران اهل کبر شوکتینی  
 شرک و کفرین یخان عمارتینی      آرتوران اهل دین عزتینی  
 اذن ویر صاحب الزّمان گلسون      فاطمه قانینی آلان گلسون  
 هانی عدلیله داد میزانی      یخان اهل جفا و طغیانی  
 محو ایدن قوم فسق و عصیانی      قورتاران غمدن اهل قرآنی  
 اذن ویر صاحب الزّمان گلسون      فاطمه قانینی آلان گلسون

|                              |                            |
|------------------------------|----------------------------|
| هانی کفرین مقابلینده دوران   | رشته نخل اختلافی قران      |
| ریشه دن سرکشی هوانی ووران    | عدل دیوانینی جهاندا قوران  |
| اذن ویر صاحب الزمان گلسون    | فاطمه قانینی آلان گلسون    |
| هانی کُودن یالانی قطع ایلین  | رشته افترا نی قطع ایلین    |
| بانگ اهل ریانی قطع ایلین     | رگ گردنکشانی قطع ایلین     |
| اذن ویر صاحب الزمان گلسون    | فاطمه قانینی آلان گلسون    |
| هانی کذب و دروغ گونی یخان    | هانی هر نانجیب و دونی یخان |
| هانی یولدان چخان دورونی یخان | کینه توز و ستیزه جونی یخان |
| اذن ویر صاحب الزمان گلسون    | فاطمه قانینی آلان گلسون    |
| هانی احبابینه ویرن عزّت      | هانی اعداسینه ویرن ذلّت    |
| خلقی تقوایه ایلین دعوت       | بنده حقّ و روح خُریت       |
| اذن ویر صاحب الزمان گلسون    | فاطمه قانینی آلان گلسون    |
| هانی سرّ خدا و باب اللّٰه    | هانی آئینه جمال اله        |
| زمره اولیایه خاطر خواه       | خسرو پاک و سرور آگاه       |
| اذن ویر صاحب الزمان گلسون    | فاطمه قانینی آلان گلسون    |

|                              |                              |
|------------------------------|------------------------------|
| هانی مولای عالی وادنا        | سبب اتّصال ارض و سما         |
| صاحب یوم فتح اولان مولا      | یر اوزینده آچان لوای هُدا    |
| اذن ویر صاحب الزمان گلسون    | فاطمه قانینی آلان گلسون      |
| هانی شایسته شئون علا         | هانی معنای صلح و لفظ صفا     |
| انسیانین قانین آلان مولا     | خونستان قتیل کرب و بلا       |
| اذن ویر صاحب الزمان گلسون    | فاطمه قانینی آلان گلسون      |
| هانی دردین دله سالان مولا    | امّتین فکرینه قالان مولا     |
| سگّه اوز آدینه و ران مولا    | جدّینین قانینی آلان مولا     |
| اذن ویر صاحب الزمان گلسون    | فاطمه قانینی آلان گلسون      |
| خصم هموار ایدوب جفا یولونی   | باغلیوب ظلمیله وفا یولونی    |
| رحمت و صدقیله صفا یولونی     | آچماقا باغ کربلا یولونی      |
| اذن ویر صاحب الزمان گلسون    | فاطمه قانینی آلان گلسون      |
| گونی گوندن بیزه یامان اولدی  | باغ امیّد یمیز خزان اولدی    |
| داخی دل صبر یمیز تالان اولدی | شیعه لر یاندى باغریقان اولدی |
| اذن ویر صاحب الزمان گلسون    | فاطمه قانینی آلان گلسون      |

| شرح مطالب                                  | از ص | الی ص | ردیف |
|--|------|-------|------|
| نام کتاب                                   | ۱    | ۱     | ۱    |
| شناسنامه کتاب                              | ۲    | ۲     | ۲    |
| عکس مؤلف                                   | ۳    | ۳     | ۳    |
| مقدمه کتاب                                 | ۴    | ۴     | ۴    |
| ولادت حضرت رسول اکرم (ص)                   | ۱۳   | ۵     | ۵    |
| پند و اندرز                                | ۱۵   | ۱۴    | ۶    |
| از ولادت تا شهادت حضرت علی (ع)             | ۵۲   | ۱۶    | ۷    |
| احوال حضرت زهرا (س)                        | ۱۲۰  | ۵۳    | ۸    |
| حدیث کسا                                   | ۱۴۸  | ۱۲۱   | ۹    |
| ولادت امام حسین و ابوالفضل (علیهما السلام) | ۱۵۳  | ۱۴۹   | ۱۰   |
| حضرت مسلم ابن عقیل (رح)                    | ۱۵۷  | ۱۵۴   | ۱۱   |
| عشق امام حسین (ع) در دل ۱۲                 | ۱۶۵  | ۱۵۸   | ۱۲   |
| ورود کربلا                                 | ۱۷۲  | ۱۶۶   | ۱۳   |
| حضرت علی اکبر (ع)                          | ۱۸۲  | ۱۷۳   | ۱۴   |
| حضرت ابوالفضل (ع)                          | ۱۹۱  | ۱۸۳   | ۱۵   |
| حضرت علی اصغر (ع)                          | ۱۹۶  | ۱۹۲   | ۱۶   |
| حضرت ابراهیم خلیل الرحمان (ع)              | ۲۱۷  | ۱۹۷   | ۱۷   |
| شخصیت امام حسین (ع) و مضائب آن             | ۲۳۰  | ۲۱۸   | ۱۸   |
| شهادت امام حسین (ع) و جوان نصرانی          | ۲۴۴  | ۲۳۱   | ۱۹   |

| شرح مطالب                       | از- ص | الی ص | ردیف |
|---------------------------------|-------|-------|------|
| غارت خیام                       | ۲۴۵   | ۲۴۹   | ۲۰   |
| قتلگاه کوچ از کربلا             | ۲۵۰   | ۲۹۰   | ۲۱   |
| کوفه                            | ۲۹۱   | ۲۹۵   | ۲۲   |
| راه شام                         | ۲۹۶   | ۲۹۸   | ۲۳   |
| خرابه شام                       | ۲۹۹   | ۳۰۳   | ۲۴   |
| عزای امام حسین (ع) در خانه یزید | ۳۰۴   | ۳۰۶   | ۲۵   |
| خروج اهلبیت از شام              | ۳۰۷   | ۳۱۲   | ۲۶   |
| اربعین                          | ۳۱۳   | ۳۲۸   | ۲۷   |
| حضرت زینب (س) در مدینه          | ۳۲۹   | ۳۴۶   | ۲۸   |
| حضرت سجاد (ع)                   | ۳۴۷   | ۳۶۰   | ۲۹   |
| حضرت موسی ابن جعفر (ع)          | ۳۶۱   | ۳۷۷   | ۳۰   |
| حضرت امام رضا (ع)               | ۳۷۸   | ۳۸۴   | ۳۱   |
| حضرت امام جواد (ع)              | ۳۸۵   | ۳۹۴   | ۳۲   |
| حضرت امام هادی (ع)              | ۳۹۵   | ۴۰۱   | ۳۳   |
| مسجد جمکران                     | ۴۰۲   | ۴۰۴   | ۳۴   |
| حضرت ولی عصر (عج)               | ۴۰۵   | ۴۱۳   | ۳۵   |
| تَمَّتْ کتاب                    | ۴۱۴   | ۴۱۴   | ۳۶   |
| فهرست کتاب                      | ۴۱۵   | ۴۱۶   | ۳۷   |